

# Menmen Mit Aposel Hir Niriakem

## Menmen me tiwei ik

Mit hir nau nemerir wi hir nantip mit him me Jisas 1:1-26

1. Jisas katip mit disaipel menmen 1:1-14
2. Mitik kekrehir ke Judas 1:15-26

Mit newepyapir him me Jisas neit Jerusalem 2:1-8:3

Mit newepyapir him me Jisas neit Judea ketike Sameria 8:4-12:25

Mitik Pol katip mit him me Jisas 13:1-28:31

1. Namba wan taim Pol ken kerer wit wit 13:1-14:28
2. Mit nererik natip neit Jerusalem 15:1-35
3. Namba tu taim Pol ken kerer wit wit 15:36-18:22
4. Namba tri taim Pol ken kerer wit wit 18:23-21:16
5. Pol kekre winak enuk keit wit Jerusalem, Sisaria ketike wit 21:17-28:31

## Jisas katip kaksuwe God Himin Yaaik kaknen kakikaap mit

**1** <sup>1</sup>“Kai yinak Tiofilas, nipaa hi Luk hewiswut tiwei hak me menmen Jisas hirak kiriakem metike him hirak ketpim kewepyapir mit em, <sup>2</sup>bere wi God ketiwekhis keiyik ken wit kirak. God ketiwekhis wen au, Jisas hirak wen kepu ti, hirak katip mit nirak kerek nipaa hirak kehimiteni hir aposel hir nanwep yapir him mirak. Hirak ketpor him nipaa God Himin kirak Yaaik ketpiwekem. <sup>3</sup>“Jisas hirak kaa pike kekrit nepei au, me wi 40 hirak keteiknor hirak hirekes kepu keriuwe menmen yapirwe hirak kiriakem. Hirak kewepyapir hirekes ketpor menmen me God kakinin mit naanempror. <sup>4</sup>“Hirak wen kepu ketikeri, hirak ketpor him manp te hir ap naninaaiwir wit Jerusalem au. Hirak katip kar ik: “Yi eiyyit in ere God Himin kirak Yaaik kerek nipaa God Haai kai katip kakriuwetek hirak kaknen. Nipaa hi hetpiyem. <sup>5</sup>“Nipaa Jon kikir mit

<sup>a</sup> 1:1 Lu 1:1-4   <sup>b</sup> 1:2 Mk 16:19; Lu 24:49-51   <sup>c</sup> 1:3 Lu 24:36-49; Ap 10:41   <sup>d</sup> 1:4 Lu 24:49; Jo 14:16-17; Ap 2:33   <sup>e</sup> 1:5 Mt 3:11

neriuwe tipar keremem. Te maain wi ham God kakweti yi mit Himin kirak Yaaik kaknen kaku kakikre han ki, hirak kakikepi yi einaaiwir wit Jerusalem eiwepyapir him me God.”

<sup>6f</sup>Mit aposel wen nererik nepu, hir nitiwekhi nar ik: “Mitik Iuwe me wi im te ti ehui wit Isrel ehinin naanmamprai haiu mit ne Isrel a?”  
<sup>7g</sup>Hirak kewenhi ketpor kar ik: “Hiram ap menmen mi te yi eiyirtei wi te menmen im mamnen au. God Haai hirekes kimat wi im kises han kirak. Te menmen im hi hetpiyem te yi eiyirteiyem. <sup>8h</sup>Maain God Himin Yaaik kaknen kakwi yi yayit menmen mirak iuwe mamkepi, yi yaino wit Jerusalem eiwepyapir him mai. Im em epei au, yi yaino provins Judia. Im em epei au, yi yaino wit iuwe Sameria metike wit yapirwe, yi eiwepyapir him mai.”

### **Jisas kinaaiwir ti ken wit ke God**

*(Mk 16:19-20; Lu 24:50-53)*

<sup>9i</sup>Hirak ketpor him im epei au, hir wen nirek, hirak God keriyaak kinaaiwir ti ken niu, napi kiwapinek hir nirek nepei au. <sup>10j</sup>Hir wen nereweknaan keit nepni, mitikit wik terp tekiteri klos mirakit hiram mire hike. <sup>11k</sup>Hirakit ketpor tar ik: “Yi mit ne Galili yi yenmak yi yereweknaan keit nepni? Mitik eik Jisas hirekes yi yirek hirak kinaiwiri ken wit ke God, maain hirak pike kaknen kakir ke in ek yi yirek hirak ken nepni.”

### **Mit aposel nehimitan mitik hak kekrehir ke mitik Judas nipaa kaa**

<sup>12l</sup>Hirakit tatip epei au, hir aposel ninaaiwir miniu (o neiyip) niuk mirak wit Oliv, hir nen wit Jerusalem. Hirak ap yanimin au. Hirak menep kar ke mit ne Juda me wi Sabat hir neke ti nanino. Hirak kire 1 kilomita. <sup>13-14m</sup>“Hir nipiun Jerusalem, hir nan winak kerek nipaa hir newik. Hir ninik nen haau nimin ein mekre winak kau niu. Hir mit in: Pita, Jon, Jems, Andru, Filip, Tomas, Batolomyu, Matyu, Jems hirak mitik hak nikan ke mitik Alfias, Saimon kerek kises him me mit Selot, hir netike Judas nikan ke Jems, Maria, miye pe Jisas wetike kikrek nirak, hir netike miyapir han. Hir yapirwe nau haau ik e. Wi yapirwe hir nererik neit in, hir nitehi God menmen. <sup>15</sup>Maain wi ham mit 120 hir nises him me Kraiss, hir nererik nau haau iuwe, Pita kekrit ketpor kar ik: <sup>16o</sup>“Nai yinan, nipaa God Himin Yaaik kenip mitik iuwe King Devit hirak kewis him mau tiwei me mitik Judas kerek nipaa kewepyapir Jisas kerp nein te hir mit enun netiwekhis. Him im nepei man mar ke nipaa Devit kewisim hiram mamnen. <sup>17</sup>Nipaa Judas hirak ketikewai. Jisas kehimitanek kiriak

<sup>f</sup> 1:6 Lu 24:21    <sup>g</sup> 1:7 Mk 13:32    <sup>h</sup> 1:8 Mt 28:19; Lu 24:48; Ap 2:32, 3:15, 5:32; Ef 3:16

<sup>i</sup> 1:9 Jo 6:62    <sup>j</sup> 1:10 Lu 24:4    <sup>k</sup> 1:11 Mt 26:64; Lu 21:27; Rev 1:7    <sup>l</sup> 1:12 Lu 24:50-53

<sup>m</sup> 1:13 Mt 10:2-4    <sup>n</sup> 1:14 Jo 7:5    <sup>o</sup> 1:16 Sam 41:9

menmen ketikewai. <sup>18</sup>P(Mitik ik keit ti mei keriuwe pewek hirak nipaa ketiwem me menmen enum hirak kiriak Jisas em. Hirak keit ti, hirak kerp kau niu kenkewin ken ti tu kewep ninpi meket men witeik hirak kaa.” <sup>19</sup>Mit yapirwe neit Jerusalem nemtau Judas kaa karkeik te hir nekine ti ik mekre him mir hir natip Akeldama. Him im hiram matip mar im: “Hemkre mekiuwe ti.”)

<sup>20</sup>q“Him mau tiwei nipaa Devit kewisim hiram Sam. Him im matip mar im,

‘Winak kirak kaku weinik, mitik hak ap kakwik ekite. Mitik hak kakikrehir kirak kakriak menmen nipaa hirak kiriakem.’

<sup>21-22</sup>r“Sis, haiu mamihimitan mitik hak kaktikewai mamwepyapir Mitik Iuwe Jisas hirak pike kekrit. Haiu mamihimitan mitik kerek kekitewai men ein nipaa Mitik Iuwe Jisas kekitewai haiu men me wi Jon kewepyapir him me God hirak kikir mit ere God keithis Jisas keyiyik ken wit kirak.” <sup>23</sup>Pita katip epei au, hir nehimitan mitikit wik. Josep kerek mit hir nekinaak Banabas o Jastas, hirak kekite Mataias. Hirakit wik keretet. <sup>24</sup>Hir nehimitan wik et, hir nitehi Mitik Iuwe God nar ik: “Mitik Iuwe ti epei hertei han ke mit yapirwe te ti eteiknai keimin ke mitikit wik it ti ehimitanek <sup>25</sup>hirak kakikrehir ke Judas. Judas hirak keweikin sip kewet menmen im me God hirak kaa epei ken wit kerek nipaa ti God ehimitanek hirak kaknori. Hirak kakikrehir kirak te hirak kakriak menmen kakir ke haiu mit aposel.” <sup>26</sup>Hir nitehi Mitik Iuwe God menmen nepei au, hir nen vot keimin kakikrehir ke Judas. Hir nen vot nepei au, hir nehimitan Mataias hirak kakikrehir ke Judas, hirak kaku kaktike mit aposel nar ke hiswiyen kiutip (11).

### God Himin Yaaik kekiuwe kan kau kekre mit

**2** <sup>1</sup>Mewaa meruri wi Pentikos epei man, kerek mit nererik newet God menmen ham me ni mir, mit kerek nises him me Krais hir nererik nau winak kiutip. <sup>2</sup>Hir nererik nau winak, wasenum menmen mesikeyaanmi meke nepni man mire yuwerep miniu ma mekre winak, hiram mesikeyaanmi (o mesikewari) wisenum meit winak mit newik. <sup>3</sup>Hiram mesikeyaanmi wisenum meit winak eik, hir mit en nir menmen mire si mekinen nin kike kike mau merer mit hiras yapirwe nau winak. <sup>4</sup>Hir yapirwe God Himin Yaaik kewi kinini naanmipror, hir natip him ham him ham hir netariyem, kerek God Himin Yaaik kenipi niutip niutip hir netpim.

<sup>5</sup>Me wi im mit ne weiwik miutip ne Isrel hir nises him me God nitiwekhi menmen, hir nau nerer wit wit, hir nan nau wit Jerusalem

<sup>p</sup> 1:18 Mt 27:3-10    <sup>q</sup> 1:20 Sam 69:25, 109:8    <sup>r</sup> 1:22 Jo 15:27    <sup>s</sup> 1:24 Jo 2:25    <sup>t</sup> 2:1 Lev 23:15-21; Diu 16:9-11    <sup>u</sup> 2:3 Mt 3:11    <sup>v</sup> 2:4 Ap 4:31, 10:44-46, 19:6; Mk 16:17

nanises menmen me wi Pentikos. <sup>6</sup>Mit yapirwe in hir nemtau menmen mesikeyaanmi (o mesikewari) meit winak ke aposel newik, te hir nesiuknen nan nererik, hir han kir kekrit kekrit kentar hir nemtau mit nises him me Krai natip him mir. <sup>7</sup>Hir nehinhin nemtau menmen im te hir natipan nar ik: “Mit in hir natip him maiu te hir ne Galili keriyen, <sup>8</sup>te haiu markeik haiu niutip niutip memtau him maiu me nipaa ein miye haai naiu netpim neit wit kauu eik? <sup>9</sup>\*Haiu mit yapirwe merer provins mar im em. Haiu ne wit Patia, Midia, Ilam, Mesopotemia, Judia, Kapadosia, Pontas, Esia, <sup>10</sup>Frisia, Pamfilia, wit iuwe Isip, wit me Libia menep Sairini. Haiu mit han ne wit iuwe Rom haiu mau in, <sup>11</sup>haiu mit han ne weiwik miutip me Isrel, haiu mit han au weiwik miutip ham. Haiu mit han ne wit Krit o Arebia, te haiu mit yapirwe memtau menmen iuwe God kiriakem kerek mit in hir netpaiyem neriuwe him maiu.” <sup>12</sup>Han kir katip te hir nitehiyan natip nar ik: “Mekam im hiram epei man?” <sup>13</sup>Au, mit han hir nitetnaan natip, “Mit in naam tipar si enum wain keremem, te hir netaritari.”

### Pita kewepyapir him me God

<sup>14</sup>Te Pita kekrit ketike mit aposel hiswiyen kiutip (11) hirak katip him iuwe katip kar ik: “Yi mit ne Judia yetike mit yi yau wit Jerusalem, yi nikip emnep eiymtau menmen im hi etpiyem me menmen im epei man. <sup>15</sup>Yi han kitet mit in hir naam tipar si enum hir netaritari. Hir au, hirak weni hekrit wepni kewep kan kerekek. Witaan te mit hir naam tipar si enum netaritari. <sup>16</sup>Menmen im yi yemtewem hiram menmen nipaa profet Joel hirak ketpim kar ik:

<sup>17</sup>“Hi God me wi kerek Mitik Iuwe Krai epei kaknen kaku ti, hi hirekes ariuwet Himin kai Yaaik kaknen mit yapirwe. Nikerek hirakit tetike nikerek hiram (o hiran) ni hir nanwepyapir him mai, yi mit pipep yi wen yepu yityaak, yi enun ye mit yi eiwaai eiityyak eiyr menmen mai. <sup>18</sup>Me wi ham im mit han nai o miyapir han nai hir niriak menmen mai hi eriuwet Himin kai Yaaik kaknen te hir nanwepyapir him mai.

<sup>19</sup>Me wi eim, hi ariak menmen nipaa yi yirem mau nepni o mau ti mar im au. Hi ariak si metike si tiwekre hemkre hiram mamnen.

<sup>20</sup>Wepni kakir au, wenke hirak kakweikinhis kakre yiwir menep wi yaaim Mitik Iuwe Krai pike kaknen ti ik.

<sup>21</sup>“Te mit miyapir niutip niutip kerek nenine Mitik Iuwe nanitehi Krai kakikepi, hirak kakikepi kaktorhis.” Profet Joel katip him im.

<sup>22</sup>“Yi mit ne Isrel yi eiymtau him im me Jisas ke Nasaret. Yi yertei Jisas kiriak menmen yaaim yapirwe, hirak kikaap mit his hit enum

<sup>w</sup> 2:7 Ap 1:11    <sup>x</sup> 2:9 2Ti 1:15    <sup>y</sup> 2:17 Joe 2:28-32    <sup>z</sup> 2:21 Ro 10:13    <sup>a</sup> 2:22 Jo 3:2

keriuwe menmen iuwe God kewetiwekem. God keteikni hirak keriuwet Jisas kan keriuwe menmen hirak kewis Jisas kiriakem, yi mit epei yirem. <sup>23 b</sup>Nipaa God kertei mekam mamnen te hirak han kitet te kaksiuwe Jisas kakno his me yi mit. Yi yeriyaak yeiyik yen yewis mit enun newenkekik kau nu tentarakit hirak kaa. <sup>24 c</sup>Hirak kaa, te God kikiak hirak kepu kesiupaneke kinaaiwir wit mit epei naa himin kir kewi. Hirak God kinin menmen menip mit nani hir han enuk nentar Jisas kaki kaku kakit taau. Au, God nipaa katip kakikiak Jisas kekre hei yink kirak ap te kakisine au. <sup>25 d</sup>Him me God nipaa Devit kewisim mau tiwei matip menmen im:

‘Hekrit hekrit hi hipir Mitik Iuwe menep. Hirak kau ketikewa te hi ap han kirira keriuwe menmen au.

<sup>26</sup> Hi han yaaik hentar menmen im. Menmen hi hetpim meteikin mit hi han yaaik. Hi hire mitik kerekek te hi han tokik ehu ehintar

<sup>27 e</sup>ti God ap ewis himin kai kaku wit ke mit naa himin kir kewi au. Ti ap ewisa hi Mitik kerek nipaa ti ehimitena hi hiriak menmen mit, ti ap ewisa hi hahi awaai akre herwe hei te yink kai kaknin taau.

<sup>28</sup> Ti epei heteikno menmen hi tewen ariakem te hi ehu ehit. Ti ehu etikewa te hi han yaaik wisenuk.’ Devit epei katip him im:

<sup>29 f</sup>‘Nai yinan hi hetpi menmen te yi eiyrteiyem me maam nipu kaiu Devit. Hirak kaa mit newisik kekre hei kiwaai keit. Haiu mertei hei kirak wen kiwaai ketike haiu mit, te him nipaa Devit kewisim hirak katip ke hirekes au, mitik hak. <sup>30 g</sup>Nipaa Devit wen kepu, hirak kire profet hirak kertei menmen maain God kakriakem kentar God ketpiwekem. God katip hirak kaknip nepenyek kirak hak hirak mitik iuwe king kire Devit, hirak kakinin haiu mit naanmamprai. <sup>31 h</sup>Devit hirak kertei menmen God kakriakem te hirak kewis him mau tiwei me Mitik God kehimitanek hirak Krai maain hirak kaki pike kakikrit. Hirak kewis him hiram matip:

‘Hirak God ap kinaiwirek keit wit ke mit hir naa himin kir kewi, hirak yink kirak kakisine au.’ <sup>32 i</sup>God epei kikiak Mitik ik Jisas pike kekrit kepu. Haiu mit in epei mirek. <sup>33 j</sup>God kikiak Jisas pike kekrit kau, hirak kau ketike God kinin naanmipre menmen yapirwe. God kewetiwek Himin Yaaik kar ke nipaa hirak ketpim, te in ek menmen yi yirem yemtewem hiram God Himin Yaaik hirak keriuwetek kan haiu mit, hirak kiriakem. <sup>34-35 k</sup>Devit hirekes ap ken wit ke God au, mitik hak. Devit kewis him mau tiwei hiram matip:

‘Mitik Iuwe God katip Mitik Iuwe kai Krai “Ti ehu menep etikewa ehinin naanmipre menmen ere hi enip mit enun nepan nanises

<sup>b</sup> 2:23 Ap 4:28; 1Pi 1:20    <sup>c</sup> 2:24 Ap 3:15    <sup>d</sup> 2:25 Sam 16:8-11    <sup>e</sup> 2:27 Ap 13:35

<sup>f</sup> 2:29 1Kin 2:10; Ap 13:36    <sup>g</sup> 2:30 2Sml 7:12; Sam 89:3-4, 132:11    <sup>h</sup> 2:31 Sam 16:10

<sup>i</sup> 2:32 Ap 13:36    <sup>j</sup> 2:33 Mk 16:19; Ap 1:4, 7:55-56; 1Pi 3:22    <sup>k</sup> 2:34 Sam 110:1

him mit.”’ <sup>36</sup> Pita wen katip kar ik: “Yi mit ne Isrel, yi eiyirtei menmen im werek werek. Mitik ik Jisas kerek yi yewenkekik kau nu tentarakit, God hirak kenipek hirak Mitik Iuwe hirak kehimitenek hirak Kraiss.”

**Mit miyapir hir neweikin han nises him me Kraiss, hir Aposel nikiri**

<sup>37</sup> Mit epei nemtau menmen Pita ketpim, him merekir han kir han enuk natip Pita kekite mit aposel han netpor nar ik: “Naiu yinan, te in ek haiu emriak mekam?”

<sup>38</sup> Pita kewenhi katip kar ik: “Yi yapirwe niutip niutip eiweikin sip eiwet menmen enum haiu mamikri yayikre tipar mamkine niuk me Jisas Kraiss te hirak kakisak menmen enum yi yiriakem te hirak kakweti God Himin Yaaik. <sup>39</sup> Nipaa God katip kaksiuwe God Himin Yaaik kaknen yi mit yaitike nikerek ni, mit yapirwe hir nau neit nerer wit wit kerek God kakninor hir nanisesik.”

<sup>40</sup> Pita ketpor him ham yapirwe kari han kir keriuwerem, hirak katip kar ik: “Yi eikaap hiras einepin eikepin menmen enum mamnen mamnep mit enun in nipaa nenep Jisas.” <sup>41</sup> Mit yapirwe hir nemtau him Pita ketporem te hir newisi nikiri. Me wi im e God kari 3,000 mit hir netike mit aposel hir nises him me Kraiss.

**Menmen yaaim mit ne weiwik miutip me God niriakem**

<sup>42</sup> Mit in han kir kekrit hir hanhan nemtau him me mit aposel, hir netike mit nau han kiutip nikaapan, hir nekiyan naam menmen han tewenin menmen Jisas kiriakem, hir nekiyan nitehi God me menmen. <sup>43</sup> Mit aposel hir niriak menmen yaaim yapirwe nikaap mit ninap hir nire yaain te mit yapirwe hir han kekrit neriuwe menmen. <sup>44</sup> Mit kerek hir nises him me Kraiss hir nekiyan nau neit, hir han kitet menmen yapirwe hir netenenim, hiram me mit, hiras au. <sup>45</sup> Hir nesiuwe ti mir o menmen mir nanit nan mererim. Hir neit pewek im hir nenkerem newet mit neimin netenen pewek au, hir neiyim nen nanit menmen. <sup>46</sup> Hekrit hekrit hir nen nekiyan nau niutip neit winak iuwe ke God keit Jerusalem, hir nekiyan nau naam menmen nerer winak mir han tewenin menmen Jisas kiriakem. Hir han yaaik naam menmen mir. <sup>47</sup> Hir newenipi niuk me God, hir mit han yaaik neriuweri. Hekrit hekrit Mitik Iuwe God kari han ke mit hir nisesik, te hir nererik nekiyan nau neit neriuwe mit kerek hir ninin nises God.

---

<sup>1</sup> 2:36 Ap 5:30-31    <sup>m</sup> 2:37 Lu 3:10, 12; Ap 16:30    <sup>n</sup> 2:38 Lu 24:47; Ap 3:19    <sup>o</sup> 2:39 Ais 57:19    <sup>p</sup> 2:40 Diu 32:5; Fl 2:15    <sup>q</sup> 2:41 Ap 2:47, 4:4, 5:14    <sup>r</sup> 2:42 Ap 20:7    <sup>s</sup> 2:43 Ap 5:11-12, 6:8    <sup>t</sup> 2:44 Ap 4:32-35    <sup>u</sup> 2:46 Lu 24:53    <sup>v</sup> 2:47 Ap 2:41, 6:7, 11:21, 24

**Mitik hak hit enum Pita kekite Jon tekepir hirak kire yaaik**

**3** <sup>1</sup>Wi ham hinkewi Pita ketike Jon tariyakit ten winak iuwe ke God. Hinkewi in ek mit nererik nitehi God menmen. <sup>2</sup>Mitik hak kerek hit enum nipaa miye winaak ere in, hekrit hekrit mit ninanek newisik kau menep ya weipir niuk mirak “Yaaim” hiram ya weipir ham me winak iuwe ke God, hirak kau en kitehi mit miyapir kerek nanino nimin hirak ketpor hir nanwetiwewek pewek mei me menmen. <sup>3</sup>Hirak kir Pita ketike Jon epei tatno winak nimin ein, hirak kitiwekithi ke pewek mei ke menmen. <sup>4</sup>Hirakit tirapiriwewek, Pita ketpiwewek kar ik: “Ti erawir.” <sup>5</sup>Hirak mitik kikiamnaan kiret hirak han kitet kar ik: “Hirakit tatweto menmen.” <sup>6</sup>Pita ketpiwewek kar ik: “Hi hetenen pewek mei au, te menmen hi heteninem hi ewetutem. Hi hetput ekrehir ke Jisas Kraiss nipaa ke wit Nasaret, ti ekrit eke ti eno.” <sup>7</sup>Hirak katip epei au, hirak ketenen his yaaaim mirak keriyaaik kekrit kerp. Wasenum hit metike hitpar mirak mire yaaaim. <sup>8</sup>Hirak kehin kekrit kerp hirak keke ti ketikeret ten winak ke God. Hirak keke ti, kehin kiniu ketikir kewenipi niuk me God. <sup>9</sup>Mit yapirwe en nirek keke ti kewenipi niuk me God. <sup>10</sup>Hir nertei hirak mitik hit enum kerek nipaa kau ya weipir niuk mirak “Yaaim” ke winak iuwe ke God, hirak hekrit hekrit kitehi mit me menmen. Hir nerteiyek te hir nehinhin han kitetim nar ik: “Mekam epei man mekepek te hirak kire yaaik?”

**Pita keit winak iuwe ke God kewepyapir menmen God kiriakem**

<sup>11</sup>Mitik ik nipaa hit enum kewen Pita ketike Jon, mit yapirwe nitehiyan menmen im nehinhin nepirpir nesiukin nen winak hinp niuk mirak “Hinp ke Solomon.” <sup>12</sup>Pita kir menmen ik hirak kewenhi mit ketpor kar ik: “Yi mit ne Isrel. Yenmak yi yehihin yentar menmen im? Yi yenmak te yi yirapirawir han kitet hawir yaaikit wiriak menmen im meriuwe menmen iuwe mawir te mitik ik nipaa hit enum hirak kire yaaik? <sup>13</sup><sup>b</sup>Hirak God ke maam nipu kiau Ebrahim, Aisak, Jepok, hir netike maamrer niau nipaa hir nikaru nepu, hirak kenip Mitik Jisas kerek kiriak menmen mirak, kenipek hirak Mitik luwe. Yi epei yeriuwetek ken mitik iuwe gavman Pailat, hirak kinin naanmiprai hiau mit mau wit Isrel, hirak hanhan kare kaksipuan Jisas te yi yeweikin sip yewetiwewek yatip Jisas hirak mitik enuk. <sup>14</sup><sup>c</sup>Yi epei yeweikin sip yewet Mitik Yaaik kerek God kehimitanek hirak kises him mirak. Yi au hanhan mitik iuwe Pailat kaksipuan mitik enuk nipaa kenep mitik kaa, hirak ken yi mit, <sup>15</sup><sup>d</sup>te yi

<sup>w</sup> 3:1 Ap 10:3, 9, 30    <sup>x</sup> 3:2 Jo 9:1; Ap 14:8    <sup>y</sup> 3:4 Ap 14:9    <sup>z</sup> 3:6 Ap 3:16, 4:10, 16:18    <sup>a</sup> 3:8 Ap 14:10; Jo 5:14    <sup>b</sup> 3:13 Eks 3:6, 15; Mt 22:32; Ap 2:23, 7:32; Lu 23:13-25  
<sup>c</sup> 3:14 Mk 15:6-15    <sup>d</sup> 3:15 Ap 1:8, 2:32, 4:10, 5:30

yenep mitik hirak keteikin mit menmen mamkepi te hir nanu nantike God. Au, yi yakip kaa te God kikiak Jisas pike kekrit kepu. Hawir epei wirek. <sup>16</sup>Hawir wises him me Jisas te menmen iuwe me Jisas kenip mitik ik, kerek yi yerteiyek, hirak yaaik. Jisas hirak kenip mitik ik yaaik kentar hirak kekepai haiu misesik te menmen iuwe mirak man mikaap mitik ik te yi epei yipirek, hit mirak tokim meit.

<sup>17</sup><sup>e</sup>In ek nawir yinan, hi hertei yi yetike mit iuwe ninini naanmipri yiriak menmen im enum yenep Jisas yentar yi yetari hirak keimin. Yi han kitet hirak mitik kerekek. <sup>18</sup><sup>f</sup>God nipaa enum eik kenip mit profet hir newis him mau tiwei, hir newepyapir Mitik God kehimitanek hir mit han mit naniwaankek. God kiriak menmen im epei man meriuwe menmen enum yi nepei yiriak Jisas em.

<sup>19</sup><sup>g</sup>Yi eiweikin sip eiwet menmen enum, yi eiyses God hirak kakisak menmen enum yi yiriakem. <sup>20</sup>Te Mitik Iuwe kakweti menmen kaknip han ki kaku werek werek, hirak kakriuwet Mitik hirak kehimitanek hirak kaku kaktikewi. Mitik ik hirak Jisas. <sup>21</sup>Hirak eku ekit wit ke God ere wi mamnen God kaknip menmen pike mamre yaaim. Nipaa God katip mit profet me menmen im te hir newisim mau tiwei newepyapirem.

<sup>22</sup><sup>h</sup>“Nipaa Moses hirak katip kar ik: ‘God hirak Mitik Iuwe kakit mitik kiutip ke weiwik mi, hirak kakwisik kakre mitik profet kaksuwerek kakwepyapir menmen me God kakir ke hirak keriuweta hi han. Yi nikip emnep eiymtau him hirak ketpiyem. <sup>23</sup>Mit kerek nemtau him mirak nisesim au, hirak God kakpiri ne weiwik me Isrel kaknip nani.’ <sup>24</sup>Nipaa mit profet yapirwe hir newepyapir him me God. Samyuel kekite profet hir nikaru nekrehir ke Moses, hir natip me wi im e. <sup>25</sup><sup>i</sup>Him God ketpim kewet mit profet em, hir newepyapirem hiram me yi mit in. Yi eiwit menmen nipaa God katip kakwet maamrer ni em. Nipaa hirak katip Ebrahim kar ik: ‘Hi eriak yaaim me mit yapirwe nau ti heriuwe nepenyek kit.’ <sup>26</sup><sup>j</sup>Te God kehimitan mitik kiriak menmen mirak hirak kinin ken yi mit ne weiwik me Isrel kerekyi yaaim kenip yi mit niutip niutip yeweikin sip yewet menmen enum.”

#### Mit iuwe newis Pita kekite Jon tekre winak enuk

**4** <sup>1</sup><sup>k</sup>Pita kekite Jon wen terp en hirak Pita wen katip mit menmen, te mit pris kerek newet God menmen me mit, hir netike mitik iuwe kepten ke polis kerek naanmipre winak ke God, hir netike mit ne Sadyusi kerek han kitet mit naa hir pike nankrit nanu au, hir nan nanithis Pita ketike Jon. <sup>2</sup><sup>l</sup>Hir nine han enuk neriueret nentar hirakit tewepyapir him tatip mit em, hirakit tatip Jisas kaa hirak pike kekrit kepu te mit

<sup>e</sup> 3:17 Lu 23:34; 1Ti 1:13 <sup>f</sup> 3:18 Lu 24:27, 44, 46 <sup>g</sup> 3:19 Ap 2:38 <sup>h</sup> 3:22 Diu 18:15, 18-19; Ap 7:37 <sup>i</sup> 3:25 Jen 22:18; Ga 3:8 <sup>j</sup> 3:26 Ap 13:46 <sup>k</sup> 4:1 Lu 22:4, 52 <sup>l</sup> 4:2 Ap 23:8



hir nisesik hir nani, maain hir pike nankrit nanu. <sup>3</sup>Hir netiwekithis ne hinkewi newisikit tekre winak enuk teit in ere wanewik. <sup>4</sup>Te mit yapirwe nemtau him me God Pita ketpim, hir nisesim. In ek, mit neit Jerusalem hir nises him me God, hir nar ke 5,000.

### Mit iuwe kotim Pita kekite Jon teit winak ke kaunsil

<sup>5</sup>Wanewik, mit iuwe pris netike mit iuwe ne kaunsil netike mit ninin nertei him lo me Moses, hir nererik neit Jerusalem. <sup>6</sup>Hir netike Anas, kerek kinin naanmipre mit pris, hirak ketike Kaiafas, Jon, Aleksanda tekite mit yapirwe ne weiwik me mitik iuwe Anas, hir nan nererik nau winak iuwe eik. <sup>7</sup>Hir nari Pita ketike Jon neiyit nan newisikit terp nimin, hir nitiwekithi nar ik: “Keimin kekepi te yi epei yenip mitik hit enum hirak kire yaaik? Yi yekine niuk me keimin te yi yekepi?”

<sup>8</sup>God Himin Yaaik kan kau kekre han ke Pita te hirak ketpor kar ik: “Yi mit iuwe yinin naanmipre haiu mit ne Isrel yetike yi mit iuwe ne Kaunsil, <sup>9</sup>yi yare yitawirhi me menmen yaaim hawir wenip mitik ik hit mirak enum. Yi hanhan yayirtei markeik te hawir wenipmitik ik kire yaaik. <sup>10</sup>Hi hatip te yi mit in yetike mit yapirwe ne wit kiau Isrel yi eyirtei te mitik ik kerp ninaan mi hirak kire yaaik keriuwe menmen iuwe me Jisas Krai nipaa ke wit Nasaret kerek yi yewenkekik kau nu tentarakit hirak kaa, te God kikiak pike kekrit kepu. <sup>11</sup>Him me God mau tiwei matip tok piksa me Jisas mar im.

‘Hirak kire teinik yaaik, te yi mit yime winak yi yineinik yi han kitet hirak enuk yi yepirek. Yi yepirek te God hanhanek kenipek hirak kire teinik mitik hirak ketenen winak siup.’ <sup>12</sup>Hirak kerekek kakikaap mit ne ti. Neiyen taau. Haiu mit ne ti merer wit wit God ap kewetai niuk ham te haiu emisesik te hirak kaktaihis taau. Jisas Krai kerekek.”

<sup>13</sup>Hir epei nemtau Pita ketike Jon hirakit tatip him iuwe hirakit tinaain au, hir nertei hirakit ten skul au, hir han kekrit kekrit me menmen im. Hir nertei nipaa hirakit tau tekite Jisas. <sup>14</sup>Hir hanhan netpiwekit menmen enum neneret te hir nir mitik kerp ketikeret hirak kire yaaik te hir nekintip nerp neit. <sup>15</sup>Hir nekintip nerp neit o, hir netpiwekit tatno witeik tinaaiwir haau hir newim. Hirakit tatno. Nepei au, hir mit ne kaunsil hir natipan natip nar ik: <sup>16</sup>“Haiu mamriak mitikit it mekam? Mit yapirwe nau wit Jerusalem epei nertei mitikit wik hirakit tiriak menmen ik yaaik te haiu ap mepakinet taau. <sup>17</sup>Haiu emitpiwekit emneret hirakit ap tatwepyapir him me Jisas tatip mit em te menmen im me Jisas mamno

<sup>m</sup> 4:3 Ap 5:18    <sup>n</sup> 4:4 Ap 2:41, 5:14    <sup>o</sup> 4:7 Mt 21:23    <sup>p</sup> 4:8 Mt 10:19-20; Ap 7:55

<sup>q</sup> 4:10 Ap 3:6, 13-16    <sup>r</sup> 4:11 Sam 118:22; Mt 21:42; 1Pi 2:4, 7    <sup>s</sup> 4:12 Mt 1:21    <sup>t</sup> 4:16 Jo 11:47    <sup>u</sup> 4:17 Ap 5:28-29, 40

mit han au emit!”<sup>18</sup> Hir natipan epei au, hir neniniwekit neriyaakit tan, hir netpiwekit him manp te hirakit ap tatwepyapir tatip mit him me Jisas.

<sup>19</sup>Au, Pita ketike Jon tewenhi tetpor tar ik: “Yi han ekitet God hirak han kitet mekam yaaim hawir ewisesim. Him mi o him mirak. <sup>20</sup>Te hawir ewepyapir menmen hawir wirem, menmen hawir wemtau hirak ketpim. Hawir wekintip au.”

<sup>21</sup>Mit ne kaunsil wen netpiwekit him manp neneret. Nepei au, hir neriuwetet ten wit eik. Hir ap ninapin menmen enum te hir naksip nentar mit yapirwe newenipi niuk me God me menmen hirakit tiriakem. <sup>22</sup>Mitik kerek hirakit tekepik hirak kire yaaik, hirak kinin 40 tito kau ti.

**Mit nises him me Krai nitehi God kakikepi  
ap ninaain newepyapir him mirak**

<sup>23</sup>Hir neriuwetet ten epei au, Pita ketike Jon pike ten nirakit yinan tetpor menmen mit iuwe pris netike mit iuwe ne kaunsil netpim. <sup>24</sup>Hir nemtewek epei au, mit hir nitehi God natip nar ik: “Mitik iuwe God ti epei hewis nepni mekite ti, wan eik, menmen yapirwe mewim. <sup>25</sup>”Nipaa Himin kit Yaaik hirak kenip maam kau Devit kewis him mau tiwei hiram matip mar im:

‘Nenmak mit ap ne weiwik me Isrel hir han enuk wisenuk? Nenmak hir nimenipin natip weinim me naninep Mitik Iuwe God.

<sup>26</sup> Mitik Iuwe kinin naanmipre mit nerer wit wit hir neit yipo henmik nopen menmen mir hir nan nererik naninep Mitik Iuwe God ketike Mitik hirak kehimitanek hirak Krai.’

<sup>27</sup>”<sup>x</sup>“Menmen epei man. Mitik iuwe gavman King Herot ketike mitik iuwe gavman Pailat hirakit tetike mit ne weiwik me Isrel mit han au, ne weiwik ham, hir yapirwe nimoryipir neit wit Jerusalem nenep mitik yaaik kiriak menmen mit kerek nipaa ti ehimitanek hirak Krai. <sup>28</sup>”Hir nererik niriak menmen mar ke nipaa ti hanhan heriuwe menmen mit iuwe enipem hiram mamnen. <sup>29</sup>”Te in ek Mitik Iuwe God ti emtau menmen enum hir netpaiyem me hir nanwep. Ti ekepai haiu ap minaain te haiu mamtip mit miyapir him yaaim me Jisas. <sup>30</sup>Ti eteikin mit iuwe enun ti enip mit hir ninap o his hit enum ti enipi hir enire yaain, ti ekepai haiu emnip menmen yaaim emikrehir ke mitik Jisas hirak kiriak menmen mit.”

<sup>31</sup>”Hir nitehi God menmen epei au, haau ke winak hir nererik nau neit nimin ein, hirak kitanik, God Himin Yaaik kan kau kekere han kir kekepi te hir newepyapir him yaaim me God hir ap ninaain au.

---

<sup>v</sup> 4:24 Eks 20:11; Nia 9:6; Sam 146:6    <sup>w</sup> 4:25 Sam 2:1-2    <sup>x</sup> 4:27 Mt 27:1-2; Lu 23:7-11; Ap 3:13    <sup>y</sup> 4:28 Ap 2:23    <sup>z</sup> 4:29 Ef 6:19    <sup>a</sup> 4:31 Ap 2:4

### Mit nises him me God hir nekiyan nau han kiutip

<sup>32</sup><sup>b</sup>Mit yapirwe hir nises him me God nekiyan nau han kiutip. Mitik kiutip kari pewek menmen au. Hir mit yapirwe han kitet nare menmen me mit niutip niutip hiram menmen me haiu mit yapirwe. <sup>33</sup><sup>c</sup>God kikaap mit aposel keriuwe menmen mirak iuwe te hir natip werek werek newepyapir him me Jisas hirak kaa God kikiak pike kekrit kepu. Mit yapirwe han kitet hir yaain iuwe. <sup>34</sup><sup>d</sup>Mitik kiutip ke mit in yapirwe hirak ap mitik ketenen menmen auri me menmen yapirwe au. Neimin hir netenen ti o winak hir nesiuwerem nanit pewek mererim te hir neit pewek neiyim nan <sup>35</sup>newet mit aposel em te hir nenkerem newet mit miyapir netenen menmen au hir newetir em te hir nau werek werek. <sup>36</sup><sup>e</sup>Me wi im, mitik kiutip niuk mirak Josep hirak ke weiwik me Livai, hirak nipaa miye pirak winaak keit wit Saipras kerek wan kimaak keketik, hirak kepu ketike mit en. Aposel nekine niuk mirak ham me him Grik Banabas. Niuk im hiram matip mar im: “Mitik kikaap mit nises him me God.” <sup>37</sup>Hirak kerekek kesiuwe ti mirak ham keit pewek mererim keiyim kan kewet mit aposel em.

### Him me Ananaias ketike mite pirak Sapaira

**5** <sup>1</sup>Banabas hirak kewet mit aposel kewetir pewek kenemtin me ti mirak te mitik hak au. Niuk mirak Ananaias. Hirak mite pirak Sapaira. Hirak kesiuwe ti mirak ham keit pewek mererim. <sup>2</sup><sup>f</sup>Te hirak kenke meiyaam pinam kisawinem, hirak kewet mit aposel pinam hirak ketpor kar ik: “Pewek im hi ewetiyem hiram keremem. Hi ap etenen meiyam au.” Mite pirak epei wertei han kirak hire watip: “Hiram werek.” <sup>3</sup><sup>g</sup>Pita kitiwekhi kar ik: “Ti henmak te ti hewis Seten kari han kit te ti hewisis God Himin Yaaik ti epei henke ham pinam hisawinem? <sup>4</sup><sup>h</sup>Nipaa ti etenen ti hiram mit. Ti epei hesiuwerem heit pewek mererim, hiram mit. Ti henmak te ti han kitet hiriak menmen enum mar im hisawin pewek pinam. Ti ap hewisisai haiu mit keriyen meriuwerem au. Ti hewises God ek.” <sup>5</sup><sup>i</sup>Ananaias kemtau him im epei au, hirak kenkewin kaa. Hirak kenkewin kaa, mit kerek nemtau menmen im hir nepirpir iuwe. <sup>6</sup>Hir nepirpir iuwe, hir mit pipep neit laplap neiyim nan nesenkekik keriuwerem hir neiyik nen newisik kekre hei.

<sup>7</sup>Maain, mite pirak wetari menmen im epei man, te hire wan in. <sup>8</sup>Pita kitiwehi kar ik: “Ti hetike mitik kit yi epei yeit nan im keremem me ti yi yesiuwerem o?” Hire wewenhi watip war ik: “Keremem.” <sup>9</sup><sup>j</sup>Pita ketpiwe kar ik: “Ti hetike mitik kit yi yenmak te yi han kitetan yi yewenin him

<sup>b</sup> 4:32 Ap 2:44   <sup>c</sup> 4:33 Ap 2:47   <sup>d</sup> 4:34 Ap 2:45   <sup>e</sup> 4:36 Ap 11:22-26, 13:2-3   <sup>f</sup> 5:2 Ap 4:34-35   <sup>g</sup> 5:3 Jo 13:2   <sup>h</sup> 5:5 Ap 2:43   <sup>i</sup> 5:9 1Ko 10:9

God Himin Yaaik te hirak kakyiwep au? Mit kerek epei newis mitik kit kekere hei, hir pike naninen nantuthis nanrit nanino.”<sup>10</sup> Hirak katip epei au, mite ip e hire wenkewin waa. Wenkewin waa, pipep nan nimin in nirep hire waa, te hir ninanep neiyip nen newisiye wiwaa menep hei ke mitik kire.<sup>11</sup> Mit ne weiwik miutip me God kerek nises him me Krais neit Jerusalem netike mit han kerek nemtau menmen im, hir nepirpir wisenum.

**Mit aposel niriak menmei menmei yaaim mirakel  
nikaap mit enun ninap o his hit enum**

<sup>12</sup> Mit aposel niriak menmen yaaim mirakel mekre nimin ke mit neiyim nikaap mit neriuwerem. Mit yapirwe kerek nises him yaaim me Krais hir nererik nau han kiutip neit winak iuwe ke God neit pinak niuk mirak “Hinp ke mitik Solomon.”<sup>13</sup> Mit kerek ap nises him me Krais hir ninapen netikeri nau nererik, te hir han kiteti hir mit yaain.<sup>14</sup> Mit miyapir yapirwe neweikin sip newet menmen enum nises God, hir nererik netike mit miyapir nipaa nises God.<sup>15</sup> Mit neit ein nir menmen yaaim aposel niriakem, te hir neit mit ninap neri nen newisi niwaa wit eik nentar yeno te Pita keke ti kakno in o ein kakwis his mamintar mit ninap o au en wepni kir kenep himin kirak kentar mit ninap te hir nanre yaain.<sup>16</sup> Mit yapirwe nerer wit wit menep Jerusalem hir ninan mit ninap netike mit herwe enum manip mekreri han kir ken sip te hir neri nan te Pita kekepi hir yapirwe niutip niutip nire yaain.

**Ensel kikaap mit aposel ninaaiwir winak enuk**

<sup>17</sup> Mitik iuwe hetpris ketike mit han kerek niriak menmen netikerek, hir netike mit ne Sadyusi kerek han kitet mit nani pike nanikrit au. Hir yapirwe han mekpep neriuwe mit aposel nentar menmen hir niriakem<sup>18</sup> te hir nen netorhis newisi nekre winak enuk me nanamir ke mit yapirwe.<sup>19</sup> Hir newisi nekre winak enuk nepu nepeit, te Ensel ke God ke witaan kan kikaisiu wepir ke winak enuk keriyei nen wit eik ketpor kar ik: <sup>20</sup> “Yi eino eiyirp winak iuwe ke God eitip mit miyapir him me hir enises menmen ham yaaim hir nanu werek.”<sup>21</sup> Hir nemtau him mirak epei au, wanewik mit aposel nen nekre winak iuwe ke God natip mit miyapir him yaaim. Me wi im, mitik iuwe hetpris ketike mit kerek niriak menmen netikerek hir nenine mit iuwe ne Isrel netike mit han ne Kaunsil hir nererik nau winak nemtau him. Hir nau en, hir nesiuwe mit nanino winak enuk te nantihis naninen.<sup>22</sup> Hir nen ein te hir ap niri nekre winak enuk au, te hir pike nan natip nar ik: <sup>23</sup> “Hiau men miun winak enuk epei

<sup>j</sup> 5:12 Ap 2:43, 14:3    <sup>k</sup> 5:14 Ap 2:41, 21:20    <sup>l</sup> 5:16 Ap 19:11-12    <sup>m</sup> 5:17 Ap 4:1-3, 6  
<sup>n</sup> 5:19 Ap 12:7-10

au, haiu mir weipir nepei au nekepetek kik (o pes enum keit), mit nerp weipir naanmiprewek te haiu mikaisiu weipir minmatin mit hir nepu au.”

<sup>24</sup>Kerek mitik kinin naanmipre mit plisman ke winak iuwe ke God hirak ketike mit iuwe pris nemtau menmen im, hir han kitet karkeik te hir netpaan nen wit eik. <sup>25</sup>Hir wen han kitet menmen im mitik hak kan katip kar ik: “Nikip emnep eiyimtau menmen im. Mit kerek nipaa yi yewisi nekre winak enuk hir nau neit winak iuwe ke God newepyapir menmen natip mit miyapir em.” <sup>26</sup>Hirak katip epei au, mitik kinin naanmipre plisman ketike mit plisman nirak epei nen ein netorhis neri nan. Hir nanip au nentar hir ninaain mit yapirwe en nanwir nan naninip.

### **Mit aposel hir ap ninaain newepyapir him me God neit winak ke kaunsil**

<sup>27</sup>Hir netorhis neri nan newisi nerp nekre nimin, mit ne kaunsil neweiknor, mitik iuwe pris kinin pris han, hirak kitorhi kar ik: <sup>28</sup>“Nipaa haiu metpi him manp yi ap yewepyapir him me Jisas nepei ketpim te yi epei yatip him im merer wit wit ere mit yapirwe ne Jerusalem epei nemtewem nenepim. Yi hanhan yaitip haiu mit in menep Jisas hirak kaa.”

<sup>29</sup>Pita ketike aposel han newenhi natip, “Haiu emises him mi au, him me God keremem. <sup>30</sup>Yi epei yenep Jisas hirak kaa kentar nu tentarakit te God ke maamrer nau nipaa ein naa, hirak kikiak Jisas hirak pike kekrit kepu. <sup>31</sup>God kikiak keriyaak kan ketikerek tau. Hirak kau menep his yaaim kerek mit iuwe newiyen. Hirak kire mitik iuwe kinin mit hirak kakikaap mit ne Isrel te hir enweikin sip enwet menmen enum te hirak kakisak menmen enum hir niriakem. <sup>32</sup>Haiu mewepyapir menmen im. Himin Yaaik kerek God kewet mit ek te hir nisesik, hirak kewepyapir menmen im.”

### **Mitik Gameliel katip kaunsil te hir ap naninep mit aposel nani au emit**

<sup>33</sup>Mit ne kaunsil nemtau him im nepei au, hir nine han enuk wisenuk hir han kitet naninep aposel naninip naninepi. <sup>34</sup>Au, mitik kiutip ke kaunsil niuk mirak Gameliel hirak mitik ke Farisi kerek hir ninin nises him lo me Moses, hir mit han kitet hirak iuwe, hirak kerp ninaan me kaunsil katip mit hir nansiuwe aposel nanino wit eik nanino nanikre haau ham. <sup>35</sup>Hir epei nen wit eik, hirak katip mit ne kaunsil kar ik: “Yi mit ne weiwik me Isrel. Yi han ekitet werek werek menmen yi hanhan yairiak mit in em. <sup>36</sup>Nipaa mitik Tiudas kekrit katip hirak mitik iuwe,

---

° 5:26 Mt 14:5    P 5:28 Ap 4:18; Mt 27:25    ¶ 5:29 Ap 4:19    † 5:30 Ap 3:15    \* 5:31 Ap 2:33-34; Ef 1:20; Hi 2:10, 12:2    † 5:32 Ap 1:8    † 5:33 Ap 7:54    † 5:34 Ap 22:3  
 † 5:36 Ap 21:38

te mit 400 nererik nisesik. Au, mit nakip kaa te mit nipaa nisesik noknin nanino. <sup>37</sup>\*Me wi nipaa mit newis niuk me mit yapirwe mekre tiwei me gavman, mitik Judas ke wit iuwe Galili kari han ke mit hir nisesik te hir mit han nakip kaa, mit kerek nisesik hir noknin nanino. <sup>38</sup>Te in ek hi hetpi me menmen me mit in. Yi ap eiriak enum me mit in au, eiwisi enit. Menmen im hir nisesim hiram han ke mit keremem te hiram mami mamit. <sup>39</sup>Au en, menmen im God hirekes kiriakem, te yi ap eiynin mit in me menmen au, eiyyantar yi eiyyartei yi yetike God yenepan hirak kakikepi.” Hirak katip epei au, mit ne kaunsil nises him mirak.

### Mit aposel hir han yaaik mit nerekyor enum nentar hir ne Kraiss

<sup>40</sup>YHir nesiuwe mit nen neithis aposel neri nan, hir natip plisman nanip neriuwe nipin. Hir nanip neriuwe nipin, hir neriuweti nen netpor him manp te hir ap pike nantip mit him kerek nipaa Jisas epei ketpim, au meit. <sup>41</sup>zAposel ninaaiwir winak ke kaunsil han yaaik nentar hir nertei God han kitet hir yaain te hir mit han nanip nentar hir nises him me Jisas. <sup>42</sup>“Hekrit hekrit neit winak iuwe ke God kekite winak ke mit hir wen natip mit miyapir him yaaim me Jisas kerek hirak Mitik God kehimitanek kakikaap mit nantike God nanu.

### Hir nehimitan mit hispinak wik (7) nikaap mit aposel

**6** <sup>1</sup>bMaain wi ham, mit nises him me Kraiss hir nire yapirwe. Mit nises him me Kraiss kerek natip him Grik, hir nemtaantiwo neriuwe mit nises him me Kraiss hir natip him Hibru. Mit natip him Grik hir natip nar ik: “Mit ap newet miyapir han kerek mikaan nir naa epei ninaiwiri, mit han ap nekepi newetir menmen ninpin werek au.” <sup>2</sup>Te mit aposel hiswiyen wik (12) nenine mit yapirwe nises him me Kraiss netpor nar ik: “Hiau mit aposel emwet mit miyapir pewek me ninpin menmen meiyam te hiau ap mewepyapir him me God au emit. <sup>3</sup>“Te nau yinan yi yinyatin mit hispinak wik (7) hir mit yaain God Himin Yaaik kau han kir hir nertei menmen werek werek hiau mehimiteni hir naanmipre menmen im. <sup>4</sup>Hir enriak menmen im te hiau mehimitan hiras hiau hekrit hekrit mitehi God menmen, hiau matip mewepyapir him me Kraiss.”

<sup>5</sup>“Mit miyapir yapirwe hir han yaaik neriuwe him me mit aposel te hir nehimitan mit hispinak wik (7). Hir nehimitan Stiven, hirak mitik kises him me God iuwe, God Himin Yaaik kau kekere han kirak iuwe. Hir nehimitanek kekite Filip, Prokoras, Naikena, Taimon, Pamenas, hir netike Nikolas, kerek nipaa ke wit Antiok. Hirak ap ke weiwik me Isrel te hirak nipaa keweikin sip kewet menmen enum kises him me Moses. <sup>6</sup>“Hir neit

\* 5:37 Lu 2:1-2    y 5:40 Ap 4:18    z 5:41 Mt 5:10-12; 1Pi 4:13    a 5:42 Ap 9:22, 17:3

b 6:1 Ap 4:35    c 6:3 1Ti 3:7    d 6:5 Ap 8:5    e 6:6 Ap 13:3, 14:23

mit in neriyei neri nen mit aposel. Hir nitehi God ke mit in, hir ner neit mit in neriyei neri nen mit aposel. Hir nitehi God ke mit in, hir newis his mau paan kir niutip niutip nehimiteni niriak menmen hir nipaa netpim. <sup>7f</sup>Mit miyapir neiyapirwe neit Jerusalem nemtau him me Kraiss, hir nisesim. Mit pris hir newet God menmen me mit, hir yapirwe nises him yaaim me Kraiss.

### Mit han ne Isrel neithis Stiven neriyaak neiyik nen kaunsil

<sup>8g</sup>Hirak Stiven kerek kises him me Kraiss, God kerekikewek yaaim, kewetikewek menmen iuwe mirak te hirak kiriak menmen yaaim mirakel kikaap mit kerek hir ninap o menmen yapirwe manip te hir nire yaain. <sup>9</sup>Te mit han netikerek nenehan. Mit in hir ne winak kerek mit nererik nekine him me Moses nekrerek. Niuk me winak ik hiram Friman kentar mit nipaa nepu enum niriak menmen nanit pewek mererim au, te in ek hir ninaaiwir menmen im. Mit in hir ne wit Sairini, wit Aleksandria, Silisia ketike provins Asia, hir netike Stiven nenehan. <sup>10h</sup>Hir nenehan te God Himin Yaaik kikaap Stiven hirak kertei menmen wisenum te mit en ap natip menmen nininek taau. <sup>11i</sup>Hir han enuk newet mit han pewek te hir nan newepyapir Stiven natip nar ik: “Haiu memtewek hirak katip enum me Moses ketike God.” <sup>12</sup>Mar im hir nari han ke mit yapirwe hir han enuk hir netike mit iuwe ne kaunsil netike mit ninin nertei him lo me Moses hir nan netiwekhis neriyaak neiyik nen winak ke kaunsil. <sup>13j</sup>Hir neithis mit han nan nemitiwekpin natip nar ik: “Hekrit hekrit mitik ik hirak katip enum me winak iuwe ke God ik ketike him lo me Moses. <sup>14</sup>Haiu memtau hirak katip Mitik Jisas ke Nasaret kakwen winak iuwe ke God ik e kaknip haiu mit emises him ham me him nipaa Moses kewisim kewetaiyem.” <sup>15</sup>Mit yapirwe neit winak ke kaunsil nirapire Stiven nir ninaan mirak hiram mire ninaan ke mitik ensel ke wit ke God, hiram merhihe.

### Stiven katip mit ne kaunsil him mirak

**7** <sup>1</sup>Mitik iuwe hetpris kinin mit pris han, hirak kitehi Stiven kar ik: “Menmen mit in netpaiyem nipaa ti hetpim o au?”

<sup>2k</sup>Stiven kewenhi ketpor kar ik: “Nai yinan yetike haairer, yi eiyimtau him mai. Nipaa enum eik Ebrahim hirak maam nipu kau ken wit Heran wen au, hirak kepu wit Kaldia, God hirak yaaik kerhihe kewepyapir hirekes <sup>3</sup>katip Ebrahim kar ik: ‘Ti enaaiwir wit kit ik e, haairer, paaprer nit, ti eno ti hak hi tewen ateknutek.’ <sup>4</sup>Hirak katip epei au, Ebrahim kinaaiwir wit ke mit ne Kaldia ken kau wit Heran. Hirak kau en ere haai

<sup>f</sup> 6:7 Ap 2:41, 16:5   <sup>g</sup> 6:8 Ap 2:43   <sup>h</sup> 6:10 Lu 21:15   <sup>i</sup> 6:11 Mt 26:59-61   <sup>j</sup> 6:13 Jer 26:11  
<sup>k</sup> 7:2 Jen 11:31-12:7

kirak epei kaa te maain God kesiuwerek ken wit kerek yi mit in yewi. <sup>5</sup> Hirak kau en me wi eim, te God ap kewetiwek ti kei kike kiutip au. God katip Ebrahim hirak kakwetiwek ti kaktike nepenyerer nirak hir nantiwek. Wi God katip Ebrahim him im, Ebrahim ap kine nikerek wen au. <sup>6</sup> God katip Ebrahim him im, hirak katip kar ik: 'Nikerek ni nanu ti hak ere 400 tito. Hir nanu enum mit nanrekyor enum, hir nanre mit enun nekre winak enuk hir nanriak menmen nanit pewek mererim au. <sup>7</sup> Maain hi anep mit kerek nanriak nepenyerer ni enum, hi anip erekyor enum te hi eriyei nepenyerer ni naninaaiwir wit enuk ek naninen ti ik nanises him mai nanwenanipi.' <sup>8</sup> Hirak katip epei au, God kewet Ebrahim him hirak kakisesim me hirak kerekir yink kirak keteikin mit hirak kises God hirakit tekiyakit tau teit. Maain hirak kine nikan kirak Aisak. Hirak kepu me wi hispinak wikak (8), haai kirak kerekir yink kirak. Maain hirak Aisak kire iuwe, hirak kine Jekop, te hirak kerekir yink kirak. Maain Jekop kire iuwe hirak kerekir yink ke nikerek hiswiyen wik nirak (12). Hir maamrer nipu nau.

<sup>9</sup> "Maain hir nire iuwe hir han menepep nikik kir Josep te hir nesiuwerek ken his me mit nanino Isip hir neit pewek mererik. Josep kiriak menmen keit pewek mererim au, te God kau ketikerek naanmiprewek. <sup>10</sup> God kekepik keriuwe menmen enum yapirwe epei man mit nerekyiwekem. Wi kerek Fero mitik iuwe ke wit iuwe Isip kari Josep kan kirek, God kekepik hirak katip him yaaim kertei menmen werek werek. Fero epei kirek hirak kehimitanek hirak kinin naanmipre wit iuwe Isip ketike winak yapirwe me mitik iuwe Fero.

<sup>11</sup> "Maain wi man ti hawi au te ni mir mewo au maa meit wit Isip kekite wit Kenan. Menmen im mewaank mit yapirwe, maamrer nipu nau ninatin menmen au. <sup>12</sup> Maain Jekop kemtau menmen meit wit Isip, hirak keriuwet nikerek, hir maamrer nipu nau, hir ninin nen Isip nanit menmen. <sup>13</sup> Maain hir pike nen neteipim te Josep kewepyapir hirekes ke heiyiuwerer nirak kerek hir han kitet nipaa ein hirak kaa. Marik Fero kertei Josep heiyiuwerer nirak, haai kirak hir nepu. <sup>14</sup> Josep katip heiyiuwerer nirak kar ik: 'Yi eitip haai kai hirak ketikewi, miyapir ni nikerek ni yi einen eyu wit Isip.' Mit miyapir hir yapirwe nar ke 75 mit. <sup>15</sup> Epei au, Jekop ketike nikerek nirak nepenyerer nirak nekiuwe nen Isip nau en ere hirak ketike nikerek nirak, kerek maamrer nipu nau, hir ne mit hir naa. <sup>16</sup> Nepenyerer neit herwe yink neiyik nen wit Sikem hir newisim mekre han kerek nipaa Ebrahim kewir pewek ketnik ke mit ne weiwik miutip me mitik Hemo.

<sup>1</sup> 7:5 Jen 15:18    <sup>m</sup> 7:6 Jen 15:13-14; Eks 12:40    <sup>n</sup> 7:7 Eks 3:12    <sup>o</sup> 7:8 Jen 17:9-14

<sup>p</sup> 7:9 Jen 37:11, 28, 39:1-3, 21-23    <sup>q</sup> 7:10 Jen 41:37-44; Sam 105:21    <sup>r</sup> 7:11 Jen 41:54

<sup>s</sup> 7:12 Jen 42:1-5    <sup>t</sup> 7:13 Jen 45:1-4, 16    <sup>u</sup> 7:14 Jen 45:9-11    <sup>v</sup> 7:15 Jen 46:1-7, 49:33

<sup>w</sup> 7:16 Jen 23:2-20, 33:19; Jos 24:32



17<sup>x</sup>“Wi epei man menep kerek God kakises him nipaa hirak katip Ebrahim em me kakwetiwek ti me wit Kenan, mit haairer ne weiwik maiu hir nire yapirwe neit wit Isip. 18 Hir nire yapirwe ere mitik Fero hak kinin naanmpire Isip. Hirak ap kises menmen nipaa Josep kiriakem au kineinim kentar nipaa enum eik Josep kaa. 19<sup>y</sup>Hirak kewises maamrer nau, hirak kewaanki. Hirak kenipor hir newir nikerek hemkre tu nen wit eik te hir au nani. 20<sup>z</sup>Me wit im e, Moses miye pirak hire winaak hirak yaaik wetpen. Miye haai naanmpirewek neit winak ere wenke wikak. 21<sup>a</sup>Wenke wikak o, miye haai nirak newisik keit wit eik nises him me mit iuwe ninin naanmpire Isip. Hirak kaa au. Niki pe mitik iuwe Fero hire wirek weriyaak wetiwekhis naanmpirewek hirak kire nikan kire. 22 Mit ne Isip neteikniwek menmen yapirwe hir nerteiyem te hirak kire mitik iuwe katip him yaaim kiriak menmen yaaim kertei menmen yapirwe.

23 “Maain Moses kepu 40 tito epei au, hirak kare kakno kakir nirak yinan ne weiwik miutip mirak me Isrel. 24<sup>b</sup>Hirak ken en kir mitik ke Isip kiriak mitik ke Isrel menmen enum te hirak Moses kekepik kenep ke Isip kakip kaa. 25 Hirak han kitet mit ne weiwik miutip mirak nanirtei God kehimitanek te hirak kakikepi hir naninaaiwir Isip te hir au netari. 26 Wi ham hirak kir mitikit wik te weiwik miutip mirak tenepakit te hirak kereksir ketpiwekit kar ik: ‘Emit! Yi mitikit yi te maam kiutip. Yi ap te yi yiriakakit enum emit!’ 27 Au, hirak kerek kiriak keyiak enum keriuwet Moses ken ketpiwek kar ik: ‘Ti enopin. Keimin kehimitenut ti mitik iuwe naanmamprai erehirawir hawir wenepakit me menmen? 28 Ti han kitet ti eiyep har ke nepip ti enep kei ke Isip a?’ 29<sup>c</sup>Moses kemtau menmen mitik ketpiwekem, hirak han kitet mitik iuwe kakimtau hirak kenep mitik ke Isip kaa te hirak kinaain kinaaiwir Isip kirir ken yanimin kipiun wit Midian kau en. Hirak kau en o, hirak kine nikerek hirakit wik.

30<sup>d</sup>Hirak kepu wit Midian kau en ere 40 tito. Wi ham, ensel ke God kisawin kekre nu, hirak kenip si metnen mau nu keit wit تنهاان weinik menep miniu (o neiyip) Sainai. Hirak kewepyapir hirekes kekre nu kerek Moses kirek si metnen mewik. 31 Moses kirek si metnen mewik, te hirak kehinhin ken menep kakirek. Hirak ken menep kakirek, hirak kemtau God ketpiwek. 32 Hirak ketpiwek kar ik: ‘Hi God ke maamrer nipu nit. Hi God ke Ebrahim, Aisak, Jekop.’ Moses hirak kepipir kinapen kikiamna kirek au. 33 Mitik iuwe God ketpiwek kar ik: ‘Ti eket su mit. Ti ik ti herp en, hirak ti holi hi hehimitanek hirak kai hentar hi hewik. Hi hanhan ti han ekitita. 34 Hi epei hir menmen enum mit nirak mit ne weiwik miutip mai neit Isip. Hi hemtau him mir hir natip nenepip te hi han akepi. Ti enen in ewisa hi heriuwetit ti eno Isip.’

<sup>x</sup> 7:17 Eks 1:7-8    <sup>y</sup> 7:19 Eks 1:10-22    <sup>z</sup> 7:20 Hi 11:23; Eks 2:2    <sup>a</sup> 7:21 Eks 2:3-10

<sup>b</sup> 7:24 Eks 2:11-15, 21-22    <sup>c</sup> 7:29 Eks 18:3-4    <sup>d</sup> 7:30 Eks 3:10

35 “Moses hirak mitik kerek mit ne Isrel nipaa netpiwek nar ik: ‘Keimin kehimitenut ti naanmamprai erehirai haiu mit menehan menepan me menmen? Taau!’ Hirak kerekek God keriuwetek ken naanmipri, ensel ke God kekre nu sitaak hirak kekepik. 36 <sup>e</sup>Hirak kekepik, hirak Moses keriyei mit ninaaiwir Isip, hirak kiriak menmen yaaim iuwe mirakel nipaa mit nirem au keit wit Isip ketike Wan kire Yiwir, ketike wit tenhaan weinim ere 40 tito. 37 <sup>f</sup>Moses kerekek hirak katip mit ne Isrel kar ik: ‘God hirak kakweti mitik hirak profet kakir ke hi hirak keriuweta, hirak ke yi mit te yi yayimtau him mirak.’ 38 <sup>g</sup>Moses nipaa kepu ketike mit ne Isrel nererik nau wit tenhaan weinim, kerek mit newi au. Hirak kepu ketike maamrer nau netike ensel kerek ketpiwek keit miniu (o neiyip) niuk mirak Sainai. Hirak keit him me God hiram mamkaap mit nanu nanit tipmain tipmain enum eik hirak kewetaiyem.

39 <sup>h</sup>“Au, maamrer nai nineinik nises him mirak au. Hir neweikin sip newetiwek, nekre han kir hir hanhan pike nanino Isip, 40 <sup>i</sup>te hir natip Eron nar ik: ‘Ti eime menmen mire bulmakau hiram mamir ke God kiau hiram maminin mamno naanmamprai. Haiu mepitari Moses hirak kerek keriyai meit Isip kerai kan, hirak kepeit miniu (o neiyip) o hirak keit neiyin o mekam makip. Ekit en ekit!’ 41 Me wi im hir nime nu mire bulmakau, hir nenep samiyak neit hemkre neiyim nehinek, nemaniyek naam teipe menmei menmei miunewek neiyim nirire. 42 <sup>j</sup>Hir nemaniyek nirire o, God keweikin sip kewetir kewisi hir newenipi hir mau nepni. Him God hirak kewet mit profet em hir newisim mau tiwei matip mar im:

‘Yi mit ne Isrel. Me 40 tito yi ap yenep samiyak yeit hemkre yeiyim yehinem au. Yi yewet tipir ham em.

43 Yi yinan weisaak me yink me meme me tipir Molok kerekek. Hi au. Yi yinan menmen mire me tipir Refan yi yiriakem. Im em hiram mire ninaan mau teinik mi yi yimaam yewenipi niuk mir. Hi au. Te maain hi tewen eriuwet mit nepan ne wit Babilon hir naninen nantihis nanri nanino yi eisipat wit kir yi eino ein.’

44 <sup>k</sup>“Maamrer nau neremime weisaak kir neit wit tenhaan weinim mit ap newi. Weisaak ik keteiknor hirak God kau ketikeri. Hir epei nimaak kar ke nipaa God katip Moses keteikniwek han kirak hirak kimaak. 45 <sup>l</sup>Maain nikerek nir neit weisaak kir ke haairer te hir netike Josua neiyik nen, hir nari ti ke mit ap ne weiwik me mit ne Isrel. God kepri mit in nen naa te mit ne Isrel nekrehir kir. Weisaak kir kepu keit wit Isrel ere wi Devit naanmipre mit en. 46 <sup>m</sup>God hanhan Devit te Devit kitiwekhi

<sup>e</sup> 7:36 Eks 7:3, 14:21; Nam 14:33    <sup>f</sup> 7:37 Ap 3:22    <sup>g</sup> 7:38 Eks 19:3; Diu 5:5, 9:10; Ap 7:53

<sup>h</sup> 7:39 Nam 14:3    <sup>i</sup> 7:40 Eks 32:1-6, 23    <sup>j</sup> 7:42 Jer 19:13; Emo 5:25-27    <sup>k</sup> 7:44 Eks 25:40

<sup>l</sup> 7:45 Jos 3:14-17, 18:1, 23:9    <sup>m</sup> 7:46 2Sml 7:1-16; Sam 132:1-5

kakime winak ke God kerek maam nipu kaiu Jekop kewenipiyek. <sup>47</sup>Au, Solomon, Devit nikan kirak hirak kime winak eik e.

<sup>48</sup>“God hirak mitik iuwe ap kepu winak mit nimaak. Au, mitik profet Aisaia kewis menmen im:

<sup>49</sup>“Mitik Iuwe God hirak katip kar ik: “Nepni hiram mire yeno kai hi hau en, hi hinin naanmipre menmen, ti hiram mire tapin hi hewis hit menterim. Te yi yayime winak karkeik te hi ehū en? <sup>50</sup>Hi ehū wit karkeik? Hi hirekes epei hewis menmen yapirwe.”’

<sup>51</sup>“Yi mit enun nikip paan tokini. Yi yire mit enun ap yises him God ketpiyem. Yi yar ke maamrer ni. Yi yetikeri ap yises him me God Himin Yaaik au. <sup>52</sup>“Yi eikine niuk me mitik profet kiutipen ke mit profet yapirwe kerek nipaa ein nepu te maamrer ni ap nerekyor enum. Taauye! Hir nenep mit en kerek nipaa newepyapir him natip Mitik Yaaik Krai God kehimitanek hirak kaknen kakikepai. Yi hiras epei yenep mitik ik. <sup>53</sup>“Yi keriyen yeit him me God ensel kewetiyem te yi ap yisesim au.”

#### Mit newir nan nenep Stiven hirak kaa

<sup>54</sup>“Mit ne kaunsil nemtau him Stiven epei ketpor, hiram merekiror han hir han enuk neriuwerek yehes matin mekeipepam. <sup>55</sup>“Stiven kerek God Himin Yaaik kau kekere han kirak iuwe hirak kikiamnaan kir menmen iuwe me God, hirak kir Jisas kerp God his yaaim mirak kerek mit iuwe nerpai. <sup>56</sup>“Stiven kirek, hirak katip kar ik: “Yi eiyimtau. Hi hir nepni mewep hi hir wit ke God kau yaain. Mitik Jisas, hirak Mitik ke wit ke God hirak kerp his yaaim mirak.”

<sup>57</sup>Hirak katip menmen im epei au, hir mit yapirwe ninap nenepip nemesis nikip ninapen nemtau him im, hir nesiuknen nererik neweikniwek netenenik <sup>58</sup>“neriyaak ken wit eik ere ninaaiwir niwa ke wit Jerusalem, hir newir nan nakip. Mit nipaa newepyapirek nenke saket mir nokim newisim miwaai hit me mitik pipiak hak niuk mirak Sol, hirak naanmipre saket mir te hir nenep Stiven. <sup>59</sup>“Hir wen newir nan nakip, hirak Stiven kitehi God katip kar ik: “Mitik Iuwe Jisas ti ehit himin kai.” <sup>60</sup>“Hirak kitehir kewen ninip kinap him iuwe, “Mitik Iuwe ti ap han ekitet menmen enum hir nerekyewem.” Hirak katip menmen im epei au, hirak kaa. Mitik Sol hirak han yaaik hir nakip kaa.

<sup>n</sup> 7:47 1Kin 6:1, 14    <sup>o</sup> 7:49 Ais 66:1-2    <sup>p</sup> 7:51 Eks 32:9; Jer 9:26; Ais 63:10    <sup>q</sup> 7:52 2Kro 36:16; Mt 23:31    <sup>r</sup> 7:53 Ap 7:38; Ga 3:19; Hi 2:2    <sup>s</sup> 7:54 Ap 5:33    <sup>t</sup> 7:55 Mt 22:44; Ap 2:33-34, 5:31    <sup>u</sup> 7:56 Kl 3:1    <sup>v</sup> 7:58 Ap 22:20    <sup>w</sup> 7:59 Sam 31:5; Lu 23:46    <sup>x</sup> 7:60 Lu 23:34

**Sol kare kakiwaank mit miyapir nises him me Krais**

**8** <sup>1</sup>Me wi im mit neit Jerusalem newaank mit miyapir kerek nises him me Krais. Mit yapirwe hir nises him me Krais ninaaiwir Jerusalem nirir nen nau nerer wit wit neit provins Judia kekite provins Sameria. Hir mit aposel au, hir wen nau neit Jerusalem. <sup>2</sup>Mit han nises him me God werék, hir neit Stiven herwe yink kirak nen newep hei newisik, hir nikitek him iuwe. <sup>3</sup>Hir nikitek te Sol kare kakiwaank mit miyapir nises him me Krais. Hirak ken kerer winak winak kari mit miyapir ken kewisi nen nekre winak enuk.

**Mit newepyapir natip him yaa'im me Krais neit provins Sameria**

<sup>4</sup>Mit nises him me Krais kerek nipaa nirir ninaaiwir Jerusalem nen ein ein natip mit miyapir him me Krais. <sup>5</sup>Mitik niuk mirak Filip ken wit Sameria katip mit ne mitik Krais kerek God kehimitanek kan kikaap mit. <sup>6</sup>Mit miyapir yapirwe hir han kiutip newis nikip nises menmen hirak ketpim nentar hir nir menmen yaa'im hirak kiriakem keyim kikaap mit. <sup>7</sup>Hirak kepir herwe enum hiram menepip menpin mekeipin mit, hirak kikaap mit hit maa o mit hit enum hir nire yaain, <sup>8</sup>te mit neit ein han yaaik nepu.

<sup>9</sup>Mitik hak niuk mirak Saimon hirak kau wit Sameria. Nipaa ere wi Filip kan hirak ketenwo henpin, kewen hawi menmei menmei marim te mit miyapir neit Sameria hir han kir kekrit. Hirak kewenipi hirekes hirak iuwe. <sup>10</sup>Mit yapirwe neit Sameria, mit iuwe, mit weinin, hir nemtau him mirak nisesik. Hir natip nar ik: "Mitik ik hirak ketenen menmen me God iuwe hirak kire God." <sup>11</sup>Mit en hir nisesik iuwe nentar me wi yapirwe hirak kenipi hir han kir kekrit keriuwe menmen hirak kiriakem. <sup>12</sup>Te maain Filip kan katip mit miyapir him me God kakinin naanmampre mit, ketpor him me Jisas Krais, mit miyapir yapirwe hir neweikin sip newet Saimon, hir nises him im te Filip kikiri. <sup>13</sup>Saimon hirkes kises him me Krais, Filip kikirek. Epei au, hirak kises Filip menep menep kire wariyakit kirak, hirak kir menmen yaa'im iuwe hirak kiriakem kikaap mit keriuwerem te hirak han kirak kekrit.

<sup>14</sup>Mit aposel neit Jerusalem nemtau mit ne Sameria nises him me God, hir neriuwet Pita kekite Jon hirakit ten Sameria. <sup>15</sup>Hirakit ten tiun Sameria, hirakit titehi God te God Himin Yaaik kaku han ke mit in, <sup>16</sup>ten tar God Himin Yaaik ap kan kewi wen au. Filip kikiri kekine niuk me Jisas kerekek. <sup>17</sup>Pita ketike Jon tewis his mirakit mewi te God Himin Yaaik kan kau han kir.

<sup>1</sup> 8:1 Ap 7:58, 8:4, 11:19    <sup>2</sup> 8:3 Ap 9:1, 13, 22:4, 26:9-11    <sup>a</sup> 8:5 Ap 6:5    <sup>b</sup> 8:7 Mt 10:1  
<sup>c</sup> 8:17 Ap 19:6

<sup>18</sup>Saimon kir aposel tewis his mirakit mau mit God Himin Yaaik kan kewi, te hirak katip kakwet Pita kekite Jon pewek <sup>19</sup>ketpiwekit kar ik: “Yi yenipa hi hertei menmen im te hi ewis his mamu mit, God Himin Yaaik kakwi.”

<sup>20</sup>Pita kewenhi kar ik: “Hi hanhan ti hetike pewek mit yaino si tatikneni yentar ti han kitet ewir pewek ehiti menmen yaaim me God hirak kewet mit en em weinim. <sup>21</sup><sup>d</sup>Menmen im hiram menmen mit au, mentar God kir han kit hirak yaaik au. <sup>22</sup>Ti eweikin sip ewet menmen im me ti han kitetim, ehitehi God kakisak menmen enum ti han kitetim. <sup>23</sup><sup>e</sup>Hi hertei ti han enuk hemkre menepam heriuwe menmen haiu miriakem. Menmen im enum mau mekre han kit meteninit mar ke waai mesenkek mitik hak his mirak keit winak enuk.”

<sup>24</sup>Saimon katip Pita kekite Jon: “Yi eiyitehi God ke hi te menmen ti hetpim ap mamnen mamrewaank.”

<sup>25</sup>Pita ketike Jon tatip menmen hirakit terteyem me Jisas Kraiss, hirakit tetpor him me God. Epei au, hirakit pike tepno Jerusalem, hirakit ten tatip mit miyapir him me God terer wit wit me provins Sameria ere hirakit tipun wit Jerusalem.

### Filip katip mitik ke Itiopia him yaaim me Kraiss

<sup>26</sup>Pita ketike Jon epei ten, ensel ke Mitik Iuwe God kan katip Filip kar ik: “Ti hekrit ekiuwe eno ere ti epiun yayiwe kepno Jerusalem ere wit Gesa.” Nipaa mit nises yayiwe ik te in ek au. <sup>27-28</sup><sup>f</sup> <sup>g</sup>Filip kemtewek epei au, hirak kekrit ken. Me wi im mitik hak hirak mitik iuwe ke wit Itiopia pike kakno wit kirak kitet yayiwe ik kepno. Mitik ik mitik iuwe naanmipre pewek me mite iuwe mit nekine niuk mire nenewe Kwin Kandes, hire pe kantri Itiopia. Hirak ken wit Jerusalem kewenipi God te hirak pike kau karis kirak kepnen. Hirak kepnen hirak kekine tiwei nipaa profet Aisaia kewisim. <sup>29</sup>God Himin Yaaik katip Filip kar ik: “Ti eno menep karis im ti etikerek eino.” <sup>30</sup>Hirak katip epei au, Filip kesiuknen ken menep kentaumit mitik ek kekine him mau tiwei nipaa profet Aisaia kewisim. Filip kitiwekhi kar ik: “Ti hertei hir o as me menmen ti ekinaam o au?”

<sup>31</sup><sup>h</sup>Mitik iuwe eik kewenhi kar ik: “Markeik te hi erteiyem? Mitik ketpo menmen te hi erteiyem. Ti enen etikewa ewu in ti ewepyapir menmen te hi erteiyem.”

<sup>32</sup><sup>i</sup>Him mitik hirak kekinaam hiram mar im:

“Hirak kire sipsip mit neriyaak nakip hirak ketikeri nenepan au.

Hirak kire sipsip mit nime tepnek mirak hirak katip him enum au, hirak kekintip.

<sup>d</sup> 8:21 Sam 78:37   <sup>e</sup> 8:23 Hi 12:15   <sup>f</sup> 8:27 Ais 56:3-7   <sup>g</sup> 8:28 Ap 9:22, 17:3   <sup>h</sup> 8:31 Jo 16:13   <sup>i</sup> 8:32 Ais 53:7-8

33 Hir nenipek yink enuk, hir nanriyaak kakno kot mit nankepek au. Keimin kakwis niuk me nikerek nirak mamu tiwei? Hirak mitik hak ap kakwisim kakintar hir nankip kaki, hirak ap kaku ti kakine nikerek au.”

34 Mitik iuwe kitehi Filip kar ik: “Ti etpo profet katip keimin? Hirak hirekes o mitik hak?”

35 Filip ketpiwek menmen, hirak katip me him ek hirak kekinam te hirak ketpiwek him yaaim me Jisas. 36 Hirakit tepno yayiwe tipiu wit heipun miwaairi te mitik iuwe katip, “Ahirek! Tipar mei miwaa in. Ap menmen mei meiyepeta te ti ekira au.”

37 [Filip kewenhi, “Hi ekrit te ti hises Jisas Kraiss heriuwe han kit.” Hirak kar ik: “Hi han kitet Jisas hirak Nikan ke God kerekek.”]

38 Hirakit tatip epei au, mitik iuwe katip mitik naanmpire karis hiram merp, te hirak ketike Filip tenke ten tipar, Filip kikirek. 39 Hirakit tinaaiwir tipar tiniu ten, God Himin Yaaik keithis Filip keriyaak ken te mitik iuwe kerenaan kinketniwek kirek au. Hirak pike kau karis kitet yayiwe han yaaik ken nirak en. 40 Te God Himin Yaaik hirak kari Filip ken. Hirak keriyaak ken, te hirak kerenaan kir hirekes hirak keit wit Asdot. Hirak keke ti ken kerer wit wit kewepyapir him yaaim me God ere hirak kipiun wit Sisaria.

### Sol keweikin sip kewet menmen enum kises him me Jisas

9<sup>1</sup> Filip wen kiriak menmen, mitik Sol wen katip enum kaknep mit miyapir nises him me God. Hirak ken kir mitik iuwe pris kerek kinin naanmpire pris yapirwe, 2 hirak kitiwekhi kakit tiwei keiyim kakno winak me mit ne weiwik me Isrel hir nau nererik nekine him me Moses neit wit Damaskas. Tiwei ik katip hiram yaaim te Sol kir mit miyapir kerek nises him nipaa Jisas ketpim, hirak kaktorhis kakriyei kakri kaknen wit Jerusalem. 3 Hirak keit tiwei epei au, hirak ken wit Damaskas. Hirak kepno menep, si mewenin waswas moke nepni man mir meweikniwek. 4 Hirak kenkewin kiwaa ti kemtau mitik keit ein katip kar ik: “Sol Sol ti henmak te ti erekyo enum?” 5 Sol kitiwekhi kar ik: “Mitik Iuwe ti keimin?” Hirak ketpiwek kar ik: “Hi Jisas kerek ti herkyo enum. 6 Ti ekrit eno wit Damaskas. Maain ti heit en, mitik hak kaknen kakitput menmen ti ehisesim.”

7 Hir mit kerek netike Sol nitet yayiwe nen, hir nerp neit. Hir nemtau him te hir ap nir mitik keimin katip. 8 Jisas ketpiwek nepei au, Sol kekrit kesiupan nanamir te hirak ap kir menmen au. hirak nanamir toto, te mit netikerek netiwekhis neriyaak neiyik nen Damaskas. 9 Hir nipiun Damaskas, me wi wikak Sol epei kir menmen au, hirak ap kaam tipar o menmen au.

j 8:36 Ap 10:47    k 8:39 1Kin 18:12    l 8:40 Ap 21:8    m 9:1 Ap 8:3    n 9:5 Ap 5:39

<sup>10</sup>Mitik kiutip kises him me Jisas kau wit Damaskas niuk mirak Ananaias. Hirak kepu kityak kir Mitik Iuwe Jisas kan ketpiwek menmen kar ik: “Ananaias.” Hirak kekike kar ik: “Mitik Iuwe hi hepu.” <sup>11</sup>°Mitik Iuwe ketpiwek, “Ti ekrit eno wit niuk mirak “Ya wit kipirak,” ti eno winak ke Judas ti eitiwekhi ke mitik ke wit Tasas niuk mirak Sol. Hirak prea kitauhi menmen kepu ek. <sup>12</sup>Hirak epei kityak kir mitik niuk mirak Ananaias kan kewis his menterik te hirak pike kakir ein ein.”

<sup>13</sup>°Ananaias pike ketpim, “Mitik Iuwe, mit yapirwe netpo me mitik ik e menmen enum yapirwe hirak kiriakem me mit nises him mi neit Jerusalem. <sup>14</sup>°Hirak epei kan in ketenen tiwei ke mit iuwe pris, hir natip hiram yaaim te hirak kakithis mit miyapir neimin newenipi niuk mit.”

<sup>15</sup>°Hirak Mitik Iuwe Krais ketpiwek kar ik: “Ti eno kerekek hentar hi epei ehimitanek kakwepyapir him mai kaktip mit ap ne weiwik me Isrel em, hir netike mit iuwe nir netike mit han ne weiwik me Isrel. <sup>16</sup>°Hi hirekes tewen eteikniwek mekam mamnen mamkip kakintar hirak kaktip mit miyapir him mai.”

<sup>17</sup>Mitik Iuwe katip epei au, Ananaias ken winak ke Sol kewik, hirak kewis his menterik ketpiwek kar ik: “Kai yinak Sol, Mitik Iuwe Jisas kerek keweputyapir hirekes keit yayiwe te ti hirek, hirak hirekes keriuweta hi han. Hirak keriuweta te hi ekepit ti pike ehir ein ein, God Himin Yaaik kaku kakikre han kit.” <sup>18</sup>Hirak katip epei au, menmen mire saauk hiar mekre nanamir kirak minatin, te Sol pike kir ein ein. Hirak kekrit ken, Ananaias kikirek. <sup>19</sup>Epei au, hirak kaam menmen hirak pike manpenuk keit.

### Sol katip mit him yaaim me Krais keit Damaskas

<sup>20</sup>Sol hirak kepu ketike mit han nises him me God neit Damaskas me wi ham. Waswas hirak ken winak ke mit ne weiwik me Isrel hir nau nererik nekine him me Moses, hirak kewepuyapir him me Jisas katip mit hirak Nikan ke God. <sup>21</sup>°Mit nemtau him mirak hir han kekrit natipan nar ik: “Mitik ik kerekek hirak keit Jerusalem kenep mit kerek nises him me Jisas a? Hirak kan in te kakithis mit kerek newenipi niuk mirak kakriyei kakri kakno kakwet mit iuwe pris en?” <sup>22</sup>°Sol keriuwe him iuwe hirak ketpim kari han ke mit yapirwe keteiknor Jisas hirak Mitik Iuwe Krais kerek God nipaa kehimitanek te hir mit ne weiwik me Isrel nau Damaskas hir ap neminp him mirak.

<sup>23</sup>°Wi yapirwe epei men, mit han ne weiwik me Isrel nau en nererik natipan nimenipin Sol nankip te <sup>24</sup>mit han netpiwek menmen hir

° 9:11 Ap 21:39    ° 9:13 Ap 8:3    ° 9:14 Ap 9:1-2, 21; 1Ko 1:2    ° 9:15 Ap 25:13, 23, 27:24; Ro 1:5    ° 9:16 2Ko 11:23-28    ° 9:21 Ap 8:3, 26:10    ° 9:22 Ap 17:3, 18:5, 28    ° 9:23 Ap 23:12

nanriakem. Witaan wanewik hekrit hekrit hir nerp ya wepir ke wit Damaskas nekiwiwek hir nankip. <sup>25</sup>W<sup>u</sup>Au, witaan hak mit kerek nises him mirak me Jisas hir netiwekhis newisik kekre wipo wisenuk hir nikaap waai ninaiwirek ken kekre hei ke han iuwe keit wit eik keweikin wit Damaskas kekiuwe kerp ti hirak kirir.

### Sol keit wit Jerusalem

<sup>26</sup>X<sup>s</sup>Sol kinaaiwir Damaskas epei ken wit Jerusalem, hirak kare kaku kaktike mit en nises him me Kraais. Au, hir ap nemtau him mirak. Hir nineinik nentar hir han kitet hirak ap kises him me Kraais. Hir han kitet hirak kan kemipin kakwenaani kakir neimin hir nises Kraais hirak kakwisi nanino winak enuk. <sup>27</sup>Y<sup>h</sup>Hir nineinik te mitik Banabas ketiwekhis keriyaak keyiyik ken mit aposel ketpor Sol kitet yayiwe hirak kir Mitik Iuwe Jisas, hirak ketpiwek menmen. Hirak wen ketpor Sol katip mit him me Kraais ketpor him manp keit wit Damaskas. <sup>28</sup>Hirak ketpor epei au, hir newis Sol kau ketikeri te hirak ken kir ein ein keit Jerusalem katip him iuwe ketpor him me Jisas. Hirak ap kinapen au. <sup>29</sup>Hirak ketike mit ne weiwik me Isrel kerek hir nertei him Grik, hir natipan nenehan me Jisas te hir nererik nimenipinek nankip. <sup>30</sup>Z<sup>w</sup>Wi kerek mit nises him me Jisas ein nemtewek, hir neithis Sol neriuwetek kekiuwe ken wit Sisaria newisik kau sip neriuwetek ken nirak en wit Tasas. <sup>31</sup>Me wi im mit ap nenep mit nises him yaaim me Jisas te hir mit yapirwe nau neit provins Judia, Galili ketike Sameria hir nau werek werek. God Himin Yaaik kekepi hir ninakin tokim hir nari mit han nises him me Jisas Kraais hir han kitet hirak yaaik.

### Pita kikaap Inias hirak kire yaaik

<sup>32</sup>Pita keke ti ken kerer wit wit. Wi ham hirak ken kir mit nises him me God neit wit Lida. <sup>33</sup>Hirak ken kir mit neit wit Lida, hirak kir mitik niuk mirak Inias. Mitik ik kiwaai yeno me tito hispinak wikak (8) kentar his hit maa te hirak ap kekrit au. <sup>34</sup>Pita ketpiwek kar ik: "Inias, Jisas kenipit ti hire yaaik. Ekrit ewen laplap ewisim emintar yeno." Hirak katip epei au, mitik kekrit waswas. <sup>35</sup>Mit yapirwe nau wit Lida kekite wit iuwe Seron nirek hirak kire yaaik te hir neweikin sip newet menmen enum nises Mitik Iuwe Jisas.

### Mite Dokas waa Pita pike kikia (o kekip) wekrit wepu

<sup>36</sup>Mite piutip niuk mire Tabita wepu wit Jopa. Me him Grik hir mit nenewe Dokas. Hekrit hekrit hire wiriak menmen yaaim hire wikaap mit enun menmen auri, hire wises him me God. <sup>37</sup>Me wi Pita kepu wit Lida,

<sup>w</sup> 9:25 2Ko 11:32-33    <sup>x</sup> 9:26 Ga 1:17-19    <sup>y</sup> 9:27 Ap 9:4, 20; 1Ko 9:1, 15:8    <sup>z</sup> 9:30 Ap 11:25; Ga 1:21



mite ip winap hire waa. Mit miyapir han en nises menmen me maamrer nir hir nikir yink kire newisiye wiwaai wekre haau mau winak kau niu. <sup>38</sup>Wit Lida hirak menep kirapit wit Jopa te mit nises him me God neit ein nemtau mit natip Pita kepu Lida, te hir nesiuwe mitikit wik ten tetpiwek tar ik: “Ti etikawir euno wit kawir waswas.” <sup>39</sup>Hirakit tatip epei au, Pita kekrit ketikeret ten. Hirakit ten tiun winak eik, hir neriyaak ken haau kau niu ein. Miyapir yapirwe kerek mikaan nir epei naa, hir nerp en nikitep. Hir nir Pita epei kan, te hir nan neweikniwek neteikniwek menmen nipaa me wi hire wepu Dokas wekerwo laplap wewet mit miyapir em neriuwetem. <sup>40</sup>“Pita keriuweti nen witeik, hirak kitehir kewen ninip kitehi God me hire. Epei au, hirak kerenaan katip herwe yink kire kar ik: “Tabita ti ekrit.” Hirak katip epei au, hire wesiupan naan. Hire wesiupan naan wir Pita, te hire wekrit wau yeno. <sup>41</sup>Hire wekrit wau yeno, Pita kikia hire wekrit werp, hirak kenine miyapir mit nir epei naa nipaa ein, hir netike mit han en nises him me God kewetir mite ip pike wan. <sup>42</sup>Mit yapirwe neit Jopa nemtau him im te hir nises him yaaim me Mitik Iuwe Krai. <sup>43</sup><sup>b</sup>Pita kepu wi yapirwe kau winak ke Mitik itai kirak Saimon kerek kenip yink me samiyak yaaim me yerkesi.

#### Ensel ke God ken kir mitik Konilias ketpiwek menmen

**10** <sup>1</sup>“Mitik hak niuk mirak Konilias kepu wit Sisaria. Hirak mitik iuwe ke Ami, hirak kinin naanmipre 100 mit soldia ne ami ne wit iuwe Itali keit yanimin. <sup>2</sup>Hirak mitik ik ketike mit nau winak kirak hir han kitet God hirak iuwe te hir newenipiyek. Hekrit hekrit hirak kitehi God menmen, hirak keit pewek kewet mit ne Isrel kerek enun menmen auri kewetirem. <sup>3</sup><sup>d</sup>Wi ham menep hinkewi hirak kepu kityak kir ensel kerekek ke God kan ketpiwek kar ik: “Konilias.”

<sup>4</sup>Hirak Konilias kirapirwek kepirpir kitiwekhi, “Mekam mitik iuwe?”

Ensel ketpiwek kar ik: “God han kitetit ti hitiwekhi hekrit hekrit ti ewet mit enun si enuni pewek herekyor yaaim. <sup>5</sup>Te in ek ti esiuwe mit han nanino wit Jopa hir naninantin mitik kerekek niuk mirak Saimon. Niuk mirak ham hirak Pita. <sup>6</sup>“Hirak kau winak ke itai kirak Saimon, kerek kenip yink me samiyak, hirak winak kirak kiwaai تنهاan menep wan eik. Hirak kakitput menmen te yi eiysesim.”

<sup>7</sup>Ensel ketpiwek epei au, hirak ken. Hirak ken, Konilias kenine mitikit wik tiriak menmen mirak tekite mitik ke ami kiutipen. Mitik ke ami kewenipi niuk me God, hirak hekrit hekrit kau ketike Konilias naanmipre menmen mirak me ami. <sup>8</sup>Hirak ketpiwekit menmen hirak epei kirem. Hirak ketpiwekitem epei au, hirak kesiuweret ten wit Jopa.

<sup>a</sup> 9:40 Mk 5:40-41    <sup>b</sup> 9:43 Ap 10:6    <sup>c</sup> 10:1 Mt 8:5; Ap 27:1, 3    <sup>d</sup> 10:3 Ap 3:1    <sup>e</sup> 10:6 Ap 9:43

### Pita kepu kityak kir menmen

<sup>9</sup>Hirak kesiweret ten, witaan hirakit tiwaai ya ke nimin. Wanewik hirakit tekrit tepno menep wit Jopa. Menep me wepni nimin iuwe Pita kiniu ken kau winak siup kerek kipirak ken kitehi God menmen. <sup>10</sup>Hirak Pita kitehi God menmen, hirak ninpi maak hirak han kitet kakim menmen, hirak wen kemeriyor hir wen niam miwaai si. Hirak kepu en hirak kepu kityak, <sup>11</sup>kir nepni mewep menmen mire laplap mit nikaaip waai mewim men pinak men pinak, men yinak, men yinak, hiram mekiuwe man menep ti. <sup>12</sup>Menmen yapirwe mau mekrerem. Samiyak, manpen, pewen, kirin metike hore yapirwe. <sup>13</sup>Hirak kirem, hirak kemtau mitik ketpiwek kar ik: “Pita ekrit emip ehim.” <sup>14</sup>gAu, Pita ketpiwek kar ik: “Auye! Hi nipaa ere in ap haam menmen im him me Moses mau tiwei meriuwesisem mar ik: ‘Yi mit ne Isrel ap eiyim samiyak im au emit.’” <sup>15</sup>hHirak mitik ketpiwek kar ik: “Menmen God katip hiram yaaim ti ap etip hiram enum au emit.” <sup>16</sup>Menmen im man mar wikak. Epei au, menmen mire laplap pike miniu men nepni eim.

<sup>17</sup>Hiram miniu men nepni eim, Pita han kitet kar ik: “Menmen im meteikno mekam?” Pita han kitetim, mitikit kerek Konilias nipaa keriuwetet tipiun Jopa titehi mit ere tinapin winak ke mitik Saimon, hirakit terp ya wepir ke niwa meweikin winak eik e. <sup>18</sup>Hirakit tenine titehi tar ik: “Mitik kiutip niuk mirak Saimon Pita kau in o au?” <sup>19</sup>iPita han kitet menmen hirak epei kirem, God Himin Yaaik ketpiwek kar ik: “Nikip emnep emtekek! Mitikit wikak epei tan tintetnut, <sup>20</sup>te ti ekrit ekiuwe eno etikeret eino. Ti ap enapen han ekitet menmen au emit. Hi epei heriuwetet tan.”

<sup>21</sup>Hirak katip epei au, Pita kekiuwe ken kir mitikit kerek Konilias keriuwetet tan in, hirak ketpiwekit kar ik: “Hi mitik yi yinyetno. Yenmak te yi yan?” <sup>22</sup>jHirakit tetpiwek tar ik: “Mitik iuwe kinin naanmipre 100 mit ne ami keriuwetei haiu man in. Hirak mitik yaaik han kitet God iuwe hirak kisesik, mit ne weiwik me Isrel hir natip: ‘Hirak yaaik,’ mitik ik God kesiuwe ensel kirak ketpiwek hirak kakriuwet mit han nanino nantuthis ti enen winak kirak ti etpiwek menmen.” <sup>23</sup>kHirakit tatip epei au, Pita keriyeyi kerikan winak nimin en, hirakit tiwaai en me witaan. Wanewik hirak kekrit ketike mit han ne wit Jopa hir nises him me God, hir netikeret nen.

### Pita ken winak ke Konilias

<sup>24</sup>Hir netikeret nen ere witaan, hir niwaai. Wanewik hir nekrit nen. Me wi im hir nipiun Sisaria kerek Konilias kemerir Pita. Hirak epei kari nei

<sup>f</sup> 10:11 Ap 11:5-17    <sup>g</sup> 10:14 Lev 11:1-47; Esi 4:14    <sup>h</sup> 10:15 Mk 7:15, 19    <sup>i</sup> 10:19 Ap 11:12, 13:2    <sup>j</sup> 10:22 Ap 10:1-2    <sup>k</sup> 10:23 Ap 10:45, 11:12

ne weiwik miutip mirak, netike nirak yinan han hir nau winak. <sup>25</sup>Pita ketikeri nare nanino nimin en, Konilias kewenyipirek keit ya weipir ke winak kenke kewen ninip kitehir menep hit mirak. <sup>26</sup><sup>1</sup>Au, Pita kenipek hirak kekrit, ketpiwek kar ik: “Ti ekrit hentar hi ap God au. Hi mitik har ke ti kerekek.” <sup>27</sup>Pita ketike Konilias tewepnak ten nimin en, Pita kir mit yapirwe nererik nau en.

<sup>28</sup>Hirak kir mit nau en, hirak ketpor kar ik: “Yi mit hiras yi yertei werek him haiu mit ne Isrel misesim hiram meriuwesisai mamu winak ke mit ap ne weiwik me Isrel mamim menmen mamtikeri au emit. Te God epei keteikno hi ap han ekitet mitik hak enuk kentar hirak ap ke weiwik me Isrel au. <sup>29</sup>Wi kerek yi yeriuwet mitikit tan tetauhis, hi ap hatip au. Hi han kerekek. In ek hi hitihi te yi yenmak yi yeriuwet mitikit tan tetauhis te hi han in?”

<sup>30</sup><sup>m</sup>Konilias katip kar ik: “Mar ke petepin ti han in, nipaseik wi tekyaaait (4) hi heit winak kai hi hitehi God menmen ere menep hinkewi. Hi wen hepu in, hi hir mitik kiutip keriuwet klos merhihe kerp ninaan mai. <sup>31</sup>Hirak ketpo kar ik: ‘Konilias, God kemtau him mit ti hitiwekhi menmen. Hirak han kitet menmen yaaim ti hiriak mit enun si enuni em. <sup>32</sup>Ti eriuwet mit han nanino wit Jopa naninantin mitik niuk mirak Saimon Pita. Hirak kau winak ke mitik Saimon kerek kenip yink me samiyak yaaim meyerkesi, hirak winak kirak kiwaai tenhaan menep wan eik.’ <sup>33</sup>Hi epei hemtewek, waswas hi heriuwet mitikit wik ten tintetnut tetuthis terit tan. Ti mitik yaaik te ti etikeret epei yan in. Tis, God kau ketikewai haiu mererik te haiu mamimtau menmen God ketput ti ewepyapirem etpaiyem.”

### **Pita katip him me Kraiss keit winak ke Konilias**

<sup>34</sup><sup>n</sup>Konilias katip Pita epei au, Pita ketpor kar ik: “Hi hetpi werek. In ek hi hertei God hirak han kitet mit miyapir yapirwe nipiran kerekyor menmen miutip. <sup>35</sup><sup>o</sup>Weiwik miutip keremem au. God han yaaik keriuwe mit nerer wit wit kerek newenipiyek niriak menmen yaaim nisesik. <sup>36</sup><sup>p</sup>Yi yertei him God kewet haiu mit haiu nepenyerer ne Isrel kewetaiyem. God kewepyapir him yaaim katip haiu mamtikerek emu han kiutip mamintar Jisas Kraiss. Hirak Mitik Iuwe kinin naanmipre mit yapirwe. <sup>37</sup><sup>q</sup>Yi yertei nipaa Jon katip mit menmen ketpor hir enweikin sip enwet menmen enum, hirak kikiri. Hirak kikiri epei au, Jisas kewepyapir him me God mekrit minin meit Galili men merer wit wit meit Isrel. <sup>38</sup><sup>r</sup>Yi yertei Jisas ke wit Nasaret. God kehimitanek kewetiwek Himin Yaaik kirak ken

<sup>1</sup> 10:26 Ap 14:13-15; Rev 19:10    <sup>m</sup> 10:30 Ap 1:10, 3:1    <sup>n</sup> 10:34 1Sml 16:7; Ro 2:11; Ga 2:6  
<sup>o</sup> 10:35 Jo 9:31    <sup>p</sup> 10:36 Sam 107:20; Ais 52:7; Rev 17:4    <sup>q</sup> 10:37 Mt 4:12-17    <sup>r</sup> 10:38 Mt 3:16; Lu 4:17-20

kewik kewetiwek menmen iuwe mirak kakikepik. Hirak ken kerer wit wit kiriak menmen yaaim me mit, kikaap mit kerek Seten kewir menmen mirak enum menteri, kekepi hir nire yaain kentar God kau ketikerek kekepi. <sup>39</sup>Haiu mit aposel mewepyapir menmen yapirwe hirak kiriakem kerer wit wit ke Isrel, mekite wit iuwe Jerusalem. Mit iuwe ninin naanmipre wit Isrel hir netiwekhis neiyik nen nakip newenkekik kau nu tentarakit hirak kaa. <sup>40</sup>Au, me wi wikak hekrit enum eik, God kikiak hirak kekrit kepu hirak kewepyapir hirekes. <sup>41</sup>Mit yapirwe au. Haiu mit aposel kerek nipaa God kehimitenai haiu mewepyapir menmen mirak. Hirak kekrit kepu haiu maam tipar menmen metikerek. <sup>42</sup>Hirak ketpai him manp te haiu mamno mamwepyapir hirak mitik God kehimitanek hirak skelim mit nipaa naa, mit wen nepu. <sup>43</sup>Mit profet yapirwe nipaa newis him mekre tiwei mewepyapir him me mitik ik. Hir natip mit miyapir kerek nisesik, God kakisak menmen enum hir niriakem kakintar menmen yaaim Jisas kerekaiyem.”

#### Mit ap ne weiwik me Isrel God Himin Yaaik kan kewi

<sup>44</sup>“Pita wen ketpor him mirak, God Himin Yaaik kan kau han ke mit miyapir kerek nemtau him Pita ketporem. <sup>45</sup>Mit ne weiwik me Isrel, kerek nises him me God nan netike Pita, hir nehinhin natip nar ik: “God epei kesiuwe Himin kirak Yaaik kan kau haiu mit ketike mit in kerek ap ne weiwik me Isrel.” <sup>46</sup>Hir natip menmen ik nentar hir epei nemtau mit in natip him ham hir hiras nepitariyem newenipi niuk me God hirak iuwe neriuwe him im. Pita katip him iuwe kar ik: <sup>47</sup>“God Himin Yaaik kan kau han ke mit in kar ke nipaa hirak kan kau haiu mit. Keimin kaktip te mit in ap haiu mamkiri mamriuwe tipar au a? Auye!” <sup>48</sup>Hirak katip epei au, hirak ketpor hir nikiri neriuwe tipar nekine niuk me Jisas. Hir nikiri epei au, hir mit en nitiwekhi hirak kau ketikeri me wi ham.

#### Pita katip mit nises him me God neit Jerusalem me menmen hirak kiriakem

**11** <sup>1</sup>Mit aposel netike mit kerek nises him me God neit provins Judia nemtau mit ap ne weiwik me Isrel epei nises him yaaim me God. <sup>2</sup>Ewaai meruri Pita pike kan wit Jerusalem, mit kerek natip mit nises him me God nerekir yink kir hir nitiwekhi nenerek <sup>3</sup>natip nar ik: “Ti henmak te ti hau hetike mit ap ne weiwik me Isrel, yi yekiyam yaam menmen? Hiram au emit.”

<sup>s</sup> 10:40 1Ko 15:4-7    <sup>t</sup> 10:41 Jo 14:19, 22-24, 15:27; Ap 1:8; Lu 24:42-43    <sup>u</sup> 10:42 Ap 17:31; 2Ti 4:1; 1Pi 4:5    <sup>v</sup> 10:43 Ais 33:24, 53:5-6; Jer 31:34; Dan 9:24    <sup>w</sup> 10:44 Ap 11:15, 15:8  
<sup>x</sup> 10:46 Ap 2:4, 19:6    <sup>y</sup> 10:47 Ap 8:36    <sup>z</sup> 10:48 Ap 2:38    <sup>a</sup> 11:3 Ap 10:28; Ga 2:12

<sup>4</sup>Au, Pita kewepyapir ketpor menmen yapirwe epei man kerek God kiriak Konilias em. <sup>5</sup><sup>b</sup>Hirak katip kar ik: “Hi hepu wit Jopa, hi hepu ein hi hitehi God menmen, au hi hityak hir menmen mire laplap mekiuwe man, hir newir waai neriyaam nen yinak nen yinak, nen pinak nen pinak mekiuwe man merp menep hi herpai. <sup>6</sup>Te hi hir samiyak, manpen, pewen, kirin metike hore mei me yaank mekrerem. <sup>7</sup>Hi hir samiyak mekrerem, hi hemtau mitik ketpo kar ik: ‘Pita ti ekrit enep mei ehim.’ <sup>8</sup>Hi hewenhi har ik: ‘Mitik iuwe auye. Nipaa ere in hi ap haam menmen im kerek him me Moses meriuwesim mar im: Yi mit ne Isrel ap eiyim samiyak im.’ <sup>9</sup>Mitik keit nepni pike ketpo kar ik: ‘Menmen God katip hiram mire yaaim, ti ap etip hiram enum au emit.’ <sup>10</sup>Menmen man marim ere mar wikak, te hiram pike miniu men nepni. <sup>11</sup>Hiram pike men nepni, mitikit wikak kerek mitik ke Sisaria keriuwetet, hirakit ten terp winak hi hewik. <sup>12</sup>God Himin Yaaik ketpo hi ap han ekitet menmen au. Hi eno etikeret kerekek. Mitikit hispinak kiutip (6) terp in tetikewa hirakit tetikewa mariyan men wit Sisaria haiu men mekre winak ke mitik Konilias. Haiu men winak ke mitik Konilias, <sup>13</sup>hirak ketpai hirak kir ensel kerp winak kirak ketpiwek kar ik: ‘Ti esiuwe mitik kakno wit Jopa kakinkatin mitik niuk mirak Saimon Pita. <sup>14</sup><sup>c</sup>Hirak kaknen kaktip him mamkaap ti etike mit miyapir nau winak ki yi eiyises him me God te maain God kaktihis.’ <sup>15</sup><sup>d</sup>Hi han kekrit hare etpor menmen, au God Himin Yaaik kan kau kekre han kir kar nipaa kan kau haiu mit in. <sup>16</sup><sup>e</sup>Hirak kan kewi, hi han kitet him nipaa Mitik Iuwe Kraiss katip. Hirak katip kar ik: ‘Jon kikir mit keriuwe tipar te hi tewen esiuwe God Himin Yaaik kaknen kaku yi mit.’ <sup>17</sup>Haiu mertei nipaa haiu mises him me Mitik Iuwe Jisas Kraiss, hirak kesiuwe Himin kirak yaaik. In ek God epei kewet mit ap ne weiwik me Isrel menmen yaaik ik nipaa hirak kewetaiyem. Hi keimin te hi hatip God ekit? Taauye!”

<sup>18</sup><sup>f</sup>Mit en nemtau him Pita ketpim, hir ap wen nenerek au. Hir newenipi niuk me God natip nar ik: “God epei kewis mit ap ne weiwik me Isrel hir nanweikin sip nanwet menmen enum te hir nanu nanit nantikerek nanir ke haiu mit in.”

#### **Mit kerek nises him me Kraiss neit Antiok hir niriak menmen**

<sup>19</sup><sup>g</sup>Me wi mit nenep mitik Stiven hirak kaa, mit naniwaank mit miyapir kerek nises him me God. Au, hir nirir. Han nirir nen menep, han au nen yanimin ere hir niun wit Finisia, wit Saipras, wit Antiok natip mit ne Isrel nau en keriyen him yaaim me Kraiss. <sup>20</sup>Mit han kerek nises him me God hir ne wit Saipras ketike provins Sairini, hir nen wit Antiok newepyapir

<sup>b</sup> 11:5 Ap 10:9-48    <sup>c</sup> 11:14 Ap 16:31    <sup>d</sup> 11:15 Ap 2:4    <sup>e</sup> 11:16 Ap 1:5    <sup>f</sup> 11:18 Ap 13:48, 14:27    <sup>g</sup> 11:19 Ap 8:1-4

him yaaim me Mitik Iuwe Jisas, hir natip mit ne Isrel netike mit ap nei ne Isrel netporem. <sup>21</sup> <sup>h</sup>Mitik Iuwe God kekepi te mit yapirwe nemtau him neweikin sip newet menmen enum hir nises Mitik Iuwe Kraiss.

<sup>22</sup> <sup>i</sup>Mit ne weiwik me God neit Jerusalem nemtau him me menmen im epei man, te hir nesiuwe Banabas ken wit Antiok kir menmen. <sup>23</sup> <sup>j</sup>Hirak ken kiri, hirak kir God kerekyor yaaim, hirak han yaaik keriuweri hirak ketpor him manp te hir wen enises Mitik Iuwe ekikre han kir iuwe. <sup>24</sup> <sup>k</sup>Banabas hirak mitik yaaik, God Himin Yaaik kau kekre han kirak iuwe, hirak kises God werek werek, te mit yapirwe nises him me Mitik Iuwe Kraiss.

<sup>25</sup> <sup>l</sup>Mit yapirwe nises him me Kraiss te Banabas ken wit Tasas kinkatin Sol. <sup>26</sup> <sup>m</sup>Hirak kinkatin Sol ere kinapinek keriyaak pike keiyik ken wit Antiok, hirak pike ken wit Antiok kau en tito kiutip, hirakit tau en tekite mit ne weiwik me God teteikin mit yapirwe menmen, tetpor him me God. Hir neit wit ik e, mit han ninin nekine niuk me mit nises him me Kraiss, hir mit Kristen.

<sup>27</sup> <sup>n</sup>Me wi im, mit han profet kerek newepyapir him me God, ninaaiwir wit Jerusalem nekiuwe nen wit Antiok. <sup>28</sup> <sup>o</sup>Mit nan nererik nemtau him me God, mitik kiutip ke mit in niuk mirak Agabas hirak kekrit kerp nimin hir mit nau nererik en, God Himin Yaaik ketpiwek te hirak kewepyapir menmen im: Maain wi mamnen te hawi ap kaknen kakrer wit wit au, menmen mamu ni ap mamwo au mami. (Menmen im epei man me wi mitik iuwe gavman ke Rom Klodias hirak kinin naanmipre mit.) <sup>29</sup> <sup>p</sup>Mit nises him me God en han kitet hir niutip niutip nenke pewek mir nanisiuwerem mamno wit Judia kerek hawi ap kan keit ein menmen me ni ap mewe au. Hiram maa. <sup>30</sup> <sup>q</sup>Hir nenkerem nemaniyem, hir newet Banabas ketike Sol pewek im hirakit teiyim ten tewet mit iuwe ninin naanmipre mit ne God neit Jerusalem, tewetirem.

### Mitik iuwe gavman King Herot kenep Jems kaa kewis Pita kekre winak enuk

**12** <sup>1</sup> Me wi im mitik iuwe gavman King Herot kinin naanmipre mit neit Isrel, hirak kewaank mit han ne weiwik me God. <sup>2</sup> Hirak keithis Jems, Jon nikik kirak, katip mit ne ami nirak hir nerekir teruk kirak kewen keket. <sup>3</sup> <sup>q</sup>Hirak kaa, hirak Herot kertei mit ne Isrel han yaaik neriuwe menmen hirak epei kiriakem, hirak wen kiriak menmen enum. Hirak keithis Pita kewisik kekre winak enuk me wi mit nererik han tewenin menmen, hir naam bret yis mekrerem au. <sup>4</sup> Hirak kewis

<sup>h</sup> 11:21 Ap 2:41    <sup>i</sup> 11:22 Ap 4:36    <sup>j</sup> 11:23 Ap 13:43, 14:22    <sup>k</sup> 11:24 Ap 2:41, 6:5

<sup>l</sup> 11:25 Ap 9:30    <sup>m</sup> 11:26 1Pi 4:16    <sup>n</sup> 11:27 Ap 13:1, 15:32    <sup>o</sup> 11:28 Ap 21:10    <sup>p</sup> 11:30 Ap 12:25    <sup>q</sup> 12:3 Ap 4:3

Pita kekere winak enuk, mit ne ami naanmiprewek. Hir mit nar 16 hir nenkehan nire tekyaaait tekyaaait (4) naanmipre Pita witaan wanewik witaan wanewik. Herot han kitet wi mit nererik han tewenin menmen hir naam menmen epei au, hirak kaksipupaneke kakno witeik mit yapirwe nanirek hir nantip nare nankip. <sup>5</sup>Mit ne ami wen naanmipre Pita, te mit miyapir yapirwe ne weiwik me God hir nitehi God iuwe te kakikepik.

#### Ensel keithis Pita keriyak ken kinaaiwir winak enuk

<sup>6</sup>Witaan wi miutip mitik King Herot kaknen kakithis Pita kakno wit mit yapirwe nanirek nankip, me witaan ik Pita kiwaai kekere mitikit wik te ami ketin ke nimin, hir newis sen me ain wik mewik, mari hispinam me ami ek, pinam mari ami ek. Mit ami han naanmipre ya weipir ke winak enuk eik e. <sup>7</sup>Hir naanmipre ya weipir, ensel ke God kerp en kire si merhihe meit haau ek. Hirak mitik ensel kewis his mau yapir ke Pita kekotitek ketpewek kar ik: “Ti ekrit waswas.” Hirak epei ketpim, sen menke minaiwir his mirak. <sup>8</sup>Hiram minaiwir his mirak, Ensel pike ketpewek kar ik: “Ti enke klos mit tokim eriuwet su mit.” Pita kiriakem epei au, ensel ketpewek kar ik: “Ti eriuwet saket kit ti eisisa enen.” <sup>9</sup>Pita kisesik kinaaiwir winak enuk ken wit eik. Hirak kepitari menmen ensel kiriakem hiram werek o au. Hirak han kitet hirak kiwaai kityak. <sup>10</sup>Hirakit tinaaiwir weipir ke han ke nimin. Epei au, hirakit tinaaiwir weipir ke han ke wit eik ere tiun weipir wisenuk ke ain ke niwa kikaisiu ke wit Jerusalem. Weipir eik au tokik keit te hirekes kikaisiu, hirakit ten wit eik. Hirakit tekiuwe ya, ensel keweikinhis kire nime kinaiwirek,

<sup>11</sup>Ensel kinaaiwir Pita, hirak kertei mekam epei man te hirak katip kar ik: “Hi hertei werek. God kesiuwe ensel kirak ketauhis keriya hi hinaaiwir menmen Herot ketike mit ne Isrel han kitet nanrekewem.” <sup>12</sup>Hirak han kitet menmen im ere werek, hirak ken winak ke Maria, miye pe mitik Jon Mak, mit yapirwe nererik neit ein hir nitehi God me Pita. <sup>13</sup>Pita kan kerp weipir ke winak keit witeik keretit weipir keket teruk. Mite niuk mire Roda hire wiriak menmen weit pewek im au, hire wan wawir keimin keretit weipir keket teruk. <sup>14</sup>Hire wen menep witehi war ik: “Ti keimin?” Hirak kekike tonik mekre nikip mire hire wertei hirak Pita. Hire wertei hirak Pita, hire han yaaik wesiuknen wen ein wikaisiu weipir au, watip mit en war ik: “Pita kerp witeik.” <sup>15</sup>Hir newenuwehi nar ik: “Ti hetaritari.” Au, hire weptip yapirwe war ik: “Hirak kerp witeik.” Hir natip nar ik: “Au, hirak au, himin kirak kerekek.”

<sup>r</sup> 12:5 Je 5:16   <sup>s</sup> 12:6 Ap 5:23   <sup>t</sup> 12:10 Ap 5:19   <sup>u</sup> 12:12 Ap 12:25, 15:37   <sup>v</sup> 12:15 Ap 26:24; Mt 18:10

<sup>16</sup>Hir wen natipan, Pita wen keretit weipir te hir nare nanino nanirek. Hir nikaisiu weipir nirek hir nehinhin. <sup>17</sup>“Hir nehinhin nesike yaanmi, Pita kikiam his kesiyor hirak katip kar ik: “Yi eikintip.” Epei au, hirak ketpor karkeik Mitik Iuwe God ketiwekhis keriyaak kan kinaaipis winak enuk ke gavman. Hirak ketpor menmen im epei au, hirak ketpor kar ik: “Yi eino eitip Jems ketike nau yinan han him im hi epei hetpiyem.” Hirak ketpor epei au, hirak kinaaiwir wit ik kirir ken wit hak kisawin kau en.

<sup>18</sup>“Maain wanewik epei man, mit ne ami neit winak enuk hir nekrit han enuk wisenuk hir natip nitehiyan nar ik: “Pita ken neiyin?” <sup>19</sup>Mitik iuwe King Herot kesiuwe mit ne ami han hir ninetniwek nietniwek au. Hir ninetniwek au, Herot kitehi mit kerek naanmipre Pita hir nepitari menmen te hirak han enuk katip mit ne ami han nantorhis neriyei neri nanino naninip nani. Epei au, Herot kinaaiwir provins Judia kekiuwe ken wit Sisaria.

#### Mitik iuwe King Herot kaki

<sup>20</sup>Mitik iuwe King Herot kepu wit Sisaria, hirak han enuk keriuwe mit ne wit Taia ketike wit Saidon. Hir nerteiyek in ek hirak kaknen te hir mit han nan nererik nen nanir King Herot. Hir nipiun ein, hir ninin natip mitik niuk mirak Blastas kerek naanmipre menmen me winak ke King Herot, hir netpiwek menmen hir hanhan menmen me nipaa hir netike King Herot han enuk neriuwehan hiram nepei werek emit. Hir netpiwek epei au, hir nen nir King Herot nitiwekhi enkiyan enu enit nentar hir neit menmen me wit King Herot naanmiprewem.

<sup>21</sup>Me wi hirak nepei kimat, mitik iuwe Herot keriuwet laplap me mitik iuwe hirak keiyim kakir mit, hirak kan kau yeno mirak me gavman katip mit him mirak. <sup>22</sup>Hirak katip epei au, mit hir ninap natip nar ik: “Hirak katip kipre God kerekek. Kire mitik au. <sup>23</sup>“Wasenum hirak mitik ensel ke God kenip Herot hirak kinap kentar hirak ap keweni ketpor, “Hi God au, hi mitik kerekek.” Henek mire pinike maak tu kirak te hirak kaa.

<sup>24</sup>“Te mit miyapir yapirwe nerer wit wit nemtau him me God hir nisesim.

<sup>25</sup>“Banabas ketike Sol hirakit tewet mit neit wit Jerusalem pewek. Me wi im hawi ap kan te menmen me ni mir ap mewo au. Hirakit tewir pewek epei au, hirakit teithis Jon Mak ketikeret pike tekiuwe ten wit Antiok.

<sup>w</sup> 12:17 Ap 13:16, 19:33, 21:40    <sup>x</sup> 12:18 Ap 5:22-24    <sup>y</sup> 12:20 1Kin 5:11; Esi 27:17

<sup>z</sup> 12:23 Dan 5:20    <sup>a</sup> 12:24 Ais 55:11; Ap 6:7, 19:20    <sup>b</sup> 12:25 Ap 11:29-30, 12:12, 15:37



**Mit ne God neit Antiok neriuwet Banabas  
ketike Sol tatwepyapir him me God**

**13** <sup>1c</sup>Mit han profet kerek newepyapir him me God, hir netike mit han tisa kerek neteikin mit kerek nises him me God neteiknor menmen God hanhan hir enisesim, hir nepu netike mit kerek newenipi niuk me God neit wit Antiok. Profet netike tisa niuk mir im: Banabas, Simion, kerek mit han nekine niuk mirak ham ‘Naisa’ o ‘Yink nipiak’, hirakit tekite Lusias ke provins Sairini, maneyen kerek nipaa hirak ketike mitik iuwe King Herot kinin naanmipre mit, hirakit tekiyakit tau winak kiutip, hirak ketike mitik Sol. <sup>2d</sup>Me wi ham, hir mit in ap naam menmen te hir nitehi God, God Himin Yaaik ketpor, “Yi yehimitan Banabas ketike Sol, hirakit tiriak menmen hi epei hehimiteniwekitem tatriakem.” <sup>3e</sup>Hirak ketpor epei au, hir wen ninpi maan nepu, hir nitehi God. Hir nitehi God, hir newis his menterikit hir neriuwetet ten.

**Hirakit tatip mit miyapir him me Kraiss teit Saipras**

<sup>4f</sup>God Himin Yaaik keriuwetet ten wit ke wan eik niuk mirak Selusia. Hirakit ten wit Selusia, hirakit tau sip ten wit Saipras kerek wan kimaak keketik. <sup>5g</sup>Hirakit tau sip ten wit iuwe Saipras, hirakit ten wit Salamis ten winak ke mit ne Isrel nau nererik nekine him me Moses en, hirakit tewepyapir him me God tatip mit em. Hirakit nipaa teithis mitik Jon Mak hirak kan kakikepikit.

<sup>6h</sup>Hirakit teke ti terekir wit Saipras ke nimin ten ere tipiu wit pinak ein niuk mirak Pefos. Hirakit ten en tir mitik kertei ketenwo henpin ketike menmen mar im, niuk mirak Ba-Jisas. Hirak ke weiwik me Isrel, hirak katip hirak kewepyapir him God ketpiwekem, te au, hirak kemipin. <sup>7i</sup>Hirak wariyakit ke Sesias Polas kerek kinik naanmipre mit nau wit wan kimaak keketik, hirak mitik kertei menmen werek werek. Mitik Sesias Polas kenine Banabas ketike Sol tan tirek tentar hirak hanhan kemtau him me God. <sup>8j</sup>Hirak hanhan kemtau him me God te mitik Ba-Jisas kerek ketenwo henpin menmei menmei niuk mirak me him Grik hiram Elimas, hirak katip keknivekit him mirakit. Hirak han kitet kakri han ke mitik iuwe gavman Sesias Polas te hirak ap kises him me God hirakit tewepyapirem. <sup>9k</sup>Hirak wen kari han kirak te Sol kerek mit nenewek niuk mirak me him Grik hir nekinaam Pol, God Himin Yaaik kau kekere han kirak hirak kepir mitik ik, <sup>10l</sup>ketpiwek kar ik: “Ti nikan ke Seten, ti hire mitik enuk ti hinapen him yaaim. Han kit kertei werek werek menmen enum me memipin mekite menmei menmei enum te hekrit hekrit ti

<sup>c</sup> 13:1 Ap 11:27   <sup>d</sup> 13:2 Ap 9:15; Ga 1:15-16   <sup>e</sup> 13:3 Ap 6:6   <sup>f</sup> 13:4 Ap 15:39   <sup>g</sup> 13:5 Ap 12:12, 13:13   <sup>h</sup> 13:8 2Ti 3:8

eweikin him yaaim me God mire him enum memipin. <sup>11</sup> In ek Mitik luwe God kakitep te wi ham ti ap ehir menmen au. Ti nanamir toto ere wi God kehimitanem epei au mesi.” Hirak katip epei au, wasenum menmen mire napi mesiwek nanamir, hirak keke ti kinkatin mitik hak kaktiwekhis kakteikniwek ya. <sup>12</sup> Mitik iuwe gavman Sesias Polas kir menmen im, hirak kises him me God. Hirak han kekrit keriuwe him hirakit tetpiwek ke Mitik luwe Kraiss.

### Hirakit tatip mit him me Kraiss teit wit Antiok ke provins Pisidia

<sup>13</sup> Pol ketike wariyakit tirak tinaaiwir Pefos tau sip terekir wan ten wit Pega ke provins Pamfilia. Me wi im Jon Mak kinaiwired pike ken wit Jerusalem. <sup>14</sup> Hir ninaaiwir Pega neke ti nen wit Antiok ke provins Pisidia hirakit tau en. Hirakit tau en, me wi Sabat kerek mit nererik nekine him me Moses, hirakit ten tau tetikeri neit winak eik e. <sup>15</sup> Hirakit tau tetikeri neit winak eik, hirakit temtau mit nekine him Moses kewisim mau tiwei metike him mit profet nipaa newisim mau tiwei. Hir mit iuwe nekinaam epei au, hir neriuwet mitik kan kitiwekithi kar ik: “Taiu yinakit, him meiyam mepeit yi eiypim eikaap mit eiriuwerem o au?” <sup>16</sup> Hirakit tewenhi te Pol kekrit kikiam his mirak katip kar ik:

“Nai yinan yetike mit in ap ne weiwik me Isrel yi yewenipi God. Yi yapirwe nikip emnep eiymtau him! <sup>17</sup> Hirak God kerek haiu mit ne Isrel mewenipiyek, nipaa hirak kehimitan maamrer nau kerekyor hir nire yapirwe me wi hir nau wit Isip nar ke mit ne wit hak in ek hir nau netikewai. Maain God epei keriyeyiri (o keriyeyi) nen ninaaiwir Isip keriuwe menmen iuwe hirak kirkakem. <sup>18</sup> Me 40 tito hirak naanmipror keit yaank tenhaan weinim ap mit newi, te hirak kinaain menmen hir nerekiwekem. <sup>19</sup> Epei au, hirak kenep mit miyapir ne weiwik hispinak wik (7) neit wit Kenan kanip kenepi kewet mit ne Isrel ti im kar ke nipaa hirak ketipim. Him newim ere 450 tito. <sup>20</sup> Me wi God kehimitan mit nire masistret, hir nikaap mit ne Isrel nepir mit enun nepan nanino. God kehimitan mit narik ere maain wi mitik Samyuel hirak profet kikaru hirak kinin naanmipre mit.

<sup>21</sup> Me wi im, mit ne Isrel nitehi Samyuel kehimitan mitik hirak kakre king hirak kakiniini naanmampri, te God kehimitan mitik Sol nikan ke mitik Kis ke weiwik miutip me maam Bensamin. Hirak kinin naanmipre mit ne 40 tito. <sup>22</sup> Maain God keperek kehimitan Devit hirak kekrehir ke Sol. God katip ke Devit kar ik: ‘Hi hertei mitik ik Devit hirak nikan ke

<sup>i</sup> 13:11 Ap 9:8   <sup>j</sup> 13:13 Ap 12:12, 13:5, 15:38   <sup>k</sup> 13:15 Ap 15:21   <sup>l</sup> 13:16 Ap 12:17

<sup>m</sup> 13:17 Eks 1:7, 6:6, 12:51   <sup>n</sup> 13:18 Eks 16:35, Nam 14:34, Diu 1:31   <sup>o</sup> 13:19 Diu 7:1; Jos

14:1   <sup>p</sup> 13:20 Het 2:16; 1Sml 3:20   <sup>q</sup> 13:21 1Sml 8:5, 19, 10:20-24   <sup>r</sup> 13:22 1Sml 13:14, 16:13; Sam 89:20

Jesi, hirak mitik kar ke hi hanhanek kakises menmen hi hanhan hirak kakisesim.’ <sup>23</sup> <sup>s</sup>Nipaa God katip hirak kakriuwet mitik hak hirak kaknen kakikaap mit ne Isrel kaktorhis nanu werek werek. Mitik Jisas ke weiwik me maam kirak Devit, God kehimitanek hirak Kraiss kikaap haiu mit ne Isrel.

<sup>24</sup> <sup>“</sup>Jisas kewepyapir menmen iuwe hirak kakriakem wen au, mitik Jon katip mit miyapir yapirwe ne Isrel hir enweikin sip enwet menmen enum te hirak kakiri. <sup>25</sup> <sup>“</sup>Hirak Jon kiriak menmen mirak kerek God kehimitanek kiriakem. Hirak kiriakem menep epei au, hirak kitehi mit kar ik: ‘Yi han kitet hi keimin?’ Hi ap Mitik Kraiss te yi yemeriyekek kaknen. Au, yi yemtekek. Hirak kakisisa kerekek kaknen hirak Mitik luwe hi au hire mitik enuk weinik.’

<sup>26</sup> Pol wen katip kar ik: “Nai yinan nepenyerer ne Ebrahim, yi yetike mit han in kerek yewenipi God. God epei keriuwetai mitik te kewepaiyapir him yaaim me hirak kakithis haiu mit. <sup>27</sup> <sup>v</sup>Mit nepu wit Jerusalem netike mit iuwe ninin naanmiprai hir netariyek hirak Mitik God kehimitanek hirak kan kikaap haiu mit ne Isrel. Hir netari him nipaa mit profet newisim mau tiwei me mitik ik, hiram me wi Sabat yapirwe hir nekinaam. Hir nesiuwerek ken winak ke kaunsil nesiuwe him nises menmen nipaa mit profet netpim mamnen. <sup>28</sup> <sup>w</sup>Hir ap ninapin menmen enum hirak kiriakem au, te hir wen neriuwetek ken mitik iuwe gavman Pailat nitiwekhi hirak kaknep Jisas hirak kaki. <sup>29</sup> <sup>x</sup>Hir nerekyiwek menmen yapirwe him me God mau tiwei profet newisim natip hiram mamnen. Hir nerekyiwekem epei au, hirak kaa hir newenkekik kentar nu tentarakit hirak kaa, hir newisik kekre hei ke han. <sup>30</sup> <sup>y</sup>Au, hirak God kikiak hirak kepu. <sup>31</sup> <sup>z</sup>Me wi yapirwe hirak kewepyapir hirekes mit nipaa ninaaiwir wit Galili nen wit Jerusalem netikerek, hir nirek. In ek hir newepyapir menmen im natip mit ne Isrel em.

<sup>32-33</sup> <sup>a</sup>“Im ek haiu man metpi him yaaim me mitik Kraiss. Menmen nipaa God katip maamrer nau ketporem, hirak in ek kerekyei haiu nepenyerer nir kerekyeyem kentar hirak kikiak Jisas kekrit kepu. Him me menmen im mau tiwei Sam nipaa mit newisim mar im. Hiram matip:

‘Ti nikan kai. Petepin hi hire Haai kit.’

<sup>34</sup> <sup>b</sup>God katip him im me maain hirak kakikiak Jisas pike kakikrit kaku, kaki kaku kakit au. Him mau tiwei matip mar im:

‘Maain hi erekyi yaaim entar him nipaa hi atip Devit hi ewetiwekem.’

<sup>35</sup> <sup>c</sup>Devit kewis him ham mar ik:

<sup>s</sup> 13:23 2Sml 7:12-16; Ais 11:1    <sup>t</sup> 13:24 Mt 3:1-2    <sup>u</sup> 13:25 Jo 1:20, 27    <sup>v</sup> 13:27 Jo 16:3; Ap 3:17    <sup>w</sup> 13:28 Mt 27:22-23    <sup>x</sup> 13:29 Mt 27:59-60    <sup>y</sup> 13:30 Ap 2:24    <sup>z</sup> 13:31 Ap 1:3, 8  
<sup>a</sup> 13:33 Sam 2:7    <sup>b</sup> 13:34 Ais 55:3    <sup>c</sup> 13:35 Sam 16:10

'Hi hertei werek ti God ap ewis ti ehimitanek kakikaap mit ye yink kirak kaknin kakikre hei taau.'

<sup>36</sup>dDevit hirak Mitik Kraiss God kehimitanek au. Hirak kiriak menmen God hanhan hirak kisesim, hirak kepu me wi God kehimitanek, te hirak kaa. Hirak kaa, mit newisik kekre hei menep hei ke maamrer nirak, hirak kiwaa en kesine keit. <sup>37</sup>Mitik Kraiss kerek God kehimitanek kikaap haiu mit ne Isrel hirak kiwaa kesine au. God kikiak hirak pike kekrit kepu. <sup>38</sup>eNaiu yinan haiu metpi yi mit in yapirwe him im mentar menmen hirak Jisas kiriakem, hirak kasisak menmen enum yi yiriakem. <sup>39</sup>fNipaa him me Moses yi yisesim hiram ap werek mamisak menmen enum yi yiriakem te God katip yi yaain au. In ek mit kerek nises him me Jisas, hirak kasisak menmen enum mir te God katkip hir mit yaain. <sup>40</sup>Yi naanempre hiras te menmen nipaa mit profet newisim mau tiwei hiram ap manmen yi mit. <sup>41</sup>gHiram matip mar im:

'Yi mit yi yinan yipir yewirek yentar him me God. Yi han kitet yapirwe yi yayi yayiwaank hiras me menmen hi hiriakem me wi yi yepu ti, hiram menmen mitik hak kewepyapirem ketpiyem te yi ap eiyisesim au.'

<sup>42</sup>Pol katip epei au, hirak ketike Banabas tinaaiwir winak kerek mit nekine him me Moses eik, hirakit tepno, mit han netpiwekit me wi Sabat ham hirakit pike tatnen tatweypapir hi mei me menmen hirakit tetpim. <sup>43</sup>hMit neit winak ek nen witeik epei au, mit ne weiwik me Isrel netike han ap ne weiwik me Isrel au, hir nises him me God, hir nises Pol ketike Banabas. Hirakit tetpor tekeyor han te hir enises menmen yaaim God kiriak mit em.

<sup>44</sup>Me wi ham Sabat epei man, mit ne wit nen nereik winak kerek hir nekine him me Moses nekerek eik nenewo ere menep wit weinik te hir nanimtau him me God. <sup>45</sup>iMe wi kerek mit ne weiwik me Isrel nir mit yapirwe nererek en, hir yink enuk neriuwerem te hir natip enum me Pol nemniniwek him mirak. <sup>46</sup>jHir nemniniwek him mirak, Pol ketike Banabas tatip him iuwe teneri tar ik: "Yi eiyimtewen. Hiram yaaim te yi mit yinin yemtau him me God. Au, yi yeweikin sip yewetiwem, yi han kitet yi ap yaain te yi yises him im mamkaap yi yayu yaitlike God, te hawir wauno wewepyapir him me God mamno mit ap ne weiwik mi me Isrel. <sup>47</sup>kMitik luwe God ketpawir keriuwe him mirak katip kar ik:

'Hi ehimiteni yi yire si meteikin mit ya ke witaan te yi eiteikin mit han kerek ap ne weiwik me Isrel nerer wit wit eiteiknor hir nanises him me God te hir nanu werek werek God kaktorhis.' "

<sup>d</sup> 13:36 Ap 2:29   <sup>e</sup> 13:38 Ap 10:43   <sup>f</sup> 13:39 Ro 10:4   <sup>g</sup> 13:41 Hab 1:5   <sup>h</sup> 13:43 Ap 11:23; 14:22   <sup>i</sup> 13:45 Ap 14:2   <sup>j</sup> 13:46 Ap 3:26, 18:6; Lu 7:30   <sup>k</sup> 13:47 Ais 49:6

<sup>48</sup>Mit miyepir ap ne weiwik me Isrel epei nemtau menmen im te hir han yaaik wisenum hir natip, “Him me God hiram yaaim wisenum.” Mit miyapir kerek God nipaa kehimiteni hir nanu nanit nantikerek tipmain tipmain enum eik hir nises him mirak.

<sup>49</sup>Mit natip him me Mitik luwe God hiram men merer wit wit me provins ein. <sup>50</sup>Te mit han ne weiwik me Isrel nari han ke mit iuwe ninin naanmimpres mit ne wit, hir netike miyapir iuwe han hir nises him me Moses, hir niriak Pol ketike Banabas enum hir nepiret tinaaiwir provins kir. <sup>51</sup>Hir nepiret tinaaiwir provins kir te hirakit titanik toni waniu (o win) mau laplap mirakit teteiknor hir mit enun neweikin sip newet God. Epei au, hirakit ten wit Aikoniam. <sup>52</sup>Mit kerek nises him me God neit wit Antiok hir han yaaik nepu, God Himin Yaaik kau kekri keneisesi.

### Pol ketike Banabas ten wit Aikoniam

**14** <sup>1</sup>Hirakit epei tan wit Aikoniam hirakit tiriak menmen mar nipaa hirakit tiriakem teit wit Antiok ke provins Pisidia. Hirakit ten winak ke mit ne Isrel nau nererik nekine him me Moses ein eik, tatip mit him yaaim me Krai te mit yapirwe ne weiwik me Isrel netike mit yapirwe ap ne weiwik me Isrel nises him mirakit. <sup>2</sup>Mit han ne weiwik me Isrel hir ninapen nises him mirakit hir nari han ke mit ap ne weiwik me Isrel te hir ninapen mit nanises him yaaim me Krai. <sup>3</sup>Hirakit aposel tepu en wi yapirwe, hirakit ap tinapen au. Hirakit tatip mit miyapir him me Mitik luwe Krai. Mitik luwe kekepikit te hirakit tiriak menmen yaaim tikaap mit miyapir ninap o his hit enum hir nire yaain. Mit en nertei him hirakit tetpim me Jisas Krai epei kerekyei haiu mit haiu yaain, him mirakit hiram yaaim mentar menmen yaaim hir nir hirakit tiriakem. <sup>4</sup>Mit miyapir yapirwe ne wit ik e, hir newep nau nimen. Han pinan netike mit ne weiwik me Isrel, han pinan netike aposel. <sup>5</sup>Mit han ne weiwik me Isrel netike mit han au, hir netike mit iuwe nir han kitet naninep hirakit aposel neriuwe nan te hirakit tati. <sup>6</sup>Au, hirakit aposel temtewem, hirakit tirir ten wit Listra ketike Debi, hiram wit me provins Likionia, hiram metike wit ham menep. <sup>7</sup>Hirakit tepeit en tetpor him yaaim me Krai.

### Hirakit tepu Listra ketike Debi mit newir nan nenep Pol

<sup>8</sup>Mitik kiutip keit wit Listra hit mirak enum me wi miye winaak ere in te hirak kekrit keke ti au. <sup>9</sup>Hirak kau ti kemtau Pol katip him me God. Pol kirapirwek kertei hirak kises him me Krai werek te hirak kakikepik.

<sup>1</sup> 13:48 Ap 11:18    <sup>m</sup> 13:50 Ap 17:4, 12    <sup>n</sup> 13:51 Mt 10:14; Ap 18:6    <sup>o</sup> 14:2 Ap 13:45  
<sup>p</sup> 14:3 Mk 16:20; Ap 19:11    <sup>q</sup> 14:5 Ap 14:19; 2Ti 3:11    <sup>r</sup> 14:6 Mt 10:23    <sup>s</sup> 14:8 Jo 9:1; Ap 3:2    <sup>t</sup> 14:9 Ap 3:4; Mt 9:28

<sup>10</sup>Hirak katip mitik ik him iuwe kar ik: “Ti ehin ekrit ehirp eriuwe hit mit.” Hirak ketpiwek epei au, mitik kehin kekrit kerp keke ti.

<sup>11</sup>“Mit miyapir yapirwe nir menmen im Pol kiriakem, hir ninap natip neriuwe him mir Likionia, “God kenipet hirakit teweikinhis tire haiu mit tekiuwe tan ti.” <sup>12</sup>Hir nekine Banabas hirak Sus. Hir nekine Pol hirak Hemes nentar hirak kerekek katip menmen kar ke hir han kitet Hemes ketpim. <sup>13</sup>Winak ke tipir Sus kau keit witeik kirapit ke wit iuwe eik e. Mitik pris kerek naanmipre winak ik e keit bulmakau metike timen keyim kan kewisim meit ya weipir ke niwa. Hirak ketike mit en hanhan nenep bulmakau neit hemkre neiyim nehin teinik newenipi aposel.

<sup>14</sup>Ewaai meruri Pol ketike Banabas tertei menmen mit nare nanriakem hirakit tewepep klos mirakit teteikin mit hir han enuk hirakit tesiuknen tewep mit tetin ke nimin <sup>15</sup>“tinap tatip tar ik: “Yi mit yenmak te yi yiriak menmen im e? Hawir mitikit keretet wire yi mit. Hawir epei wan wetpi him yaaim me Kraiss, te yi eiweikin sip eiwet menmen im weinim yi eiyses God hirak kepu. Hirak kerekek kiriak nepni, ti wan eik metike menmen yapirwe mewim. <sup>16</sup>“Nipaa hirak kewis mit nises han kir hir newenipi God weinim memipin, <sup>17</sup>“te hirak nipaa ere in keteikin mit hirak kepu keriuwe menmen yaaim hirak kiriakem. Hirak kesiuwi hawi keke nepni kan, kenip menmen mi yapirwe mewo yaaim meriuwe wi miram. Hirak keweti menmen yaaim te yi han yaaik yayu.”

<sup>18</sup>Hirakit tatip menmen im te menep hirakit ap teweni te hir nenep bulmakau neit hemkre neiyim nehinet newenipi niuk mirakit. <sup>19</sup>“Mit han ne weiwik me Isrel nau wit Antiok ke provins Pisidia hir netike han ne wit Aikoniam nan nari han ke mit yapirwe neriuwe him mir, hir newir nan nenep Pol. Hir newir nan nenep Pol, hir han kitet hirak nepei kaa, te hir nari yink kirak neiyik nan newirek ken kinaaiwir wit kir kiwaai keit. <sup>20</sup>Hirak kiwaai keit o, mit nises him me Kraiss hir nan nererik nerp neweikniwek. Hir nerp neweikniwek, hirak Pol kekrit ketikeri pike nariyaan nen wit eik. Wanewik, Pol ketike Banabas tariyakit ten wit Debi. Hirakit pike ten wit Antiok ke provins Siria.

<sup>21</sup>“Pol ketike Banabas tatip mit him yaaim me Kraiss teit wit Debi te hir mit yapirwe nemtau him nisesim. Epei au, hirakit pike ten wit Listra ketike wit Aikoniam. Ten ein epei au, hirakit pike ten wit Antiok ke provins Pisidia. <sup>22</sup>“Hirakit tikaap mit kerek nises him me God en te hir han tokik nepu, hir wen nises him yaaim me Kraiss wisenum. Hirakit tetpor, “Haiu mit menmen enum yapirwe mamraiwaank in ek te maain haiu mamu han yaaik God kakinin naanmamprai.” <sup>23</sup><sup>b</sup>Ne mit nerer wit

<sup>u</sup> 14:11 Ap 28:6    <sup>v</sup> 14:15 Ap 10:26; Sam 146:6    <sup>w</sup> 14:16 Ap 17:30    <sup>x</sup> 14:17 Sam 147:8; Jer 5:24    <sup>y</sup> 14:19 Ap 17:13; 2Ko 11:25; 2Ti 3:11    <sup>z</sup> 14:21 Mt 28:19    <sup>a</sup> 14:22 Ap 11:23, 15:32, 18:23; Mt 7:14; 1Te 3:3    <sup>b</sup> 14:23 Ap 13:3

wit nises him me God nererik newepnipi niuk mirak hirakit tehimitan mit iuwe hir ninin naanmipre mit en. Hirakit ninpi makit hirakit titehi Mitik Iuwe kerek hir nisesik, hirak kakikepikit.

### Pol ketike Banabas pike ten Antiok ke provins Siria

<sup>24-25</sup>Pol ketike Banabas teke ti ere ten tinaaiwir provins Pisidia hirakit ten tipiu provins Pamfilia. Hirakit ten wit Pega hirakit tatip mit ein him yaaim me Krai. Epei au, Hirakit ten wit Atelia kerek keit wan eik. Epei au, <sup>26</sup>hirakit tau sip pike ten wit Antiok hak wit kerek nipaa mit nehimitenikit nitehi God naanmampriwakit me menmen hirakit in ek epei tiriakem. <sup>27</sup>Hirakit tipiu Antiok epei au, hirakit tari mit ne weiwik me God en hir nererik, hirakit tetpor menmen yapirwe God kekepikit tiriakem, hirak keteikin hirak hanhan mit ap ne weiwik me Isrel hir nanisesik. <sup>28</sup>Hirakit tatip epei au, hirakit tau tetikeri me wi yapirwe.

### Mit yapirwe nises God nererik neit Jerusalem newepnak netpep menmen

**15** <sup>1</sup>Mit han ne provins Judia nen wit Antiok natip mit nises him yaaim me Krai nar ik: “Yi ap yerekir yink ki kar ke nipaa Moses ketpim te God ap kaktihis yi eitikerek eiyu au.” <sup>2</sup>Pol ketike Banabas hirakit tetike mit in hir newepnak natip menmen im yapirwe, hir nenehan. Hir nenehan te mit ne weiwik me God en han kitet nanriuwet Pol Banabas tekite mit han en ne Antiok te hir nanino wit Jerusalem nanir mit aposel netike mit iuwe ninin naanmipre mit ne weiwik miutip me God ein nanitorhi me menmen im. <sup>3</sup>Mit ne weiwik me God neit Antiok neriuweti nen. Hir nepno newep provins Finisia ketike Sameria, hir natip mit en, “Yi mit ap ne weiwik me Isrel yi eiweikin sip eiwet menmen enum eiyises God.” Mit en kerek nises him me God nemtewem te hir han yaaik neriuwerem.

<sup>4</sup>Hir nipiun Jerusalem epei au, mit aposel, mit iuwe ninin naanmipre mit ne weiwik me God en netike mit en nises him me God nererik newenipi God, hir han yaaik neriuwe mit han nan. Pol ketike Banabas hirakit tetpor menmen yapirwe God kekepikit tiriakem. <sup>5</sup>Hirakit tetpor epei au, mit han ne Farisi kerek in ek nises God hir ninin nises him lo me Moses hir nekrit natip nar ik: “Mit ap ne weiwik me Isrel hir enrekir yink kir hir enises him nipaa Moses ketpim.”

<sup>6</sup>Hir natip epei au, mit aposel netike mit iuwe ninin naanmipre mit ne weiwik me God en hir nau nererik newepnak natipan menmen im. <sup>7</sup>Hir newepnak natipan yapirwe epei au, Pita kekrit katip, “Nai yinan,

<sup>c</sup> 14:26 Ap 13:1-2, 15:40    <sup>d</sup> 14:27 Ap 11:18, 15:4, 12    <sup>e</sup> 15:1 Ga 5:2    <sup>f</sup> 15:2 Ap 11:30; Ga 2:1    <sup>g</sup> 15:4 Ap 14:27    <sup>h</sup> 15:7 Ap 10:1-43

yi yertei nipaa enum eik God ke haiu mit kehimitena hi hewepyapir him yaaim me Kraiss hetpim men mit ap ne weiwik me Isrel te hir nemtewem nisesim. <sup>8</sup> God hirak kertei han ke mit keteiknai hirak han yaaik te mit ap ne weiwik me Isrel hir nisesik. Haiu merteiyem mentar hirak kesiuwe God Himin Yaaik kewetirek kar ke nipaa hirak kewetaiyek. <sup>9</sup> God kiriak menmen miutip me haiu mit metike hir mit ne weiwik ham. Hirak kesak menmen enum hir niriakem mentar hir nises him mirak. <sup>10</sup> In ek yi yenmak te yi einip God han enuk keriuwe menmen me him me Moses yi han kitet mit kerek nises God hir enisesim? Menmen im hiram mire menmen miyapir neremit hiram nimenun, hiram mamnip han kir enum me menmen enum weinim. Nipaa maamrer nai netike haiu mit in ek ap nises menmen me Moses werek werek au. <sup>11</sup> Au, haiu han kitet God kaktaihis kakir ke hirak kakithis mit han en kakintar Mitik Iuwe Jisas Kraiss hanhanai kerekyai yaaim. Him me Moses au.”

<sup>12</sup> Pita katip epei au, Mit nekintip nau neit nemtau Banabas ketike Pol hirakit tetpor menmen yaaim me mit his hit enum o menmen meiyam enum hir nire yaain, God kekepikit te hirakit tiriakem me mit miyapir ne weiwik ap me Isrel.

<sup>13</sup> Hirakit tatip epei au, Jems katip him mirak kar ik: “Nai yinan, nikip emnep eiyimtau menmen im! <sup>14</sup> Saimon epei ketpai me wi God kinin keteiknai hirak hanhan mit ap ne weiwik me Isrel hirak kari mit han ne mit han en hir mit nirak. <sup>15</sup> Nipaa mit profet natip me menmen im mar ke haiu metpim. Him mau tiwei hir newisim matip mar im:

<sup>16</sup> “Maain hi Mitik Iuwe God hi pike anen akaap mit ne weiwik me maam kir Devit. Hir enun nire winak epei kewen te hi pike ekepi hir nanu werek nar ke winak hi pike eimaak ekirp.

<sup>17</sup> Hi hiriak menmen im te mit ne weiwik ham nerer wit wit nanisisa, mit kerek hi hehimiteni hir mit nai.’

<sup>18</sup> Nipaa Mitik Iuwe God kewepyapir him im ketpim.

<sup>19</sup> “Hi Jems hi han kitet te haiu ap mamiwaank mit han ne weiwik ham hir neweikin sip newet menmen enum nises God. <sup>20</sup> Haiu emwis tiwei emsiuwerem emno emitpor te hir ap nanim menmen mit han newepwar newet tipir weinim em mentar God keriuwesisem hiram enum. Im metike hir ap nariyanhis neweninem, hir ap nanim samiyak mit newers timir namip neriuwe hemkre ap mewen au hir ap nanim hemkre mei kike au. <sup>21</sup> Me wi Sabat yapirwe mit epei nekine him me Moses neit winak kerek mit nererik nekine him mirak. Mit nerer wit wit nekine him mirak natip mit em. Hiram ap yaaim te mit ap ne weiwik me Isrel nau netike mit ne

<sup>i</sup> 15:8 Ap 10:44, 11:15    <sup>j</sup> 15:9 Ap 10:34-35    <sup>k</sup> 15:10 Mt 11:30; Ga 3:10, 5:1    <sup>l</sup> 15:11 Ga 2:16; Ef 2:5-8    <sup>m</sup> 15:12 Ap 14:27; Ga 2:9    <sup>n</sup> 15:14 Ap 15:7-9    <sup>o</sup> 15:16 Emo 9:11-12  
<sup>p</sup> 15:20 Eks 34:15-17; Jen 9:4; Lev 17:10-16    <sup>q</sup> 15:21 Ap 13:15



Isrel nekre winak mit nerer ein ein neit nenipi yink enum nentar hir ap nises menmen Moses nipaa keriuwesisem.”

**Mit neit Jerusalem nesiuwe tiwei ken mit ap ne Isrel**

<sup>22</sup>Hir natip epei au, mit aposel netike mit iuwe ninin naanmpire mit ne God en, hir netike mit yapirwe nises God en hir han kitet nehimitan mit han neriuweti nanino Antiok nantike Pol, Banabas. Hir nehimitan Judas, mit nekine niuk mirak ham Basabas, hirak ketike Sailas. Mit nises God in han kitet mitikit it hirakit yaaikit. <sup>23</sup>Hir newis tiwei newet mit em hiram matip mar im:

“Haiu mit Aposel metike mit iuwe ninin naanmpire mit ne weiwik me God in, haiu metike mit weinin ne weiwik mirak, haiu yapirwe metpi yi yaain, yi mit yises God yi ap ne weiwik me Isrel yau wit Antiok, Siria, Silisia. <sup>24</sup>Haiu memtau mit han ne haiu mit nen wit ki nari han ki keriuwe him hir netpiyem te yi han enuk. Haiu ap metpor hir nanino netpiyem au. <sup>25</sup>Haiu memtewem, te haiu mererik matipan menmen im, haiu mehimitan mitikit wik mamriuwetet tatno yi mit. Hirakit tatno tatkite taiu yinakit yaaikit Banabas ketike Pol. <sup>26</sup>Hir mit han natip naniksip nanintar hirakit tises him me Mitik Iuwe kiau Jisas Kraiss, hirakit tatip mit em. <sup>27</sup>Haiu epei meriuweti Judas ketike Sailas. Hirakit tatitpi tatriuwe him mirakit him mepir menmen haiu mewisim mau tiwei ik e.

<sup>28</sup>God Himin Yaaik ketike haiu mit in haiu han kitetim matipan te haiu ap metpi yi eiyises him me Moses yapirwe au. Eiyisesim mei kike keremem. <sup>29</sup>Yi ap eiyim menmen mit newepwarem newet tipir weinim em. Yi ap eiyim hemkre au, o samiyak mit namip newers timir hemkre wen meriuwerem, yi ap eiriyanhis eiweninem au emit! Yi ap eiriak menmen im haiu mewisiyem te yi eiyu werek werek mepir keremem.”

<sup>30</sup>Hir newis tiwei epei au, hir neriuwet mit nen Antiok. Hir nipiun Antiok, hir nari mit kerek nises him me Kraiss hir nererik hir newetir tiwei ik. <sup>31</sup>Hir neit tiwei nekinaak. Hir nekinaak, hir han yaaik neriuwe him mau tiwei. <sup>32</sup>“Judas ketike Sailas hirakit mitikit profet, te hirakit tetpor yapirwe tekepi hir han tokik nepu te hir nepu werek. <sup>33</sup>Hirakit tepu en wi ham teit wit Antiok. Epei au, mit nises God en neriuwetet pike ten, hirakit tetpor tar ik: “God naanmampri.” [34Sailas au, hirak hanhan kepu en.]

<sup>35</sup>Pol ketike Banabas tepu Antiok me wi ham. Hirakit tetikite mit han yapirwe hir natip mit him me God newepyapirem.

**Pol ketike Banabas tinaaipisakit**

<sup>36</sup>Maain wi ham Pol katip Banabas kar ik: “Hawir pike euno ewir nawir yinan nises God nerer wit wit nipaa hawir wewepyapir him yaaim

<sup>r</sup> 15:24 Ap 15:1   <sup>s</sup> 15:28 Mt 23:4   <sup>t</sup> 15:29 Ap 15:20   <sup>u</sup> 15:32 Ap 11:27, 13:1, 14:22

me Krai, te hawir wawirtei hir nepu werek nisesim o au.”<sup>37</sup> Banabas hanhan keithis Jon Mak kaktikerek tariyakit tatno,<sup>38</sup> te Pol kinaain ap kaktiwekhis tariyakit tatno kentar nipaa hirak ap kepu ketikeret ere hirakit tiriak menmen epei au. Au, hirak kinaiwired keit provins Pamfilia.<sup>39</sup> Hirakit tenehakit tenehakit han enuk wisenum tentar menmen im te hirakit tinaipisakit ten. Banabas keithis Jon Mak hirakit tariyakit tau sip ten wit Saipras wan kimaak keketik.<sup>40</sup> Pol keithis Sailas tariyakit ten. Mit nises God en hir neriuwetet nitehi God naanmamprewekit.<sup>41</sup> Hirakit teke ti ten provins Siria ketike provins Silisia, hirakit tikaap mit ne weiwik me God ein tekepi hir han tokik enu enises God werek werek.

### Mitik Timoti kepno ketike Pol Sailas

**16**<sup>1</sup> Pol hirak ketike Sailas ten tiun wit Debi ketike Listra. Mitik kises him me God hirak kepu en, niuk mirak Timoti. Miye pirak hire wetikerek nises him me God miye pirak hire pe weiwik me Isrel te haai kirak au, hirak ke weiwik me mit Grik.<sup>2</sup> Mit yapirwe nises him me God neit wit Listra, wit Aikoniam hir natip nar ik: “Timoti hirak mitik yaaik.”<sup>3</sup> Pol hanhan kaktiwekhis te hirak kerekir yink kirak kaknip mit ne weiwik me Isrel han yaaik. Hirak kiriak menmen im kentar mit nerer wit wit menep ne weiwik me Isrel nertei Timoti haai kirak hirak mitik ke Grik, hirak ap kerekir yink kirak au.<sup>4</sup> Epei au, hirakit ten terer wit wit tatip mit kerek nises him me God, menmen mit aposel netike mit iuwe ninin naanmipre mit ne God neit Jerusalem hir natip mit ap ne weiwik me Isrel hir enisesim. Hirakit tetpor hir enisesim,<sup>5</sup> te mit ne weiwik me God neit ein hir han tokik nepu nises God werek werek. Mit han yapirwe hekrit hekrit neweikin sip newet menmen enum nises him me God.

### Pol kiwaai kityak kir mitik ke provins Masedonia

<sup>6</sup> Hirakit teke ti ten provins Frisia ketike Galesia tentar God Himin Yaaik ap kewisikit tatno provins Esia tatip mit miyapir him me Krai.<sup>7</sup> Hirakit ten ere tiun hin ke provins Misia, hirakit tare tatno provins Bitinia te God Himin Yaaik kerek Jisas kewet mit ek, hirak ap kewisikit tatno au.<sup>8</sup> Hirak ap kewisikit tatno au, te hirakit tinaaiwir Bitinia tekiuwe Misia ere tiun wit Troas.<sup>9</sup> Hirakit tipiuu wit Troas, witaan Pol kepu kityak kir mitik ke Masedonia kerp kitiwekhi kar ik: “Ti ehu sip enen wit kiau Masedonia ti ekepai.”<sup>10</sup> Pol kir menmen im epei au, (hi Luk hetikeret) haiu mewen menmen memi mekre tanik kiau haiu mare mamno provins Masedonia mentar haiu epei mertei God keninai kehimitenai mamno en mamtip mit miyapir him yaaim me Krai.

<sup>v</sup> 15:37 Ap 12:12, 25    <sup>w</sup> 15:38 Ap 13:13; Kl 4:10    <sup>x</sup> 15:39 Ap 4:36, 13:4    <sup>y</sup> 15:40 Ap 14:26    <sup>z</sup> 16:1 Ap 14:6; 2Ti 1:5    <sup>a</sup> 16:2 Fl 2:19-22    <sup>b</sup> 16:3 Ga 2:3-5    <sup>c</sup> 16:4 Ap 15:23-29  
<sup>d</sup> 16:5 Ap 2:47    <sup>e</sup> 16:6 Ap 18:23

### Mite Lidia wises him me God

<sup>11</sup>Haiu mau sip minaiwir wit Troas merekir wan mesipat wit yapirwe men ere mipiun wit Samotres. Haiu mipiun wit Samotres, haiu mipiun wit Niapolis. <sup>12</sup>Haiu mipiun Niapolis epei au, haiu minaiwir sip meke ti men wit Filipai kerek nipa mit ne wit iuwe Rom nan newik nenipek kire wit iuwe kinin wit ham me provins Masedonia. Haiu mepu wit eik wi ham. <sup>13</sup>Me wi Sabat haiu minaiwir wit men mani menep wit. Haiu han kitet mit nehimitan wit menep tipar eik te hir natip God menmen. Haiu mau en metike miyapir keriyen nererik nau mani eik haiu mewepnak. <sup>14</sup>Mite piutip pe miyapir kerek nererik en nemtau him maiu, hire niuk mire Lidia. Hire wises God wewenipiyek. Hire pe wit Taiataira, hire wesiuwe laplap mire yiwir wawit pewek mamrerim. Mitik Iuwe God hirak keweikin han kire te hire wemtau him Pol ketpim hire wisesim. <sup>15</sup><sup>f</sup>Hire wetike mit miyapir neit winak kire hir nitehi haiu mit mikiri neriuwe tipar. Haiu mikiri neriuwe tipar, hire witaihi war ik: “Yi han kitet hi hises him yaaim me Kraiss te yi einen eyu winak kai.” Hire wari han kaiu te haiu men mau en.

### Pol ketike Sailas tekre winak enuk teit wit Filipai

<sup>16</sup><sup>g</sup>Wi ham haiu mepno wit menep mani te matip God menmen, mite piutip kerek wiriak menmen me mit han, hire herwe enuk kau kekre han kire kekepye wewepyapir menmen maain te mamnen. Mit kerek naanmiprewe neit pewek yapirwe nentar menmen im. <sup>17</sup><sup>h</sup>Hire wises Pol ketikewai winap watip war ik: “Mit in hir niriak menmen me Mitik Iuwe God. Hir newepyapir netpai menmen haiu emisesim te God kakisak menmen enum haiu miriakem te hirak kaktaihis.” <sup>18</sup>Hire wiriakem warek wi yapirwe ere Pol han enuk keriuwep keweikin ketpiwe kar ik: “Hi hetput hekrehir ke Mitik Iuwe Jisas ti enke enopin ekeipniwe.” Hirak katip epei au, herwe kinaiwirep kirir ken waswas.

<sup>19</sup>Maain mit kerek naanmiprewe hir nertei herwe kenke kekeipniwe te hir ap nanit pewek mei au, hir neithis Pol ketike Sailas nerikit nen nir mit iuwe masistret neit wit nimek me wit mit nesiuwe him nererik neitai, <sup>20</sup><sup>i</sup>hir nerikit nen mit iuwe masistret ne Rom natip nar ik: “Mitikit it hirakit te weiwik me Isrel, hirakit tiriak enum me haiu mit mau wit ik e. <sup>21</sup>Hirakit tetpai menmen te hiram ap mises menmen mit nau iuwe ne Rom natip haiu emisesim au.” Haiu ap emises menmen mitikit it tetpaiyem au emit. <sup>22</sup><sup>j</sup>Mit miyapir yapirwe netikeri nesiuwe him. Epei au, Mit iuwe masistret neriyewekit klos mirakit newepim natip mit nir

<sup>f</sup> 16:15 Ap 16:33, 18:8   <sup>g</sup> 16:16 Ap 19:24   <sup>h</sup> 16:17 Mk 1:24, 34   <sup>i</sup> 16:20 Mk 13:9; Ap 17:6; Mt 5:11   <sup>j</sup> 16:22 2Ko 11:25; Fl 1:30; 1Te 2:2

naninen nanwaai nipin naniksip. <sup>23</sup>Hir nenke nipin naksip yapirwe. Te hir newiret tekre winak enuk, hir natip mitik naanmipre winak enuk te hirak naanempre mitikit werek werek. <sup>24</sup>Hirak kemtau him mir im epei au, hirak kewisikit tekre haau ke nimin kewis hit mirakit kemenekim mitet hei me nu nimenum metenen hit me mit.

<sup>25</sup>Me wi nimin Pol ketike Sailas hirakit titehi God menmen hirakit tine henye. Mit han nekre winak enuk ek hir nemtau menmen hirakit tinaam tetpim. <sup>26</sup>Hirakit tiriak menmen im, ti kitanik wisenum te winak enuk kiririr iuwe, waswas weipir yapirwe menke, sen hiram menke minatin men mekeipin mit yapirwe nekre winak eik. <sup>27</sup><sup>k</sup>Mitik naanmipre winak enuk kekrit kerenaan kir weipir yapirwe menke, hirak han kitet mit neit nimin en nepei nirir nen witeik. Hirak keket hine kirak kare kakwirek kaknep hirekes kentar hirak kinaain mit iuwe nanir mit enun epei netpaan nirir nen te hir han enuk neriuwerek nankip. <sup>28</sup>Hirak kaknep hirekes, au, Pol kinap him iuwe kesiniwek ketpiwek, “Au emit! Ti ap enep hirekes. Haiu mirir au haiu mepu in.” <sup>29</sup>Hirak katip epei au, mitik ik kenine mitik hak kakit si keyiyik kaknen. Hirak keit si keyiyik kan, hirak kesiuknen ken nimin hirak kepipir kitehir kewen ninip menep hit me Pol ketike Sailas. <sup>30</sup><sup>l</sup>Te hirak pike kekrit kerp kerikit ken witeik kitiwekithi kar ik: “Hi ariak mekam te God kakisak menmen enum mai hirak kaktauhis?”

<sup>31</sup>Hirakit teweniwekhi tetpiwek tar ik: “Ti ehises him me Mitik Iuwe Jisas te ti etike mite nikerek nit, God hirak kakisak menmen enum yi yiriakem.” <sup>32</sup>Hirakit tatip epei au, hirak ketiwekithis ten hirakit tewepyapir him me Mitik Iuwe Kraiss te hirak mitik ketike mit miyapir neit winak kirak nemtau him me God hirakit tetpim. <sup>33</sup><sup>m</sup>Hirakit tatip epei au, hiram wen wi nimin, mitik ik ketiwekhis ken kikir sip kirakit ere werek. Hirak kikir sip kirakit, Pol ketike Sailas tikir mitik ketike mit miyapir nirak neriuwe tipar. <sup>34</sup>Hirakit tikiri, hirak mitik eik ketiwekithis keyiyikit ken winak kirak kewetiwekit menmen taam. Hirak ketike mit miyapir neit winak kirak hir han yaaik nentar hir in ek nises him me God.

<sup>35</sup>Wanewik, mit iuwe masistret ne Rom nau wit, hir nesiuwe mit plisman nen winak enuk natip nar ik: “Yi eisiuwe mitikit wik hirakit tatno.” <sup>36</sup>Mit natip epei au, mitik naanmipre winak enuk kan katip Pol kar ik: “Mit iuwe masistret nesiuwe him natip yi yaino witeik, yi yaino God naanmampri me menmen.”

<sup>37</sup><sup>n</sup>Te Pol katip mit plisman kar ik: “Mit iuwe ap ninapin menmen enum hawir wiriakem te hir newep neit witeik mit yapirwe nirei. Hawir wire mit nau wit Rom hir ap nerekyawir menmen em mar im au nentar

<sup>k</sup> 16:27 Ap 12:18-19    <sup>l</sup> 16:30 Ap 2:37    <sup>m</sup> 16:33 Ap 15:16    <sup>n</sup> 16:37 Ap 22:25

mit iuwe neit wit Rom newis him mau tiwei neriuwesisem. In ek hir mit in nare nisawin menmen neriuwetawir a? Taau! Hir hiras naninen in nanriuwetawir euno witeik.”

<sup>38</sup>Hirak katip menmen im epei au, mit plisman pike nen natip mit iuwe him mirak. Hir epei nemtau Pol ketike Sailas hirakit tire mit ne wit Rom hir ninaain natip nar ik: “Haiu miriak menmen enum ye.” <sup>39</sup>Te hir nen nir Pol ketike Sailas, hir natip nar ik: “Yi yaaikit, haiu mepitari yi yire mit ne Rom.” Hir natip epei au, hir neriyakit ten witeik nitiwekithi te hirakit tinaaiwir wit kir. <sup>40</sup>Pol ketike Sailas hirakit tinaaiwir winak enuk ten winak ke Lidia. Epei au, hirakit tatip mit kerek nises him me God tetpor him mamkepi hir han tokik nanu. Hirakit tetpor him ere werrek, hirakit teit menmen teiyim tatnaaiwir wit Filipai tatno.

### Mit ne wit Tesalonaika nare naninep Pol ketike Sailas

**17** <sup>1</sup>Hirakit tinaaiwir Filipai, hirakit ten tewep wit Amfipolis. Hirakit ten tewep wit Amfipolis tesipatek, hirakit ten tewep wit Apolonia ten ere tipiun wit Tesalonaika kerek winak ke mit ne Isrel nererik nekine him me Moses neitai. <sup>2</sup>Pol keit in kiriak menmen kar ke nipaa hirak kiriakem keit wit hak. Me wi Sabat hirak ken winak kir. Me wi Sabat wikak hirak ketikeri newepnak natipan, hirak keit him me God mau tiwei ketporem keteiknorem kar ik: <sup>3</sup>“Mitik God kehimitanek hirak Krais, God hirak katip mitik ik kaki pike kakikrit. Mitik ik Jisas hi ewepyapir etpiyek hirak Mitik God kehimitanek hirak Krais kerekek kakikaap haiu mit ne ti.” <sup>4</sup>Mit miyapir han ne weiwik me Isrel hir nemtau him im hir nises Pol ketike Sailas. Mit han ne Grik kerek newenipi God, hir netike miyapir iuwe yapirwe ne Tesalonaika hir nisesikit.

<sup>5</sup>Te mit han ne weiwik me Isrel neit winak en hir ap nises him im hir yink enuk nentar mit yapirwe nises him mirakit. Hir nen ya neithis mit enun nau yain yain hir nesikeyaanmi nererik nen nari han ke mit yapirwe ne wit. Hir neweikin winak ke mitik niuk mirak Jeson nenke weipir ninatin Pol ketike Sailas te hir neriyakit nesiueret ten mit. <sup>6</sup>Hir ninetniwekit ninetniwekit au, hir nari mitik Jeson ketike mit han nises Krais, neriyei nen mit iuwe masistret ninap netpor nar ik: “Mit kerek niriak enum nerer wit wit epei nan in niriak enum. <sup>7</sup>Mitik ik Jeson kewisi nan nau winak kirak. Hir neweikin sip newet him me mit iuwe neit Rom. Hir natip nar ik: ‘Mitik iuwe king hak kinin Sisa, hirak niuk mirak Jisas.’” <sup>8</sup>Hir natip him im, hir nikiak han ke mit yapirwe neit wit, hir netike mit iuwe masistret. <sup>9</sup>Mit iuwe en nari pewek me mitik Jeson

<sup>o</sup> 16:39 Mt 8:34    <sup>p</sup> 17:1 1Te 2:1-2    <sup>q</sup> 17:3 Lu 24:26; Ap 3:18, 9:22    <sup>r</sup> 17:4 Ap 13:50

<sup>s</sup> 17:5 1Te 2:14    <sup>t</sup> 17:6 Ap 16:20    <sup>u</sup> 17:7 Lu 23:2; Jo 19:12

ketike mit han nises Kraiss te hir ap pike nanri han ke mit han neriuwe him me Kraiss. Hir nari pewek epei au, hir nesiupani neriuweti nen witeik.

### Pol ketike Sailas ten wit Beria

<sup>10</sup>Nepei witaan, mit in ne Tesalonaika kerek nises him me Kraiss hir neriuwet Pol ketike Sailas ten wit Beria. Hirakit ten ein epei au, hirakit ten winak kerek mit ne weiwik me Isrel nau nererik nekine him me Moses me wi Sabat. <sup>11</sup>Mit en hir yaain ninin mit ne wit Tesalonaika nentar hir nemtau him Pol ketpim, hir hanhanem. Hekrit hekrit hir nekine him me God mau tiwei te hir hanhan nanirtei menmen Pol ketpim hiram yaaim mire him nipaa God ketpim o au. <sup>12</sup>Mit miyapir yapirwe ne weiwik me Isrel nises him me Kraiss. Miyapir han ne Grik hir miyapir niuk mir iuwe, hir netike mit ne Grik yapirwe nises him me God. <sup>13</sup>Maain mit ne weiwik me Isrel ne wit Tesalonaika nemtau Pol wen kewepyapir katip him me God kar ke nipaa hirak kiriakem keit wit Beria, hir nan nikiak han ke mit en hir han kekrit enum. <sup>14</sup>Hir han kekrit enum te mit nises Kraiss hir ninaain mit naninep Pol kaki te hir neriuwetek kakno wit yanimin ke wan eik. Sailas ketike Timoti au, hirakit tepu Beria. <sup>15</sup>Mit kerek neriuwet Pol nen netikerek ere hir nipiun wit Atens. Epei au, hir epei nanino nir ein, Pol ketpor kar ik: “Yi eitip Sailas ketike Timoti hirakit tatnen waswas tatwenayipir tatit wit Atens.”

### Pol kewepyapir him me God keit wit Atens

<sup>16</sup>Pol wen keit wit Atens kemerir Sailas ketike Timoti, hirak han kekrit kentar hirak kir mit natin ninaan mau teinik yapirwe hiram mepu wit kir eik e. <sup>17</sup>Hiram mepu wit kir eik, te hirak ken winak kerek mit ne weiwik me Isrel hir netike mit ne Grik hir newenipi God, hirak ketikerei newepnak natipan me him me Kraiss. Hirak kepno en, hirak hekrit hekrit ken wit maket kerek mit nesiuwe menmen, hirak ketike mit miyapir nau en newepnak natipan him me Jisas Kraiss. <sup>18</sup>Mit han natip mit him me mitik Seno, hir netike mit han Stoik kerek hir natip mit him me mitik Epikurian, hir netike Pol newepnak natipan menmen. Hir mit han natip nar ik: “Mitik enuk wise tipar ik katip mekam?” Mit han natip nar ik: “Hirak katip menmen me God ke mit ne wit hak.” Hir natip menmen im nentar Pol ketpor him me Jisas Kraiss ketike him me mit epei naa pike nanikrit. <sup>19</sup>Te hir netiwekhis neriyaak neiyik nen kaunsil ke wit Ariopagas keit Atens. Hir netpiwek nar ik: “Hiau hanhan mamimtau him ham mit ti hatip mit em. <sup>20</sup>Him mei ti etpaiyem hiram hiau mepitariyem te ti etpaiyem te hiau mertei werek werek.” <sup>21</sup>Mit nau wit Atens netike

∨ 17:11 Jo 5:39    ∗ 17:12 Ap 13:50    × 17:13 Ap 14:19    √ 17:17 Ap 18:19

mit ne wit ham hir nau en hekrit hekrit hir nau yain yain natip him hir hanhan nemtau him ham mit nisesim.

<sup>22</sup>Hir nepei netpiwek, Pol kekrit kerp nimin ke mit ne kaunsil katip kar ik: “Yi mit ne wit Atens. Hi hertei yi yewenipi tipir yapirwe. <sup>23</sup>Hi heke ti herekir wit ki hi hir wit wit yi yewenipi tipir, hi hir kinaan kiutip yi yekine menmen im mewik: ‘Kinaan im me tipir hak haiu mit mepitari niuk mirak.’ Menmen yi mit in yepitari niuk mirak yewenipiyek, hi etpi niuk mirak. Niuk mirak God.

<sup>24</sup>“God hirak kewis ti ketike menmen yapirwe mewik. Hirak kinin naanmpre nepni metike ti te hirak ap kepu kekre winak mit nimiwekek. <sup>25</sup>“Hirak kiriak menmen yapirwe, te mit nankepik nanriak menmen taau. Hirak hirekes kewetai haiu mit himin te haiu mepu, hirak kewetai menmen yapirwe. <sup>26</sup><sup>b</sup>“Hirak kiutip hirak kinai haiu mit yapirwe haiu merer wit wit mau ti. Nipaa enum eik hirak kimat wi mit nau ti hirak kehimitan wit kerek hir nanwik. <sup>27</sup>Hirak kiriak menmen im te haiu mit minmetniwek ere minapinek misesik. God ap kerp yanimin ke haiu mit niutip niutip au. <sup>28</sup>Hirak kekepai haiu mepu ti haiu mamno in mamno ein. Hirak kire mit han ni nertei iuwe hir nekine him o hir nine henye hir natip nar ik: ‘Haiu mit haiu nikerek ne God.’ <sup>29</sup>“Haiu nikerek nirak te haiu ap han ekitet hirak kire gol o silva o nan mit niriakem hiram mar ke God au. <sup>30</sup>“Nipaa mit ap nertei God au, te hirak ap katip enum me menmen hir niriakem au. In ek God katip him manp mit yapirwe nau nerer wit wit nar ik: ‘Yi eiweikin sip eiwet menmen enum.’ <sup>31</sup>“God epei kimat wi hirak maain skelim mit miyapir yapirwe werek werek kakriuwe mitik hirak kehimitanek hirak kakriak menmen im. God hirak epei keteikin haiu mit yapirwe maain hirak kakriak menmen im kentar hirak kikiak mitik ik nipaa kaa hirak kekrit kepu.”

<sup>32</sup>Mit en hir nemtau Pol katip ke mitik kaa Pike kekrit kepu, mit han natip nitetnaan nenwesisek. Au, mit han netpiwek nar ik: “Maain haiu mamimtau ti etip menmen im eteipim.” <sup>33-34</sup>Epei au, Pol kinaaiwir mit ken. Mit han nen netikerek nises him me God. Mitik ke mit in nises him me God hirak mitik ke kaunsil Ariopagas niuk mirak Daionisias. Mite piutip niuk mire Damaris hire wetike mit miyapir han nises him me God.

### Pol katip mit miyapir ne Korin him yaaim me Kraiss

**18** <sup>1</sup>Pol katip him me Kraiss keit Ariopagas epei au, hirak kinaaiwir wit Atens ken wit Korin. <sup>2</sup><sup>8</sup>Hirak ken wit Korin, hirak kir mitik hak niuk mirak Akwila kerek nipaa miye pirak winaak keit wit Pontas.

<sup>z</sup> 17:24 1Kin 8:27; Ap 7:48    <sup>a</sup> 17:25 Sam 50:12; Ais 42:5    <sup>b</sup> 17:26 Diu 32:8    <sup>c</sup> 17:26 Ais 55:6; Sam 145:18; Jer 23:23    <sup>d</sup> 17:29 Jen 1:27; Ais 40:18-20, 44:10-17; Ap 19:26  
<sup>e</sup> 17:30 Ap 14:16    <sup>f</sup> 17:31 Sam 9:8, 96:13; Ap 10:42    <sup>g</sup> 18:2 Ro 16:3

Hirak ketike mite pirak Prisila in ek ninaaiwir wit iuwe Itali nan Korin nentar mitik iuwe Klodias kerek kinin naanmipre mit katip kar ik: “Mit yapirwe ne weiwik me Isrel hir eninaaiwir wit Rom.” Hirak Pol ken <sup>3</sup>kau winak kir kekepi nime winak laplap kentar hirak nipaa (hirak ap kises him me kraiss wen au) hirak kime menmen im keit pewek mererim, kar ke in hir nimaam. <sup>4</sup>Me wi Sabat yapirwe Pol ken winak ke mit ne Isrel ein kerek hir nekine him me Moses, hirak ketikeri newepnak natipan, hirak kare kakteiknor him mirak yaaim me Kraiss te hir enisesim

<sup>5</sup>Me wi Sailas ketike Timoti tinaaiwir provins Masedonia tan wit Korin, Pol ap pike kime winak ke laplap au. Hekrit hekrit hirak katip mit ne weiwik me Isrel nau en ketpor kar ik: “Jisas hirak Mitik Kraiss kerek God nipaa kehimitanek kan kikaap mit ne Isrel.” <sup>6</sup>Hir au nemniniwek him mirak netpiwekit enum, te Pol kitanik laplap mirak keteiknor God ap kesak menmen enum mir au mepu, hirak ketpor, “Yi yayi te yi yayi. Hiram menmen mai au, hiram menmen mi. Me in ek hi eweikin sip eweti, hi eno mit ap ne weiwik me Isrel etpor him yaaim me Kraiss.” <sup>7</sup>Epei au, hirak kinaaiwir winak ke mit en nererik nekine him me Moses, hirak ketike Sailas, Timoti ten tau winak ke mitik hak niuk mirak Tisias Jastas. Hirak ap ke weiwik me Isrel te hirak kises him me God. Winak kirak kiwaai kirapit winak ke mit ne Isrel kerek hir nau nererik nekine him me Moses en. <sup>8</sup>Mitik niuk mirak Krispas hirak kinin naanmipre mit ne winak kerek mit ne Isrel nererik nekine him me Moses en, hirak ketike mite pirak nikerek nirak nises him me mitik iuwe Kraiss. Mit yapirwe nau wit Korin nemtau him me God te hir nisesim, Pol ketike Sailas tikiri.

<sup>9</sup>Witaan ham Pol kiwaai kityak, Mitik Iuwe God ketpiwek kar ik: “Ti ap hinaain au. Ti wen etip mit him mai. <sup>10</sup>Hi hau hetikewit, mitik kiutip ap te kakitep au kakintar mit yapirwe neit wit ik e hir nises him mai.” <sup>11</sup>Epei au, Pol kepu wit eik me tito miutip wenke mar hispinak kiutip (6), hirak katip mit miyapir him me God.

<sup>12</sup>Me wi im mitik iuwe ke Rom kehimitan mitik Galio hirak ap ke weiwik me Isrel, hirak kinin naanmipre provins Akaia. Hirak kire mitik iuwe gavman ke mit ne Grik, te hir mit ne weiwik me Isrel nau en nekiyan niutip neithis Pol neriyaak neiyik nen mitik iuwe Galio hir nesiuwe him netpiwek nar ik: <sup>13</sup>“Mitik ik kari han ke mit te hir ap nises him me Moses hir ap newenipi God werek werek au.” <sup>14</sup>Pol kare kaktip him te mitik iuwe Galio katip mit en ketpor kar ik: “Yi mit ne Isrel. Mitik ik kiriak menmen enum kekintip menmen o kenep mitik kaa te hi herp hemtau menmen yi yetpewem. <sup>15</sup>Au, hiram menmen me him metike

<sup>h</sup> 18:3 Ap 20:34; 1Ko 4:12    <sup>i</sup> 18:5 Ap 17:14-15, 9:22    <sup>j</sup> 18:6 Ap 13:46, 51, 20:26; Lu 9:5

<sup>k</sup> 18:8 1Ko 1:14    <sup>l</sup> 18:9 1Ko 2:3    <sup>m</sup> 18:10 Jos 1:9; Ais 41:10; Jer 1:8; Jo 10:16    <sup>n</sup> 18:15 Ap 23:29, 25:18-19; Jo 18:31



niuk mei me him me Moses yi yisesim. Yi hiras eyitpim ere werek. Hi au hinapen emtau menmen weinim marim.”<sup>16</sup> Hirak katip epei au, hirak katip mit plisman nirak hir neri nen witeik.<sup>17</sup> Epei au, hir mit en neithis mitik iuwe hak kinin naanmipre mit nises him me Moses hir neriyaak nen nerp witeik nakip. Mitik Galio ap han kekrit ke menmen im au, hirak katip kar ik: “Menmen weinim.”

### Pol pike ken wit Antiok ke provins Siria

<sup>18</sup> Pol kepu wit Korin ketike mit nises him me God me wi yapirwe. Epei au, hirak kau sip ketike Prisila wetike mitik kire Akwila, hir nerekir wan nen provins Siria. Nipaa hir nau sip wen au, Pol katip God him me kimat wi keriuwesis menmen. Wi epei au, hirak mitik kime Pol paan kirak keit wit Senkria (keteikin mit wi hirak keriuwesis menmen me hirekes hiram epei au).<sup>19</sup> Hir nipiun wit Efesas, Prisila wetike mitik kire Akwila hir nau en. Pol ken winak kerek mit nau nererik nekine him me Moses en, hirak ketike mit ne weiwik me Isrel hir newepnak natipan me him me Kraiss.<sup>20</sup> Hir nitiwekhi kaku kaktikeri me wi yapirwe te hirak kewenhi au.<sup>21</sup> Hirak ketpor kar ik: “God hanhan hi pike enen te hi enen eri.” Hirak ketpor epei au, hirak kerekek kau sip kinaaiwir wit Efesas.<sup>22</sup> Hirak kipiun wit Sisaria epei au, hirak kinaaiwir sip ken wit eik keke ti ken wit Jerusalem en kir mit nises him me God ein. Epei au, hirak pike ken wit Antiok.

### Pol pike kepno ein ein kikaap mit kerek nises him me Kraiss

<sup>23</sup> Pol kepu wit Antiok wi ham, hirak kinaaiwir mit en ken provins Galesia ketike provins Frisia kerer wit kike kike em kikaap mit kerek nises him me God han tokik nepu.

### Apolos katip mit miyapir ne wit Efesas him me Kraiss

<sup>24</sup> Wi ham, mitik hak niuk mirak Apolos, hirak ke weiwik me Isrel, nipaa miye winaak keit wit Aleksandria, hirak kan kau wit Efesas. Hirak kertei katip him yaaim, hirak kertei him me God mau tiwei werek werek.<sup>25</sup> Mit nipaa neteikniwek menmen me Mitik Iuwe God te hirak han yaaik wisenum keriuwe him me God katip mit menmen yapirwe Jisas epei kiriakem. Te hirak kertei menmen me Jon kerek nipaa kikir mit keriuwe tipar weinim.<sup>26</sup> Hirak kan winak ke mit ne Isrel nau nererik nekine him me Moses en, hirak katip him iuwe ap kinaain mit au. Akwila ketike Prisila nemtau hirak katip epei au, hir neriyaak nen winak kir netpiwek nekepik kertei werek him me Jisas epei kan ti kikaap haiu mit hirak kaa

° 18:18 Ap 21:24    ¢ 18:19 Ap 17:17    ¤ 18:21 Ro 1:10; 1Ko 4:19; Je 4:15    ¤ 18:25 Ro 12:11; Ap 19:3    \* 18:26 Ap 19:8

God pike kikiak kekrit kepu. <sup>27</sup>Hir netpiwek menmen im epei au, Apolos han kitet kakno provins Akesia ke Grik te mit en nises him me God nekine tiwei natip mit nises God en hir naanmamrewek. Hirak ken en, hirak kikaap mit en kerek nises him yaaim me Kraiss nentar God kerekyor yaaim. <sup>28</sup>Hirak ketike mit ne weiwik me Isrel newepnak natipan te hirak keriuwe him iuwe mirak hirak keteikin mit miyapir him me mit en hiram ap yaaim. Hirak keriuwe him me God mau tiwei, hirak katip mit keteiknor Mitik Jisas kerek hirak Mitik Kraiss kerek God kehimitanek kikaap mit.

**Pol katip mit miyapir neit wit Efesas him yaaim me Kraiss**

**19** <sup>1</sup>“Mitik Apolos wen kepu wit Korin, Pol kepno ken kiun provins Galesia ketike Frisia ere kipiun wit Efesas. Kipiun Efesas, hirak kir mit han nises him me Jisas. <sup>2</sup>Te hirak kitorhi kar ik: “Nipaa yi yises him me Jisas God Himin Yaaik kan kau kekre han ki o au?” Hir neweniwekhi nar ik: “Hiau ap memtau God Himin Yaaik kepu au.” <sup>3</sup>Pol pike kitorhi, “Hir nikri nekine niuk me keimin?” Hir natip nar ik: “Hir nikrai nekine niuk me Jon.”

<sup>4</sup>Pol katip kar ik: “Jon kikir mit kerek neweikin sip newet menmen enum, hirak katip mit ne weiwik miutip me Isrel hir enises hirak mitik kerek maain kaknen. Hirak niuk mirak Jisas, hirak Mitik Kraiss kerek God kehimitanek kikaap hiau mit.” <sup>5</sup>Hir nemtau menmen im, hir newis Pol kikiri keriuwe tipar kekine niuk me Mitik Iuwe Jisas. <sup>6</sup>Hirak kikiri epei au, Pol kewis his menteri te God Himin Yaaik kan kau kekre han kir keneisesi hir natip him ham nipaa hir nerteiyem au, hir natip him me God. <sup>7</sup>Pol kikiak menmen im me mit nar ke hiswiyen wik (12).

<sup>8</sup>Hirak kikiak menmen im epei au, Pol ken winak kerek mit ne weiwik me Isrel nau nererik nekine him me Moses. Hirak katip mit him me God, hirak ap kinaain mit au. Hirak ketpor ere wenke wikak, hirak ketikeri newepnak natipan. Hirak kare kakri han kir te hir han kitet menmen hirak ketpor me God kinin naanmipre mit. <sup>9</sup>Mit han au enun han tokik hir ninapen nanisesim, hir natip enum me menmen me God mit in nisesim me ninaan me hir mit yapirwe. Hir natip enum te Pol ketike mit hir nises him mirak ninaaiwir mit en. Hekrit hekrit Pol ken winak skul ke mitik Tirinas ketike mit hir newepnak natipan him me God. <sup>10</sup>Hirak kikiak menmen marim me tito wik, te mit yapirwe nau provins Esia, hir mit ne Isrel, hir mit han ne weiwik ham nemtau him yaaim me Mitik Iuwe Kraiss.

<sup>†</sup> 18:27 2Ko 3:1; Kl 4:10    <sup>‡</sup> 19:1 1Ko 3:6    <sup>¥</sup> 19:2 Ap 2:38, 8:16; Jo 7:39    <sup>∞</sup> 19:4 Mt 3:1-2  
<sup>×</sup> 19:6 Ap 8:17    <sup>∫</sup> 19:9 2Ko 6:14-18; 2Ti 1:15

### Him me nikerek ne mitik Siva

<sup>11</sup> God kiriak menmen yaaim keriuwe Pol kikaap mit keriuwerem. <sup>12</sup> Mit han neit laplap hankisip o laplap iuwe miwaai yink ke Pol hir neiyim nen mit ninap te mit han ninap hir nire yaain, mit han herwe mersisi hiram metpaan menpin mekeipnor hir nire yaain.

<sup>13</sup> Mit han ne weiwik me Isrel hir nepno neprer wit wit nepir herwe enum mekre mit. Wi ham mit han in hir nanipir herwe nanriuwe niuk me Jisas. Hir natip herwe enuk nar ik: “Haiu metpi mekrehir ke Jisas kerek Pol katip mit en ek. Yi einopin ekeipin mitik ik.” <sup>14</sup> Hir nikerek hispinak wik (7) ne mitik iuwe pris niuk mirak Siva ke weiwik me Isrel, hir keriyen niriak menmen marim. <sup>15</sup> Au, herwe enuk ketpor kar ik: “Hi hertei Jisas, hi hertei Pol, te yi mit yi neimin a?” <sup>16</sup> Mitik kerek herwe enuk kersisek kekrit kanip wisenum kerekir yink kir kewep klos mir te hirak kinini. Hir nirir ninaaiwir winak hemkre merer yink kir hir ne yink weinik nirir. <sup>17</sup> Mit han yapirwe ne Isrel, mit han ne weiwik ham, hir nau wit Efesas nemtau me menmen im te hir nepirpir newenipi niuk me Jisas. <sup>18</sup> Mit miyapir yapirwe kerek nises him me God nan newepyapir menmen enum hir nepei niriakem. <sup>19</sup> Mit miyapir han, kerek netenwo henpin o marila menmei marim, hir neit tiwei mir meteiknor menmen im hir neiyim nan newirem mekre si me ninaan me mit yapirwe. Mit han newenhis pewek me mit newirem neiyim neit tiwei im hiram mar 50,000 pewek silva. <sup>20</sup> Marim him me Mitik Iuwe Kraiss men merer wit wit te mit miyapir yapirwe nisesim.

### Mit ne wit Efesas nesikeyaanmi nare naninep Pol

<sup>21</sup> Menmen im epei man, God Himin Yaaik kari han ke Pol te hirak han kitet kakno provins Masedonia kaktike Akaia. Te maain, hirak kakno wit Jerusalem. Pol katip kar ik: “Hi ano wit Jerusalem epei au, te hi eno wit Rom.” <sup>22</sup> Pol keriuwet mitikit wik hirakit tekepik, hirakit tinin ten Masedonia, hirak wen kepu provins Esia.

<sup>23</sup> Me wi im, mit han neit wit Efesas han enuk nentar mit nises him me Mitik Iuwe Kraiss. <sup>24</sup> Mitik hak niuk mirak Demitrias hirak kime menmen keriuwe silva. Hirak kime winak kike kike silva kire winak iuwe ke tipir niuk mire Atemis mit nen newepniipi niuk mire nekrerek. Menmen hirak kimaam hirak ketike mit han nesiuwerem men mit hir neit pewek yapirwe mererim. <sup>25</sup> Te hirak kenine mit nime menmen me silva netike mit han hir niriak menmen mar ke hir niriakem hir nererik, hirak ketpor

<sup>z</sup> 19:11 Ap 14:3    <sup>a</sup> 19:12 Ap 5:15    <sup>b</sup> 19:13 Mk 9:38    <sup>c</sup> 19:15 Mk 1:24, 34    <sup>d</sup> 19:17 Ap 5:5, 11    <sup>e</sup> 19:20 Ap 12:24    <sup>f</sup> 19:21 Ap 23:11; Ro 1:13    <sup>g</sup> 19:22 Ro 16:23; 2Ti 4:20  
<sup>h</sup> 19:23 2Ko 1:8    <sup>i</sup> 19:24 Ap 16:16

kar ik: “Yi mit yi yertei haiu meit pewek me menmen metike menmen meiyam meriuwe menmen im haiu miriakem. <sup>26j</sup>Yi epei yir menmen, yi yemtau menmen mitik ik Pol kiriakem keit wit kaiu Efesas kerekek au. Ke provins Esia Pol kari han ke mit miyapir yapirwe hir neweikin sip newet menmen, hirak ketpor kar ik: ‘Menmen mit nimaam mire teinik ninaan mewik hiram ap mire God au. Hiram memipin.’ <sup>27</sup>Menmen im Pol ketpim maain hiram mamnip mit hir han ekitet menmen haiu mit in miriakem hiram enum. Im keremem au. Winak yaaik ke teinik ninaan mewik iuwe me mite pauu Atemis maain mamre niuk weinim te mit nanisesye au. Mit yapirwe neit Esia netike mit nerer wit wit newenipi niuk mire.”

<sup>28</sup>Mit yapirwe nemtau him mirak epei au, hir han enuk nenepip natip nar ik: “Atemis pe Efesas hire yaaip iuwe.” <sup>29k</sup>Mit nerer wit wit ke wit iuwe Efesas nenepip natip. Mit han nen neithis Gaias ketike Aristakas hirakit te provins Masedonia kerek tekite Pol tepno ein ein, hir neriyakit neiyit nen wit kerek mit nau nererik nemtau menmen. <sup>30</sup>Pol hirekes hanhan kakno ein kaktip mit menmen te mit han en nises him me God newenek. <sup>31l</sup>Mit han hir mit iuwe gavman ne provins Esia kerek nire nirak yinan o wariyakit nirak hir nesiuwe him netpiwek hirak ap kakno kaktip mit menmen au emit.

<sup>32</sup>Mit han neit wit mit nererik newik hir natip him ham, mit han natip him ham nentar hir yapirwe nepitari nenmak te hir nererik nau en. <sup>33</sup>Mit han ne weiwik me Isrel neriuwet mitik niuk mirak Aleksanda kerp kinin kentir kinaan te mit han en han kitet hirak kerekek kinin kiriak menmen enum im. Hirak kikiam his kesinor hir enkintip enimtau menmen hirak kakitpim. <sup>34</sup>Au, mit en nertei Aleksanda hirak ke Isrel, hir yapirwe natip nerekirowek him natip nar ik: “Atemis pe Efesas hire yaaip iuwe.” Hir nenepip narek ere 2 aua.

<sup>35</sup>Maisiu kike, kuskus ke wit Efesas hirak kenip mit en nekintip nau neit hirak ketpor kar ik: “Yi mit ne Efesas. Mit yapirwe nertei wit kaiu ik e hirak wit naanmipre winak iuwe ke teinik ninaan mewik me mite iuwe yaaip Atemis wetike nan mit newenipiyek nipaa kau nepni kenke kan. <sup>36</sup>Mitik kei ap kaktip menmen im hiram memipin au, te yi mit eikintip yi ap yiriak menmen enum waswas au emit. <sup>37</sup>Yi epei yeithis mitikit wik it te hirakit ap tekintip menmen meit winak ke Atemis o netpiwe enum au. <sup>38</sup>Mitik Demitrias ketike mit hir niriak menmen mirak nare nansiuwe him mitik hir enino mit iuwe masistret hir nanmerir wi hir nanimtau him me mit. Hir nansiuwe him ein, <sup>39</sup>o au en, yi hanhan eitip him meiyam em, yi wen eimerir wi me haiu mit ne wit Efesas haiu mererik memtau him me mit iuwe ne witeik. <sup>40</sup>Mit iuwe ne Rom hir nansiuwe him nantip haiu mit miriak enum mesiuwe him mesikeyaanmi. Haiu mit

<sup>j</sup> 19:26 Ap 17:29 <sup>k</sup> 19:29 Ap 20:4, 27:2; Kl 4:10; Fm 24 <sup>l</sup> 19:31 2Ti 1:15

iuwe ap te metpor yi yenmak yi yiriak menmen marim au.” <sup>41</sup>Hirak katip epei au, hirak kesiuwe mit en hir nen wit kir eik.

### Pol keke ti kepno provins Masedonia ketike Grik

**20** <sup>1</sup>Mit nererik nesikeyaanmi epei au, Pol kenine mit kerek nises him me Jisas keyewewi ketpor him mamkepi nanises him me God werék werék. Te hirak kinaiwiri kakno provins Masedonia. <sup>2</sup>Hirak ken kipiun provins Masedonia, hirak kerekir kau nimin ken kerer wit wit katip mit him mirak yapirwe mamkepi nanises him me God werék werék. Epei au, hirak ken provins Grik. <sup>3</sup>Hirak kepu en wenke wikak. Hirak kepu en wenke wikak, hirak kare kaku sip kakno Siria, hirak kemmau mit han hir nimenipin nankip, te hirak han kitet kakno kakitet provins Masedonia ere hirak kinaiwirek kipiun provins Siria. <sup>4</sup>“Sopata nikan ke Piras ke wit Beria, hirak ketike Aristakas, Sekandas hirakit te wit Tesalonaika, hirakit tekite Pol tariyakit ten. Mitik Gaias ke wit Debi, Timoti, Tikikas ketike Trofimas te Esia, hirakit tetike Pol nariyan nen. <sup>5</sup>Hir mit ninin nen nemeriyei neit wit Troas. <sup>6</sup>Hir nemeriyei neit ein, haiu mau wit Filipai ere wi mit nererik ap newis yis mekre bret mir han tewenin menmen God kerekoyorem hiram epei au. Menmen im epei au, haiu minaaiwir wit Filipai mau sip ere wi hispinak (5), haiu mipiun wit Troas. Haiu men mipiun wit Troas, haiu metike mit nemeriyei mau en ere wi hispinak wik (7).

### Pol kikiak Yutikas kerek hirak kaa keit wit Troas, hirak pike kekrit kepu

<sup>7</sup>“Me wi Sabat me witaan haiu mit yapirwe mererik maam menmen han tewenin menmen Jisas kiriakem haiu mewenipi God. Pol katip mit en menmen. Hirak kare teipmen kakno te hirak ketpor him ere wi nimin. <sup>8</sup>Mit epei neit si yapirwe newisim mekre haau mau niu meit winak haiu mau mererik mekretek. <sup>9</sup>Mitik pipiak niuk mirak Yutikas kau windo me winak. Pol wen katip katip, hirak kinapipi kiwaai kinatin. Kiwaai kinatin o, hirak kenke kau niu ken kiun ti. Mit nekiuwe nen nikiak nirek nepei au kaa. <sup>10</sup>“Pol kekintip kekiuwe ken kirek, hirak kenke kenterik kesiuwewik. Epei au, hirak katip kar ik: “Yi ap han enuk au emit! Hirak kaa te in ek pike kekrit kaku.” <sup>11</sup>Hirak katip epei au, hirak ketikeri pike ninu nen winak hirak kewep niu o bret ketikeri nekiyan naam. Epei au, hirak ketikeri newepnak ere wanewik. Wanewik, Pol kinaiwiri. <sup>12</sup>Pol kinaiwiri, hir neithis pipiak ik kerek nipaa kenkewin kaa Pol pike kikiak, hir nen winak mir hir han yaaik iuwe.

### Pol kinaaiwir wit Troas kipiun wit Mailitas

<sup>13</sup>Haiu minin men mau sip merekir wan ere mipiun wit Asos, kerek Pol katip kakwenyipi sip. Nipaa hirak ketpai menmen im kentar hirak

<sup>m</sup> 20:4 Ap 19:29, 21:29; Ef 6:21    <sup>n</sup> 20:7 Ap 2:42, 46    <sup>o</sup> 20:10 1Kin 17:21

kinapen sip, hirak hanhan keke ti kakno ein. <sup>14</sup>Hirak kewenaiyipir keit Asos epei au, haiu metiwekhis men mau sip minaaiwir wit Asos men ere miun Mitilini. <sup>15</sup>Haiu mipiun Mitilini epei au, haiu me wi ham wanewik men mesipat wit Kaios. Haiu wen men me wi ham hekrit haiu men mesipat wit Semos. Wit Semos epei au, wi ham haiu mipiun wit Mailitas. Sip miwaai meit ein. <sup>16</sup>Pol epei han kitet hirak kau sip ap kakno wit Efesas kentar hirak kinapen kaku provins Esia wi yapirwe. Hirak hanhan kakno waswas kakiun Jerusalem me wi Pentekos.

### Pol katip him mirak men mit iuwe nises God neit wit Efesas

<sup>17</sup><sup>p</sup>Pol wen kepu sip keit Mailitas hirak keriuwet mitik hak katip mit iuwe ne weiwik me God neit Efesas te hir eninen Mailitas enirek. <sup>18</sup><sup>q</sup>Ewaai meruri hir mit ne Efesas epei nan, Pol ketpor kar ik: “Yi epei yertei me wi hi hinin han Esia hau hetikewi yi yertei menmen hi hisesim. <sup>19</sup><sup>r</sup>Yi yertei me wi yapirwe mit han ne weiwik me Isrel hir nimenipin natipan naniyep te hir nenip menmen im menip han kai kekrit hir newaank hiras. Hi ap ewenipi niuk mai au. Hi hiriak menmen Mitik Iuwe Krais kehimitenewem, wi ham hi hikit henterim. <sup>20</sup>Hi ap hepakin him mamkepi me wi hi hewepyapir him me God yi yau winak ke mit kerek nekine him me Moses yi yererik en o yau winak mi miutip miutip. <sup>21</sup>Hi epei hetpi yi mit ne weiwik me Isrel netike yi mit ne weiwik ham, hi epei hetpi him manp eiweikin sip eiwet menmen enum eiyises him me Mitik Iuwe kau Jisas. <sup>22</sup><sup>s</sup>In ek hi hises him God Himin Yaaik ketpewem te hi eno wit Jerusalem. Hi hepitari menmen mit nanrektywem nanit ein. <sup>23</sup><sup>t</sup>Hi hertei kerekek God Himin Yaaik epei ketpo merer wit wit mit nanrektyo enum nanwire akre winak enuk.

<sup>24</sup><sup>u</sup>“Hi han kitet hi hahi te hi ehises menmen nipaa Mitik Iuwe Jisas kehimitena hi ehisesim, hiram menmen weinim. God epei kiriak mit menmen yaaim keriuwe Jisas Krais te hirak kehimitena hi hetpor him yaaim me menmen im.

<sup>25</sup>“Yi eiyimtwem. Nipaa hi hen yi mit yapirwe hewepyapir him me God kinin naanmipre haiu mit. In ek hi hertei maain hi ap eri meiyam au. <sup>26</sup><sup>v</sup>Te hi petepin hetpi him manp, mitik kiutip ke yi mit maain kakno si tatiknenik hiram menmen mai au. <sup>27</sup>Hiram menmen mai au mentar hi ap heripakin him mei me menmen me God kakinin naanmamre haiu mit au. <sup>28</sup><sup>w</sup>Yi naanempre hiras yetike mit kerek God Himin Yaaik kehimiteni yi naanmipri. Yi yar ke mit naanmipre sipsip yi naanempre mit ne weiwik me God. Hirak kenip mit hir ne weiwik mirak keriuwe hemkre

<sup>p</sup> 20:17 Ap 18:21    <sup>q</sup> 20:18 Ap 18:19, 19:10    <sup>r</sup> 20:19 Ap 20:3    <sup>s</sup> 20:22 Ap 19:21

<sup>t</sup> 20:23 Ap 9:16, 21:4, 11    <sup>u</sup> 20:24 Ap 21:13; 2Ti 4:7    <sup>v</sup> 20:26 Ap 18:6    <sup>w</sup> 20:28 1Ti 4:16; 1Pi 5:2-4

me Nikan kirak Jisas wi hirak kaa kentar nu tentarakit. <sup>29</sup>\*Hi hertei hi anaiwiri epei au, maain mit naninen nimin ke yi mit nanriwaank han ki nanriuwe menmen enum hir nanitpiyem. Mit in hir nanre nepere enum men nimin ke sak namip newaankem, hir naninen nanriwaank. <sup>30</sup>†Maain mit han ne yi mit hir nantip him memipin nanri han ke mit han ne yi mit kerek yises him me God te hir enisesim. <sup>31</sup>‡Yi naanmamre hiras me menmen im, yi han ekitet me tito wikak hi witaan wanewik hetpi him manp me menmen me God te yi eiyisesim, hi hikiti hekepi wisenum.

<sup>32</sup>“In ek hi hitehi God hirak naanmamri te him me God hirak kakrekyi yaaim hiram mamkepi te yi eiyu werek werek. Hirak kakweti menmen mirak yaaim hirak maain kakwet mit nirak em. <sup>33</sup>‡Hi ap hemkre menepam heit pewek me yi mit o laplap mi au. <sup>34</sup>‡Yi epei yertei hi hiriak menmen heriuwe his mai hi ekerwo laplap me winak sel te hi heit pewek mererim. Hi hetike mitikit wariyakit tai naanmiprawir hiras me menmen. Yi au. <sup>35</sup>‡Marim hi epei heteikni yi eiriak menmen iuwe te yi eikaap mit miyapir hir ap manpenun neit niriak menmen au. Yi han ekitet menmen nipaa Jisas ketpim. Hirak katip kar ik: ‘Yi eiwet mit menmen hiram minin mit hir nanweti menmen, te yi han yaaik eiyu.’”

<sup>36</sup>‡Pol ketpor epei au, hirak ketikeri nitehir newen ninip nitehi God menmen. <sup>37</sup>‡Hir nitehi God menmen epei au, hir nikitek neiyewewik netpiwek, “Ti yaaik eno e.” <sup>38</sup>‡Pol ketpor kar ik: “Maain hi ap pike eri meiyam au,” te mit en hir han toenuk neriuwerek. Hir netpiwek epei au, hir neriuwetek kau sip ken.

### Pol ketike wariyakit tirak tau sip tatno Jerusalem

**21** <sup>1</sup>Haiu metpor “Eiyu en,” te haiu mau sip minaiwiri men. Haiu minaiwiri men, haiu merikir wan metin ke nimin mesipat wit Kos. Wi ham haiu mesipat wit Ros. Haiu mesipat wit Ros, haiu men ere mipiun wit Patara. <sup>2</sup>Haiu mipiun wit Patara, haiu menke minaiwir sip im minmatin sip ham mamrei mamno Finisia te haiu man mewim men. <sup>3</sup>Haiu men ere haiu mir Saipras te haiu mesipatek men pinak ke his yaaim wen mepno ere mipiun provins Siria. Haiu menke minaiwir sip meit wit Taia, wit kerek mit nau sip naninke menmen mekre sip. <sup>4</sup>‡Haiu epei men mir mit han nises him me Miik luwe Krai te haiu mau metikeri me wi hispinak wik (7). God Himin Yaaik kikiak han ke mit en te hir natip Pol ap kakno wit Jerusalem. <sup>5</sup>‡Au, wi hispinak wik (7) haiu minaiwiri men. Hir mit netike miyapir nikerek nir neriuwetai ere haiu men tenhaan ek. Haiu men tenhaan ek, haiu mewen ninip mitehir haiu

\* 20:29 Mt 7:15; Jo 10:12 † 20:30 1Jo 2:19 ‡ 20:31 Mk 13:37; Ap 19:8, 10; 1Te 2:11

‡ 20:32 Ap 26:18 ‡ 20:33 1Sml 12:3; 1Ko 9:11-12 ‡ 20:34 Ap 18:3; 1Te 2:9 ‡ 20:35 Mt 10:8 ‡ 20:36 Ap 21:5 ‡ 20:38 Ap 20:25 ‡ 21:4 Ap 20:23 ‡ 21:5 Ap 20:36

mitehi God menmen. <sup>6</sup>Haiu meketanhis haiu metpor “Eiyu en.” Haiu metpor epei au, haiu men mau sip, hir mit en pike nen witeik.

**Agabas katip Pol menmen God Himin Yaaik  
keteikniwekem keit wit Sisaria**

<sup>7</sup>Haiu mau sip pike men minaaiwir wit Taia men ere mipiun wit Tolemes. Haiu mipiun Tolemes, haiu men mir mit en nises him me Kraiss haiu mau metikeri wi miutip. <sup>8</sup><sup>i</sup>Wanewik haiu mit metike Pol minaaiwir Tolemes men ere mipiun wit Sisaria. Haiu mipiun Sisaria, ein ek haiu men mau winak ke Filip mitik kerek katip mit miyapir him yaaim me Kraiss. Hirak kiutip ke mit hispinak wik (7) nipaa mit nehimiteni naanmipre menmen me miyapir mikaan nir epei naa. <sup>9</sup><sup>j</sup>Hirak kine nikerek hiram (o hiram) tekyaaait (4), hir neit mikaan wen au, hir newepyapir menmen maain mamnen.

<sup>10</sup><sup>k</sup>Haiu mepu en wi ham, mitik profet niuk mirak Agabas kinaaiwir provins Judia kan Sisaria. <sup>11</sup><sup>l</sup>Hirak kan Sisaria, hirak keit waai let ke Pol keyiik kesenkek hirekes his hit mirak keriuwerem. Hirak kesenkek his hit keriuwerem te hirak katip kar ik: “God Himin Yaaik katip kar ik: ‘Mitik ke let ik e maain kakno wit Jerusalem, mit ne weiwik me Isrel nantiwekhis nansenkekik kar ik nanwet mit ne weiwik ham ek.’ ”

<sup>12</sup><sup>m</sup>Hirak katip epei au, haiu metike mit han en metpiwek mewenek mar ik: “Ti ap eno wit Jerusalem au ekit.” <sup>13</sup><sup>n</sup>Au Pol kewenhi kar ik: “Yi yenmak yi yikit yari han kai? Hi han kitet hiram yaaim te hi ano winak enuk kerekek au. Hi han kitet hiram yaaim te hi hatip mit miyapir him me Mitik luwe Jisas mit han hir naniyep hi hahi, hiram menmen weinim.” <sup>14</sup>Haiu metpiwek metpiwek au. Hirak ketaihim kewirem, haiu mekintip merp matip mar ik: “Han kit. Haiu hanhan menmen me Mitik luwe Kraiss hiram mamnen.”

**Pol katip mit iuwe ne mit ne God neit Jerusalem him mirak**

<sup>15</sup>Haiu mepu en wi ham. Epei au, haiu memani menmen maiu, haiu minaiwiri men wit Jerusalem. <sup>16</sup>Mit han nises him me Kraiss nau neit wit Sisaria nan netikewai, hir nen newisai neit winak ke mitik kerek haiu mamu mamtikerek niuk mirak Neson, hirak nipaa ke wit Saipras. Hirak kises him me Kraiss nipaa enum eik ere in. <sup>17</sup>Maain haiu mipiun wit Jerusalem, mit en nises him me Kraiss han yaaik hir netaihis.

<sup>18</sup><sup>o</sup>Hir netaihis haiu mau wi ham, hirak Pol ketikewai men mir Jems. Mit iuwe ninin naanmipre mit nises him me Kraiss nererik newenipiyek, hir nau netikerek. <sup>19</sup><sup>p</sup>Pol ketpor hir yaain, ketpor hir yaain epei au, hirak

---

<sup>i</sup> 21:8 Ap 6:5, 8:40    <sup>j</sup> 21:9 Ap 2:17    <sup>k</sup> 21:10 Ap 11:28    <sup>l</sup> 21:11 Jo 21:18; Ap 20:23, 21:33  
<sup>m</sup> 21:12 Mt 16:22    <sup>n</sup> 21:13 Ap 20:24    <sup>o</sup> 21:18 Ap 15:2, 13; Ga 1:19    <sup>p</sup> 21:19 Ap 15:12



ketpor menmen God kekepek hirak kiriakem ke mit ap ne weiwik me Isrel.

### Pol kemtau him me mit iuwe hirak ken winak iuwe ke God

<sup>20</sup>Pol ketpor epei au, hir newenipi niuk me God. Epei au, hir natip Pol nar ik: “Ti epei hertei mit ne weiwik me Isrel hir mit yapirwe nises him me Krais, hir wen nises him me Moses. <sup>21</sup>“Mit han epei nemipin netpor ti epei atip mit han ne weiwik me Isrel nau nerer wit wit ke mit ne weiwik ham, hir enweikin sip enwet him me Moses, hir ap enrekir yink ke nikerek nir, hir ap enises menmen haiu mit ne weiwik me Isrel in misesim. <sup>22</sup>Maain mit in nanirtei ti hepu, te ti eriak mekam? <sup>23</sup>Haiu metpi menmen haiu han kitetim. Mitikit tekyaa it et hirakit epei tatip God timat wi hirakit teriuwesis menmen. <sup>24</sup>“Ti eno etikeret yi eiriak menmen him me Moses matip te God kaktip menmen im epei au, yi yaain. Ti ewir pewek me mitikit it te mitik pris kakrekyiwekitem. Epei au te hir mit enime paan kirakit. Ti eriak menmen mamir im te mit yapirwe enirtei him hir nemtewem hiram weinim, ti wen hises him me Moses. <sup>25</sup>“Me mit nises him me God hir ap ne weiwik me Isrel, nipaa haiu epei mewisor tiwei metpor hir ap enises him yapirwe nipaa Moses kewisim. Ham im keremem. Haiu han kitet hir ap nanim menmen mit newepwar menmen newet tipir em, hir ap nanim hemkre o miyak mit newers timir hemkre ap mewen au, hir ap netike mit miyapir nanriyanhis neweninem au emit.” <sup>26</sup>“Hir natip epei au, Pol keithis mitikit it wi ham hirak keriyakit ten tiriak menmen him me Moses katip te God katip hirakit tire yaaikit. Epei au, hirakit ten winak iuwe ke God tatip mit pris me wi hirakit timat ere hirakit tire yaaikit te hirakit tatwet God menmen.

### Mit ne Isrel neithis Pol kekre winak iuwe ke God

<sup>27</sup>Maain wi hispinak wik (7) menep epei au, hiram wi mitikit timat menmen hirakit tirakem hiram epei au mesi, mit han ne Isrel kerek nau provins Esia hir nan nir Pol kekre winak iuwe ke God. Hir nikiak han ke mit miyapir en neithis Pol ninap natip nar ik: <sup>28</sup>“Yi mit ne Isrel. Yi eikepai. Mitik ik hirak mitik kerek kepno keprer wit wit katip mit yapirwe hir mit ne weiwik me Isrel netike him me Moses, winak iuwe ke God hiram menmen weinim. In ek hirak epei keithis mitik ap ke Isrel keyik kan kekre haau mit narik ap te nanino nimin ek au. Mit iuwe neriuwesisek, nehimitanek ne haiu mit ne Isrel keriyen.” <sup>29</sup>“Hir natip menmen im nentar hir epei nir mitik Trofimas kitet wit Jerusalem ketike Pol te hir han kitet Pol ketiwekhis ten winak ke God teit nimin. Pol kiriak menmen im au.

<sup>q</sup> 21:21 Ap 16:3; Ga 2:3    <sup>r</sup> 21:24 Nam 6:1-21; Ap 18:18    <sup>s</sup> 21:25 Ap 15:28-29    <sup>t</sup> 21:26 1Ko 9:20    <sup>u</sup> 21:28 Ap 6:13; Esi 44:7    <sup>v</sup> 21:29 Ap 20:4; 2Ti 4:20

<sup>30</sup>Mit yapirwe neit Jerusalem en nesikeyaanmi (o nesikewari) nesiuknen nan nererik neithis Pol neriyaak neiyik nen witeik. Hir neriyaak neiyik nen witeik, mit neiyepet weipir ke winak ke God.

**Mitik iuwe ke ami ke Rom keithis Pol keriyaak keiyik ken winak enuk**

<sup>31</sup>Mit yapirwe nererik hir wen naninep Pol kaki, mit han nen natip mitik iuwe Ofisa ke ami ke Rom nar ik: “Mit yapirwe neit Jerusalem hir nenepan.” <sup>32</sup>Hirak kemtau menmen im epei au, hirak keithis mit han ne ami ninin naanmipre mit ne ami nar 100, hir netike soldia ne ami yapirwe nesiuknen nekiuwe nen nir mit en. Hir nekiuwe nen nir mit en, hir nirek ketike mit ne ami yapirwe, hir nenep Pol au. Hir nerp neit. <sup>33</sup>“Mitik iuwe ke ami kan Pol ketiwekhis katip mit nirak hir nesenkekik neriuwe sen ain wik. Epei au, hirak kitorhi kar ik: “Mitik ik hirak keimin? Hirak kiriak mekam?” <sup>34</sup>Mit han natip him ham, mit han natip him ham te hirak ap kertei menmen werek kentar mit nesikeyaanmi yapirwe te hirak katip mit nirak hir ninanek neiyik nanino winak ke ami kir. <sup>35</sup>Hir neiyik nen ere nipiun lata me winak, mit ne ami ninanek nau niu nentar mit nesikeyaanmi (o nesikewari) yapirwe nanri Pol kaknen te hir nankip. <sup>36</sup>“Hir nisesik ninap natip nar ik: “Yi eikip kaki.”

**Pol katip mit kenmak hirak kiriak menmen**

<sup>37</sup>Hir neit Pol nanrik nanino nimin ein, Pol katip mitik iuwe ke ami keriuwe him Grik ketpiwek kar ik: “Hi hanhan hetput menmen hiram werek?” Mitik iuwe eik ketpiwek kar ik: “Ti harkeik te ti hertei him Grik?” <sup>38</sup>“Hi han kitet ti mitik ke Isip kerek nipaa ein kari han ke 4,000 mit te hir netike gavman ne Rom nare naninepan hir neit hine me his, yipo henmik nirir nen wit تنهاان weinim.” <sup>39</sup>Pol kewenhi kar ik: “Hi au. Hi mitik ke weiwik me Isrel, miye wina weit wit Tasas ke provins Silisia, hi mitik ke wit niuk mirak iuwe. Ti ewisa hi etip mit menmen mai o au?” <sup>40</sup>Hirak kewenhi te Pol kerp kentir leta kikiyamhis keweni ketpor kar ik: “Eikintip.” Hir nekintip, te hirak ketpor keriuwe him me mit ne Isrel.

**22** <sup>1</sup>Hirak ketpor kar ik: “Nai yinan mit iuwe, mit nai ne watiu, yi eiymtau him hi hetpiyem te yi ap aitip hi hahi.” <sup>2</sup>Hir nemtau Pol ketpor keriuwe him mir Hibru, hir nekintip wire wire te Pol wen ketpor kar ik: <sup>3</sup>“Hi hetpi werek. Hi ke weiwik me Isrel, miye pai wina weit wit Tasas ke provins Silisia te hi han hau in ere hi iuwe. Mitik iuwe niuk mirak Gameliel keteikno menmen markeik te hi hises him me Moses kerek nipaa maamrer nai nisesim. Hi hises menmen im hises God iuwe har ke yi mit in yi yisesim. <sup>4</sup>“Hi hewaank mit enipi hir naa nentar hir

° 21:33 Ap 20:23, 21:11    × 21:36 Lu 23:18; Ap 22:22    √ 21:38 Ap 5:36-37    ° 22:3 Ap 5:34; Ro 10:2    ° 22:4 Ap 8:3, 22:19

nises him me Krai. Hi esenek his hit me mit miyapir hatip mit plisman hir newiri nekre winak enuk. <sup>5</sup>Mitik iuwe pris kinin naanmipre mit pris han hirak ketike mit iuwe ne kaunsil hir nanwepypir hi hatip werek. Nipaa hir neweto tiwei hir newisik ken mit han ne weiwik maiu neit Damaskas te hi epei hen en ehithis mit miyapir kerek nises him me Krai, hi hesenkeki heriyei heri hen Jerusalem te mit iuwe en nanip.

### Pol katip mit karkeik hirak kises him me Krai

<sup>6</sup>“Hi wen hepno menep Damaskas wepni kau niminiuwe, wasenum si meke nepni man mir mewenkika. <sup>7</sup>Hi henkewin hiwaa ti hi hemtau him ke mitik ketpo, ‘Sol, Sol ti henmak te ti herewaank?’ <sup>8</sup>Hi pike hitiwekhi, ‘Mitik Iuwe ti keimin?’ Hirak kar ik: ‘Hi Jisas ke Nasaret kerek ti herewaank.’ <sup>9</sup>Mit nan netikewa nir si te ap nemtau him ke mitik werek werek au.

<sup>10</sup>“Hi hitiwekhi har ik: ‘Mitik Iuwe ti hanhan hi eriak mekam?’ Hirak kar ik: ‘Ti ekrit eno wit Damaskas. Ti ehit ein te mitik kaknen kakitput menmen God kakihimitanem ti eriakem.’ <sup>11</sup>Hi ap hir ein ein hentar si epei mir iuwe hi nanamir toto te mit nan netikewa netauhis neriya haiu mariyan men Damaskas.

<sup>12</sup>“Mitik hak kau en niuk mirak Ananias. Hirak mitik yaaik kises him me Moses te mit yapirwe ne weiwik maiu ein hir han kitet natip hirak yaaik. <sup>13</sup>Mitik ik kan kerp kerepta ketpo kar ik: ‘Kai yinak Sol, ti pike ehir ein ein.’ Hirak katip epei au, wasawas hi hir ein ein te hi hirek. <sup>14</sup>Hirak ketpo kar ik: ‘Mitik Iuwe God ke maamrer nau hirak kehimitenut te ti ertei menmen hirak hanhan kakriakem, kehimitenut ti hir Mitik Yaaik kerek kiriak menmen me God, ti epei hemtau hirak ketput keriuwe him mirak. <sup>15</sup>Maain ti eno etip mit miyapir yapirwe ewepypir menmen ti epei hemtewem epei hirem. <sup>16</sup><sup>b</sup>In ek ti ap ehau au emit! Ti ekrit te hi ekirit. Ti enine Mitik Iuwe God ehitiwekhi te hirak kakisak menmen enum ti hiriakem.’

### God kehimitan Pol kaktip mit ap ne Isrel him yaaim me Krai mamno mit ap ne Isrel

<sup>17</sup>“Hirak ketpo epei au, hi pike hen wit Jerusalem. Hi heit winak iuwe ke God in hi hitehi God menmen. Hi hitehi God menmen, hi hepu hi hir menmen mar ke hi hityak, <sup>18</sup><sup>c</sup>Mitik Iuwe Krai ketpo kar ik: ‘Ti ekrit waswas enaaiwir wit Jerusalem entar mit miyapir in ap enimtau him ti etporem me hi.’ <sup>19</sup><sup>d</sup>Hi pike hetpiwek har ik: ‘Mitik Iuwe, hir epei nertei hi epei hen herer wit wit winak mit nererik nekine him me Moses nekrerem, hi hen en heithis mit miyapir hir nises him mit, hi hanip.

<sup>b</sup> 22:16 Ap 2:21; Ro 10:13    <sup>c</sup> 22:18 Ap 9:29-30    <sup>d</sup> 22:19 Ap 8:3, 26:9-11

20<sup>e</sup>Nipaa mit nenep mitik kewepyapir him mit niuk mirak Stiven hi herp menep atip hiram yaaim te hir nakip kaa. Hi hetenen laplap saket me mit hir newir nan nakip. Hi etpor menmen mit hir enimtwem.’ 21<sup>f</sup>Au, Krais pike ketpo kar ik: ‘Hiram menmen weinim. Hir ap te nanimtau him mit au. Ti eno entar hi eriuwetit ti eno yanimin ewepyapir him mai mamno mit ap ne weiwik me Isrel.’ ”

### Mitik iuwe ke ami naanmipre Pol

22<sup>g</sup>Mit yapirwe ein nemtau Pol ere hirak katip menmen me hirak kewepyapir him me mitik iuwe katip mit ap ne weiwik me Isrel ketporem. Hirak ketpor menmen im, hir han enuk ninap him iuwe nar ik: “Yi eikip eki. Yi ap eiwisik kaku ti au ekit!” 23<sup>h</sup>Hir ninap newep laplap mir neteikin hir han enuk wisenuk newir toni waniu (o win) men niu. 24<sup>i</sup>Hir newir toni waniu (o win) men niu, mitik iuwe ofisa ke ami katip mit nirak neithis Pol neriyaak neiyik nanino nimin, hir nankip nanriuwe nipin ere hirak kakwepyapiri nenmak te mit ne Isrel en ninap nesiuwe him marim. 25<sup>j</sup>Hir netiwekhis neriyaak neiyik nen nesenkikwek his mirak te hir nankip. Hir nesenkek his mirak nankip, Pol katip mitik kerek naanmipre 100 mit ne ami kitiwekhi kar ik: “Him mit iuwe ne Rom hir newisim matip hiram yaaim te mit naninep mitik kerek keit tiwei yaan mewik kar ke mit ne wit Rom, te hir newisik ken winak ke masistret wen au, hirak ap katip hirak enuk au?”

26<sup>k</sup>Mitik ik kemtau him im Pol ketpiwekem epei au, hirak ken kir mitik iuwe kirak hirak ofisa ke ami ketpiwek kar ik: “Ti hiriak menmen enum. Mitik eik e hirak ketenen tiwei yaan mewik kire mitik ke Rom.” 27<sup>l</sup>Hirak katip epei au, mitik iuwe ofisa ke ami kan kir Pol kitiwekhi kar ik: “Ti etpo ti hetenen tiwei namba mewik kar ke mit ne Rom o au?” Pol kar ik:, “O, hi hetenen tiwei har ke mit ne Rom.” 28<sup>m</sup>Mitik iuwe ofisa eik ketpiwek, “Hi epei hewir pewek yapirwe te hi heit tiwei yaan mewik hiram matip hi hire mitik ke Rom.” Pol kar ik: “Miye wina te hi hire mitik ke Rom hentar miye haai hir netenen tiwei namba mewik hir nire mit ne Rom.” 29<sup>n</sup>Wasenum mit kerek nankip nanitiwekhi menmen hir nirir nokninan nenpin nekeipniwek. Mitik iuwe ofisa eik kinaain kentar hirak kertei Pol ketenen tiwei kar ke mitik ke Rom, hirak kesak him lo me Rom hirak epei kesenkekik keriuwe sen. Mit iuwe ne Rom neriuwesis mit nanriak menmen im me mit ne Rom.

30<sup>o</sup>Mitik iuwe ofisa hanhan kertei werek menmen mit ne Isrel hir nesiuwe him Pol, te wi ham hirak katip mit nirak nenke sen me Pol, hirak kesiuwe mitik ken katip mit iuwe pris netike mit han en ne kaunsil

<sup>e</sup> 22:20 Ap 7:58, 8:1    <sup>f</sup> 22:21 Ap 9:15, 13:2    <sup>g</sup> 22:22 Ap 21:36    <sup>h</sup> 22:25 Ap 16:37

<sup>i</sup> 22:29 Ap 16:38

nanrerik nanu. Epei au, hirak keithis Pol keyiyik ken kewisik kerp ninaan me mit ne kaunsil ketpor menmen.

### Pol katip him mirak men mit ne kaunsil

**23** <sup>1</sup>Pol kerp kirapit mit ne kaunsil ketpor kar ik: “Nai yinan. Hi hertei hekre han kai menmen me God hi hiriakem hi hisesim nipaa ere in hiram yaaim.” <sup>2</sup>Hirak katip epei au, mitik iuwe pris kinin nanmipre pris han niuk mirak Ananias katip mit nerp menep Pol niwaai his nesiuwek him nentar hirak katip enum. <sup>3</sup>Pol ketpiwek kar ik: “Maain God kakitep ti hire nu mit newis pen kolta mewik te hiram nepei mesine meit nimin. Ti hau en skelim hi heriuwe him lo me Moses, te ti au heweikin sip hewet him me Moses ti hetip mit naniyep.”

<sup>4</sup>Mit kerek nerp menep Pol netpiwek nar ik: “Ti atip enum me mitik pris iuwe ke God.”

<sup>5</sup>Pol katip kar ik: “Hi hertei hirak mitik iuwe pris te hi ap hetpiwek har ek au. Him me God matip mar im: “Yi mit ap eitip enum me mit hir ninin naanmipri.”

<sup>6</sup>Pol epei kertei mit han ne kaunsil hir nises him me mit Sadyusi, mit han au hir nises him me Farisi. Hirak kertei menmen im te hirak katip kar ik: “Nai yinan. Hi mitik ke Farisi, hi nikan ke mitik ke Farisi. Petepin mit neriya hi herp ninaan me kaunsil hentar hi han kitet mit epei naa maain nanikrit nanu nanit.”

<sup>7</sup>Hirak katip epei au, mit ne Farisi netike mit ne Sadyusi nenehan nenterim te hir newep nau nimin pinan hasini pinan hasini. <sup>8</sup>(Mit ne Sadyusi han kitet mit naa hir niwaai hei, maain pike nanikrit nanu au, herwe o ensel hiram mepu au nemipin. Mit ne Farisi han kitet mit nanikrit, ensel netike herwe hir nepu. Nemipin au.) <sup>9</sup>Hir mit wen natipan nenehan ere wisenum, mit ne Farisi han kerek newepyapir him me Moses hir nerp natip nesiuwe him nar ik: “Hau han kitet mitik ik hirak yaaik. Hau han kitet herwe o ensel epei kan ketpiwek menmen.”

<sup>10</sup>Hir nenehan ere wisenum te mitik iuwe ofisa ke ami han kitet hir nanri Pol kaktin yinak yinak te hirak keriuwet mit nirak newep mit nen netiwekhis neiyik nanino winak ke gavman kirak.

<sup>11</sup>Witaan, Mitik Iuwe Krai kan kerp menep Pol ketpiwek kar ik: “Ti han tokik ehu. Ti epei hewepyapir him mai heit Jerusalem, te ti eno wit Rom eriakem empar kerekek.”

### Mit nimenipin natipan naninep Pol

<sup>12-13</sup>Wanewik, mit han ne weiwik me Isrel nererik nimeyipiran natipan naninep Pol. Mit in nererik niriak menmen im hir ninin 40 mit. Hir mit

<sup>j</sup> 23:1 Ap 24:16   <sup>k</sup> 23:2 Jo 18:22-23   <sup>l</sup> 23:3 Mt 23:27   <sup>m</sup> 23:5 Eks 22:28   <sup>n</sup> 23:6 Ap 4:2, 24:15, 21, 26:5   <sup>o</sup> 23:8 Mt 22:23   <sup>p</sup> 23:9 Ap 25:25   <sup>q</sup> 23:11 Ap 18:9, 19:21, 27:24, 28:16, 23

nesiyehan menmen o tipar ere hir naninep Pol neiyik nanwen han te hir nanim. <sup>14</sup>Epei au, hir nen nir pris iuwe netike mit iuwe ne kaunsil netpor nar ik: “Haiu epei mesinehan menmen o tipar ap mamim ere haiu mamnep Pol. <sup>15</sup>Te yi eitike mit ne kaunsil eiriuwet mitik kaktip mitik iuwe ofisa ke ami ke Rom kakithis Pol keiyik kaknen in. Yi eimitiwepin yi eiyitpiwek yi hanhan yayimtau him meiyam me Pol. Au, haiu epei memeryiwek mamkip hirak wen kaknen in.”

<sup>16</sup>Pol nikan suware kirak epei kemtau menmen me mit hir nimenipin naninep Pol te hirak ken winak ke mitik iuwe ofisa ke ami katip Pol em. <sup>17</sup>Hirak ketpiwek epei au, Pol kenine mitik iuwe kinin naanmipre 100 mit soldia ne ami, hirak ketpiwek kar ik: “Ehit pipiak ik eiyik eno mitik iuwe ofisa kit. Hirak kakitpiwek menmen.” <sup>18</sup>Hirak katip epei au, mitik keiyik ken mitik iuwe kirak ketpiwek kar ik: “Mitik kekre winak enuk Pol keninau kitauhi hi heit pipiak ik e eiyik enen ekrit ekintar hirak kakitput menmen.”

<sup>19</sup>Hirak ketiwekhish keiyik ken haau weinim, hirakit tekiyakit tau, hirak kitiwekhi kar ik: “Ti are etpo mekam?” <sup>20</sup>Hirak pipiak ketpiwek keweniwekhi kar ik: “Mit iuwe ne kaunsil natip hirak werek te hir nanituthi teipmen ti ehithis Pol eiyik eno winak ke kaunsil, hir nemipin natip hir hanhan nemtau him meiyam me Pol. <sup>21</sup>Ti ap emtau him mir entar mit ninin 40 mit nesiyeahan menmen o tipar ap nanim ere hir nankip kaki. Hir nemerir ere ti etpor te ti eiyik enen.” <sup>22</sup>Hirak ketpiwek epei au, mitik iuwe ofisa ke ami ketpiwek kar ik: “Ti ap etip mitik hak ti epei han hetpo menmen im.” Hirak ketpiwek epei au, hirak keriuwetek ken.

### **Mitik iuwe ofisa keriuwet Pol ken mitik iuwe gavman Filiks**

<sup>23</sup>Hirak keriuwetek ken, hirak kenine mitikit wik hirakit kepten tinin naanmipre 100 mit ne ami, hirak ketpiwekit kar ik: “Yi eiyit 200 mit soldia neke ti hir netike 200 mit nemerir yipo hir netike 70 mit ne ami nau hos, hir nanit menmen nanimaniyem, hir nanino nanithis Pol neiyik nanino. Me witaan hir nanithis pol kaktike menmen neiyim nanino wit Sisaria. <sup>24</sup>Yi eiri hos keiyak te Pol kakwik, yi naanmampruwek eiyik (o eirik) eino ere eipiun mitik iuwe gavman Filiks.” <sup>25</sup>Hirak ketpiwekit epei au, hirak ken kewis tiwei mar im:

<sup>26</sup>“Hi Klodias Lisias hi hewis tiwei ik ken ti Filiks ti mitik iuwe ke gavman hinin naanmipre mit. Ti yaaik. <sup>27</sup>Mit ne weiwik me Isrel neiyewo mitik ik nare nankip. Hi hemtau hirak kire mitik ke Rom te hi hetike mit ne ami nai men mekepik meriyaak meiyik men. <sup>28</sup>Hi hanhan hertei werek nenmak te hir nesiuwe him te hi heiyik hen winak ke

† 23:15 Ap 25:3   \* 23:27 Ap 21:30-33, 22:25-27   † 23:28 Ap 22:30

kaunsil kir. <sup>29</sup>“Hi han winak ke kaunsil kir, hi hemtau hirak ap kiriak menmen mei te hir nankip kaki o nanwisik kekre winak enuk. Menmen hir nesiuwek him nesiuwereh hiram menmen me him lo me Moses hir nisesim. <sup>30</sup>“Mitik hak kan ketpo mit han ne weiwik me Isrel nimenipin natipan te hi han kitet hi esiuwerek aknen ekrit. Hi epei hatip mit kerek nesiuwek him menmen hir nanino nanirp ninaan mit nanriuwe him.”

<sup>31</sup>Hirak kewis tiwei epei au, mit ne ami nises him mirak. Hir neithis Pol neiyik ne witaan nen ere nipium wit Antipatris. <sup>32</sup>Wanewik, mit ne ami kerek neke ti hir pike nan winak ke mitik iuwe ofisa ke ami, hir newis mit nau hos neithis Pol neiyik nanino Sisaria. <sup>33</sup>Hir neiyik nen Sisaria newet mitik iuwe ke gavman tiwei, hir neithis Pol ken his mirak. <sup>34</sup>Mitik iuwe ke gavman kekine tiwei kitehi Pol kar ik: “Ti ke provins ke nein?” Pol ketpiwek “Hi provins kai Silisia.” Hirak kemtau hirak ke provins Silisia, hirak ketpiwek kar ik: <sup>35</sup>“Maain mit nesiuwe him naninen, te hi emtau him mit entar hi naanmimpre mit ne Silisia ere in.” Hirak katip epei au, hirak katip mit hir naanempre Pol newisik kekre winak iuwe nipaa mitik iuwe Herot kewik hirak winak enuk ke gavman.

#### Mit iuwe ne Isrel nesiuwe him Pol

**24** <sup>1</sup>Wi hispinak (5) epei man men, mitik iuwe hetpris ke Isrel Ananias, hirak ketike mit iuwe ne kaunsil en hir netike mitik niuk mirak Tetalas kerek kertei lo me mit ne Rom hirak kikaap mit ne Isrel hir nisesim te hir nesiuwe him mit neit ninaan me mit iuwe masistret hir nan Sisaria. Hir nan Sisaria, hir nen nir mitik iuwe ke gavman Filiks te hir nesiuwe him Pol. <sup>2</sup>Mitik iuwe kari Pol hirak kan te mitik iuwe kenine Tetalas. Hirak kenine Tetalas, hirak kesiuwe him Pol kar ik: “Ti mitik iuwe ke gavman. Ti nipaa ere in ti naanmiprai werek te haiu mekiyan mau meit. Ti hekepai ti henip yaaimekrehir menmen nipaa haiu misesim enum merer wit wit. <sup>3</sup>Haiu mit merer wit wit han yaaik meriuwerem te haiu matip ti yaaik. <sup>4</sup>Hi hinapen erwit iuwe, te hi hituthi ti han teweninai emtau him menmen meiyam yinam haiu mamitputem. <sup>5</sup>“Haiu mertei mitik ik hirak mitik enuk kari han ke mit ne weiwik me Isrel nau nerer wit wit te hir nenehan nenapan. Hirak mitik iuwe kei ke mit kerek nises him me Jisas nipaa ke Nasaret. <sup>6</sup>“Hirak kari mitik ap ke weiwik me Isrel ketikerek ten winak ke God iuwe keit Jerusalem, te hirak ap kises him me mit neriuwesis menmen im. Haiu metiwekhis han kitet mewepyapirek kakises lo maiu. [7Au, mitik iuwe ofisa ke ami Lisias keit mit ne ami nirak hirak kewep kokninai wisenum keithis mitik ik kerik ken. <sup>8</sup>Epei au, Lisias katip neimin hir naniuwek him hir aninen in enirit.] Ti itehi mitik ik ti hirekes ertei menmen yapirwe haiu mesiuwek him.”

<sup>u</sup> 23:29 Ap 18:14-15   <sup>v</sup> 23:30 Ap 24:5-8   <sup>w</sup> 24:5 Ap 17:6   <sup>x</sup> 24:6 Ap 21:28-30

<sup>9</sup>Hirak katip epei au, mit yapirwe ne weiwik me Isrel neit ein nekepik natip nar ik: “Hirak katip werek, hirak ap kemipin au.”

### Pol katip mitik iuwe Filiks him mirak

<sup>10</sup>Hir natip epei au, mitik iuwe kehis kenine Pol kaknen kaktip. Pol kan kerp katip kar ik: “Hi hertei me tito yapirwe ti naanmiprai heriuwe menmen yapirwe te hi han yaaik etput menmen eteiknut hi hiriak mekam. <sup>11</sup>⁷Ti itehi mit in ti hertei menmen hi hetpiyem. Me wi hiswiyen wik (12) hi han wit Jerusalem ewenipi God. <sup>12</sup>Mit ne Isrel ap nira hi hetike mit han mewepnak matipan meit winak ke God ein, hi ap hari han ke mit te hir han kekrit heit winak ke God o heit witeik. <sup>13</sup>Hir ap neit mitik kiutip kira hi hiriak menmen marim hir nesiuwau him.

<sup>14</sup>⁸“Hi etput menmen im. Hi ewenipi niuk me Mitik Iuwe hirak God ke maamrer nau, te hi hises him me menmen me Jisas kerek mit natip hiram enum. Hi wen hises menmen yapirwe mitik Moses ketike mit profet hir newisim mau tiwei. <sup>15</sup>Hi hises menmen har ke mit in me him me God, maain mit yaain nantike mit enun pike nankrit nanu nanit. <sup>16</sup>⁹Hekrit hekrit hi hare hiriak menmen te God ketike mit miyapir yapirwe nira natip hi yaaik.

<sup>17</sup>⁹“Hi heit wit ham me tito meiyam epei au, hi heit wit Jerusalem ewet mit nai ne weiwik me Isrel pewek mei, hi are ano ewet God menmen. <sup>18</sup>⁹Hi wen heit winak iuwe ke God ein hi hiriak menmen im me him me Moses matip hi hiriakem te God kaktip hi pike yaaik, mit han nira. Mit nau netikewa au, haiu ap mewepnak matipan au. <sup>19</sup>Mit han ne weiwik me Isrel hir ne provins Esia hir nepu winak ke God nira netauhis neriya. Mit en hir hiras eninen in nantip menmen mei meit ninaan mit te hir nansiuwau him, <sup>20</sup>o au en, ti atip mit in hir natip newepyapir menmen hir nir hi hiriakem enum me wi hi herp ninaan me kaunsil. Menmen au, <sup>21</sup>⁹o him miutip im. Nipaa hi herp ninaan mir hi hinap hatip har ik: ‘Mit neriya heit winak ke kaunsil ik nentar hi han kitet mit epei naa pike nanikrit nanu.’ ”

<sup>22</sup>⁹Pol katip epei au, mitik Filiks kerek kertei werek menmen me him me Mitik Iuwe Krai, hirak ketpor kar ik: “Yi yemerir mitik iuwe ofisa ke ami kaknen te hi han kakitet menmen hi ehisesim.” <sup>23</sup>⁹Hirak ketpor epei au, hirak katip mitik kepten ke ami kinin naanmipre 100 mit, hirak naanmipre Pol te ap keriuwesis nirak yinan naninen nanwetiwek menmen.

### Filiks kewis Pol kekere winak enuk me tito wik

<sup>24</sup>Maain wi ham Filiks keit mite pirak Drusila kerek pe weiwik me Isrel. Hirak kesiuwe mitik keit Pol keiyik kan, hirak ketikerep nemtau Pol

⁷ 24:11 Ap 21:17    ⁸ 24:14 Ap 24:5    ⁹ 24:16 Ap 23:1    ⁹ 24:17 Ro 15:25-26; Ga 2:10

⁹ 24:18 Ap 21:26-27    ⁹ 24:21 Ap 23:6    ⁹ 24:22 Ap 23:26    ⁹ 24:23 Ap 27:3, 28:16, 30



katip me mit enises him me Krais Jisas. <sup>25</sup>Pol wen ketpor menmen me mekam yaaim, menmen me mitik kewen han kirak ke menmen yapirwe, katip menmen me wi maain God skelim mit te Filiks kepirpir kinaain ketpiwek kar ik: “Epei werék. Ti pike eno. Maain han kai hi enitut ti etpo menmen.” <sup>26</sup>Hirak wen han kitet Pol kakwetiwék pewék hirak kaksuipanek kakwisik kakno witeik. Hirak han kitet marik te wi ham wi ham hirak keit Pol ketikerek tewepnak.

<sup>27</sup>Pol kepu en ere tito wik epei au. Tito wik epei au, Posias Festas kekrehir ke mitik iuwe gavman Filiks. Hirak Filiks hanhan kenip mit iuwe ne Isrel han yaaik neriuwerek te hirak wen kewis Pol kekre winak enuk kepu kepeit.

**Pol katip kar ik: “Mitik iuwe Sisa ke Rom kakimtau him mai”**

**25** <sup>1</sup>Mitik iuwe Festas epei kan naanmimpre provins ke Judia wi wikak keremem, <sup>2</sup>hirak kinaaiwir wit Sisaria ken Jerusalem, mit iuwe pris netike mit iuwe ne kaunsil nesiuwe him Pol. Hir nitehi Festas <sup>3</sup>hirak kakrekiyor menmen yaaim kakri Pol keyiyik kaknen Jerusalem kakintar hir epei nimenipin naninep Pol nanwisik yayiwe yinak. <sup>4</sup>Festas ketpor, “Mitik Pol kepu kekre winak enuk keit Sisaria. Hi hirekes menep te hi pike eno. <sup>5</sup>Yi eitip mit ni iuwe nanino nantikewa hiau mamno wit Sisaria. Mitik ik kiriak menmen enum te hir nansiuwek him.”

<sup>6</sup>Hirak ketpor epei au, hirak wen kepu ein ere wi hispinak wikak (8) o wi hiswiyen (10) epei au, hirak pike ken Sisaria. Hirak pike ken Sisaria wi ham hirak kau winak ke gavman kerek mit nesiuwe him neitai en, hirak katip Pol eknen. <sup>7</sup>Pol epei kan, te mit ne Isrel kerek neke Jerusalem nan, hir nerp nesiuwe him te hir ap neteikin werék werék Pol kiriak menmen enum im au. Hir nesiuwe him weinim. <sup>8</sup>Pol kikaap hirekes katip, “Hi ap hiriak menmen enum herekir him me mit ne Isrel o winak iuwe ke God keit Jerusalem o ke mitik iuwe Sisa ke Rom au.”

<sup>9</sup>Pol katip epei au, mitik Festas hanhan kiriak mit ne Isrel han yaaik neriuwerek te hirak katip Pol kar ik: “Hirak werék te ti etikewa euno wit Jerusalem te hi emtau mit nesiuwut him ein o au?” <sup>10</sup>Pol pike ketpiwek, “Hi herp winak ke gavman ke Rom, mit hir nemtau mit nesiuwe him menmen. In ek kerekek ti emtau him te ti eitip menmen. Hi ap hiriak mit ne Isrel menmen enum au. Yi yetike mit in ne Isrel yerteiyem. <sup>11</sup>Hi hiriak menmen enum te hi hahi ehinterim, hiram menmen weinim. Hi hahi kerekek, o au en, mit hir nesiuwe him weinim me menmen hi hiriakem, mitik ap kakriyaa kakriuweta te hi eno his mir hir naniyep hi hahi. Hi

<sup>8</sup> 24:25 Jo 16:8    <sup>h</sup> 24:27 Ap 25:9    <sup>i</sup> 25:2 Ap 24:1, 25:15    <sup>j</sup> 25:3 Ap 23:15    <sup>k</sup> 25:7 Ap 24:5-6, 13    <sup>l</sup> 25:9 Ap 24:27

atip mitik iuwe Sisa ke Rom ekimtau him mai.”<sup>12</sup> Hirak katip epei au, mitik Festas ketike mit nirak kerek nekepik neriuwe him mit iuwe ne Rom netpim, hir newepnak. Hir newepnak netpim nepei au, hirak katip Pol, “Nipaa ti hitehi mitik iuwe ke Rom kakimtau him mit, te in ek haiu matip ti eno Rom ehirek.”

### Festas kitehi mitik iuwe Agripa ke Pol

<sup>13</sup>Maain wenke ham, mitik iuwe gavman Agripa ketike yenten pirak Benaisi nan wit Sisaria nanir Festas nanitpiwek hir han yaaik hirak kan kau en. <sup>14</sup>“Hir nepu en wi meiyam, Festas katip Agripa menmen me Pol. Hirak ketpiwek kar ik: “Mitik kiutip keit in kerek nipaa hirak mitik Filiks kewisik kekere winak enuk. <sup>15</sup>“Hi hen wit Jerusalem, mit iuwe pris ne Isrel netike mit iuwe ne kaunsil nesiuwek him nitauhi te hi atip hirak kaki. <sup>16</sup>Te hi hetpor gavman me Rom ap neriuwet mitik kakno his ke mit nankip ere mit ninin nansiuwe him nanit ninaan me mitik hirak kakikaap hirekes kaktip him.

<sup>17</sup>“Hir epei nan in hi ap hemerir wi yapirwe au. Wi ham epei au, hi hen winak ke gavman hemtau him mir, hi hatip mit nai neithis Pol hirak kan. <sup>18</sup>“Mit kerek hanhan nesiuwe him hir nekrit te hir ap nesiuwe him me menmen enum mar ke hi han kitet nansiuerem au. <sup>19</sup>Hir netikerek natipan nenehan me menmen me him lo me Moses kerek hir nisesim, hiram metike him me mitik niuk mirak Jisas nipaa kaa. Au, Pol katip hirak kekrit kepu. <sup>20</sup>“Hi ap han kitet werek werek te hi hises menmen im te hi hitehi Pol hirak werek kakno wit Jerusalem haiu mamimtau him mit nesiuerem mamit en. <sup>21</sup>Au, Pol katip hirak hanhan mitik iuwe Sisa ke Rom kakimtau him mirak, hirak kaku winak enuk te haiu naanmiprewek. Hirak katip epei au, hi hatip mit naiu hir naanemprewek ere hi esiuwerek kakno mitik iuwe keit Rom.” <sup>22</sup>Hirak katip epei au, mitik Agripa katip Festas, “Hi hirekes emtau him mirak.” Festas kewenhi kar ik: “Teipmen, ti emtau him mirak.”

<sup>23</sup>Hirakit tatip epei au, wanewik mitik Agripa ketike Benasi hir nesese nan, mit yapirwe newenipi niuk neriuwe menmen hir nerekiyorem. Hir nan netike mit iuwe ne ami, mit iuwe ne wit, hir nan nau winak kerek mit nererik nemtau him. Epei au, Festas katip mit nirak hir nanino nanithis Pol neiyik naninen. Hir neiyik nan epei au, <sup>24</sup>Festas katip kar ik: “Mitik iuwe gavman Agripa ti hetike mit yapirwe yan yayu in yetikewa. Yi yir mitik ik kerek mit yapirwe ne Isrel neit in netike mit ne Judia neit Jerusalem, hir nesiuwek him. Hir ninap natip nar ik: ‘Haiu minapen hirak kaku. Yi eikip kaki.’ <sup>25</sup>Hi hemtau him mir te hi ap hemtau menmen hirak kiriakem te hirak kaki

™ 25:14 Ap 24:27    ¢ 25:15 Jo 5:28-29    ° 25:15 Ap 25:1-2    P 25:18 Ap 18:15    ¢ 25:20 Ap 25:9-12    ¢ 25:23 Mt 10:18; Mk 13:9    ¢ 25:24 Ap 22:22, 25:2, 7

kakinterim au. Hirak kitehi mitik iuwe Sisa ke Rom kakimtau him mirak hi han kitet hi esiuwerek kakno. <sup>26</sup>In ek hi ap ertei him enum me mitik ik hi ewis tiwei mamno mitik iuwe ke Rom te hi hetiwekhis kan kerp ninaan me ti mitik Agripa ti hetike yi mit yapirwe te yi eiyimtau him mirak yi eikepaa te hi ewis menmen tiwei esiuwerem mamno. <sup>27</sup>Menmen im hi han kitet hira enum. Hi esiuwe mitik ke winak enuk kakno mitik iuwe Sisa ke Rom te hi ap ewis menmen enum hirak kiriakem mau tiwei hi ewisim hiram enum.”

### Pol katip Agripa him mirak

**26** <sup>1</sup>Mitik Festas katip epei au, mitik Agripa katip Pol kar ik: “Hi hetput ti hatip ekaap hirekes.” Pol kikiam his katip mit kar ik:

<sup>2</sup>“Mitik iuwe Agripa. Hi han yaaik hentar petepin hi herp ninaan mit hatip him ekaap hirekes me menmen mit ne Isrel nesiuwau him. <sup>3</sup>Hi han yaaik iuwe hentar ti hertei werek werek menmen haiu mit ne Isrel misesim. Ti hertei markeik te haiu mit han kitet him ham, mit han au, han kitet him ham, te hi hituthi ti ap han ekiteta waswas au. Ti emtau him mai.

<sup>4</sup>“Mit yapirwe ne Isrel nertei menmen yapirwe hi hiriakem nipaa hi kike ere in, me wi hi hepu wit kerek miye wina weitai metike wi hi hepu Jerusalem. <sup>5</sup>“Nipaa ein hir nerteiya te hir han kir hir netputem. Hir nertei nipaa hi hises menmen me Farisi, menmen im hiram minin menmen ham haiu mit miriakem haiu misesim mewenipi niuk me God meriuwerem. <sup>6</sup>“In ek hi herp in mit nesiuwau him nentar hi han kitet God kakikaap haiu mit kakir nipaa hirak katip maamrer nau em. <sup>7</sup>Mit ne weiwik hiswiyen wik (12) me Isrel hir witaan wanewik newenipi niuk me God nemerir mitik kaknen kakikaap haiu mit kakir nipaa God ketpim. Mitik iuwe Agripa, mit ne Isrel nesiuwau him nentar hi hises him me mitik kerek kakikaap haiu mit ne Isrel. <sup>8</sup>Yi mit ne weiwik me Isrel, yi yenmak te yi ap han ekitet God kikian mit nipaa naa?

<sup>9</sup>“Nipaa hi han kitet hi hises menmen yaaim hi hiriak menmen yapirwe te hi hewaank menmen me Jisas ke Nasaret kerek mit nisesik. <sup>10</sup>Hi hiriak menmen im heit Jerusalem. Mit iuwe pris newenhi te hi eno ewis mit yapirwe nekre winak enuk. Maain mit ne kaunsil natip hir nani, hi hewenhi hatip hiram yaaim te hir nani. <sup>11</sup>Wi yapirwe hi hiriak mit enum nanip nekre winak ke mit ne Isrel hir nererik nekine him me Moses neitai. Hi are enipi hir enweik in sip enwet him me Krais. Hi han enuk wisenuk heriuwerei te hi hen wit yanimin enip.

### Pol katip Jisas kari han kirak hirak kisesik

<sup>12</sup>“Me menmen im hi hen wit Damaskas. Hi hetenen tiwei me mit iuwe pris natip hiram yaaim te hi eno ein ari mit nises him me Krais. <sup>13</sup>Hi

<sup>1</sup> 26:5 Fl 3:5-6    <sup>2</sup> 26:6 Ap 23:6, 28:20    <sup>3</sup> 26:9 Ap 8:3

hitet yayiwe hepno hepno ere wepni kan kau niminiuwe hi hir menmen mire si iuwe minin wepni hiram meke nepni man mir meweiknina hetike mit kerek nan netikewa. <sup>14</sup>Haiu yapirwe menke miwaai ti, hi hemtau him ke mitik ketpo keriuwe him me mit ne Isrel netpim, hirak katip kar ik: ‘Sol, Sol henmak te ti herewaank? Ti hire bulmakau kewir hit kenep paap tiknuk ke mitik kirak ti hewaank hirekes.’ <sup>15</sup>Hi hitiwekhi, ‘Mitik luwe ti keimin?’ Hirak Mitik luwe katip kar ik: ‘Hi Jisas kerek ti herewaank. <sup>16</sup>Te ti ekrit ehirp. Hi hewepyapir hirekes ti hira hentar hi hehimitenut ti eriak menmen mai. Ti eno etip mit han menmen ti epei hirem hi heteiknutem, im metike menmen maain hi eteiknutem. <sup>17</sup>Hi naanmamprut te mit ne Isrel nantike mit han ne weiwik ham hir ap te nanitep. Hi eriuwetit ti eno mit ap ne weiwik me Isrel. <sup>18</sup>”Ti etpor him mai hir nanisesim nar ke mit ninapipi hir nesiupan nanamir. Ti eweikin han kir hir ap nises menmen enum mir toto au. Hir nanises menmen yaaim me God mire wepni kir. Hir naninaaiwir Seten hir nanises God te hir enisisa hi ahisak menmen enum mir hir niriakem te God kaknipi hir nanu nimin ke mit God kehimiteni hir nirak.’

#### **Pol katip Agripa menmen hirak kiriakem.**

<sup>19</sup>“Mitik iuwe Agripa, hi epei hir menmen im meke wit ke God man te hi ap eweikin sip ewet him im. <sup>20</sup><sup>x</sup>Au, hi hinin hewepyapir menmen im heit wit Damaskas ketike wit Jerusalem. Epei au, hi hen herer wit wit kerek mit ne Isrel newi, wit im metike wit mit ap ne weiwik me Isrel newim. Hi hatip mit hir enweikin sip enwet menmen enum enises God, hir enriak menmen yaaim neteikin mit hir epei neweikin sip newet menmen enum. <sup>21</sup><sup>y</sup>Mit ne weiwik me Isrel nitauhi hi heit winak iuwe ke God hir naniyep nentar hi hiriak menmen im. <sup>22</sup><sup>z</sup>Te God epei kekepa nipaa ere petepin in ek, te hi herp in hatip him yaaim mamno mit yapirwe, hir niuk mir iuwe, hir mit au weinin. Menmen hi hetpim hiram menmen keremem nipaa mit profet netike mitik Moses katip hiram mannen. <sup>23</sup>“Hir natip mitik God kehimitanek kaknen kakikaap haiu mit, hirak kaki maain God kakikaak hirak kakikrit kakinin mit yapirwe ne weiwik me Isrel, mit au ne weiwik ham, God kaktorhis hir nanu werek werek. Him yaaim im hiram mire si mamkaap mit nanir ein werek werek, hiram mamkaap mit nertei werek menmen yaaim God kiriakem.”

#### **Pol katip kari han ke Agripa te hirak kakises him me God**

<sup>24</sup>Pol wen katip menmen im, mitik Festas kinap ketpiwek kar ik: “Pol ti hetaritari! Menmen yapirwe ti hen skul herteiyem hiram menipit ti

<sup>w</sup> 26:18 Ais 35:5, 42:7, 16; Ef 2:2; Kl 1:13; Ap 20:32    <sup>x</sup> 26:20 Mt 3:8    <sup>y</sup> 26:21 Ap 21:30-31  
<sup>z</sup> 26:22 Lu 24:44-47    <sup>a</sup> 26:23 1Ko 15:20

enuk han ken sip.”<sup>25</sup> Pol ketpiwek, “Mitik iuwe, hi ap hetaritari au. Menmen hi hetpim hiram him yaaim me mitik kertei werek kerekek.<sup>26</sup> <sup>b</sup>Mitik iuwe Agripa, hi ap hinaain hetput menmen im hentar ti hertei menmen im. Ti hertei menmen im hentar menmen im epei man meit wit kike au, man meit wit iuwe mit yapirwe nirem.<sup>27</sup> Mitik iuwe Agripa ti hises him me mit profet? Hi epei hertei ti hisesim herteiyem mekre han.”<sup>28</sup> Mitik Agripa keremiriwek him ketpiwek kar ik: “Me wi im ti han kitet ti ari han kai te hi ehises him me Jisas Krais?”

<sup>29</sup> Pol ketpiwek, “Me wi in ek o maain, hi hitehi God te ti hetike mit yapirwe nau in nemtau him mai yi eiyises him yaaim me Krais te yi eiyir ke hi te hi ap hanhan sen mewi mipre hiram miwaai his mai.”

<sup>30</sup> Pol katip epei au, mitik iuwe Agripa ketike mitik gavman Festas, ketike Benasi wetike mit yapirwe nir nekrit nanino witeik.<sup>31</sup> <sup>c</sup>Hir nekrit nanino witeik, hirakit tatipakit tar ik: “Mitik ik ap kiriak menmen enum te hirak kaku winak enuk o kaki au.”<sup>32</sup> <sup>d</sup>Agripa katip Festas kar ik: “Mitik ik ap kitehi mitik iuwe Sisa kakimtau him mirak te ti esupanekekakno.”

### Mit neithis Pol neiyik nan newisik kau sip kakno wit iuwe Rom

**27** <sup>1</sup> <sup>e</sup>Me wi hir mit iuwe ne gavman han kitet natipan haiu mamu sip manno Itali, hir neithis Pol ketike mit han nekre winak enuk hir newet mitik kepten niuk mirak Julias newetiwek enun in. Julias hirak kepten naanmimpre 100 mit ne ami hir soldia kerek mit nenewor “Mit ne mitik iuwe Sisa ke Rom.”<sup>2</sup> <sup>f</sup>Haiu mit men mau sip me wit Adramitiam, menep te hiram minaaiwir Sisaria mamno mamrer wit wit me wan me provins Esia. Haiu mau en epei au, hiram merekir wan men. Mitik niuk mirak Aristakas ke wit Tesalonaika ke provins Masedonia hirak ketikewai mau sip men.<sup>3</sup> <sup>g</sup>Wi ham haiu mipiun wit Saidon. Julias hirak kiriak Pol yaaik kewisik ken kakir nirak yinan te hir enwetiwek menmen mei te hirak kau sip werek werek kakno.<sup>4</sup> Haiu minaaiwir Saidon men Saipras. Nime miniu man mewep te haiu merekir wan men yinak in me Saipras kerek nime ap miniu meitai au.<sup>5</sup> Haiu merekir wan meperp provins Silisia ketike Pamfilia ere mipiun wit Maira keit provins Lisia.

<sup>6</sup> Haiu meit ein, mitik kerek naanmimpre 100 mit ne ami kinkatin sip ham ere kir miutip me wit Aleksandria mamno Itali. Hirak kir sip epei au, hirak kewisai haiu mewim.<sup>7</sup> Haiu mewim, sip merekir wan men main main me wi ham mentar nime miniu iuwe meiyepetai te haiu mirak menmen iuwe mesipat wit Naidas. Nime meiyepetai te haiu mamno ein au, te haiu meweikin mekiuwe wit Krit kerek wan kimaak keketik kau

<sup>b</sup> 26:26 Jo 18:20   <sup>c</sup> 26:31 Ap 23:29; 25:25   <sup>d</sup> 26:32 Ap 25:11   <sup>e</sup> 27:1 Ap 25:12  
<sup>f</sup> 27:2 Ap 19:29   <sup>g</sup> 27:3 Ap 24:23

nimin. Haiu mekiuwe pinak nime ap miniu meitai mesipat Salmoni. <sup>8</sup>Haiu men mesiurir menep tenhaan haiu miriak menmen iuwe mipiun wit niuk mirak “Wan yaaik sip mamno pasis” hirak menep wit niuk mirak Lasia. <sup>9</sup>Haiu mepu wit eik wi yapirwe ere wi kerek mit ne Isrel ninapen menmen han tewenin God kakisak menmen enum hir niriakem, hiram epei man men. Hiram wi me hauwi hitan te wan sir mewenin iuwe, te Pol katip mit kar ik: <sup>10</sup>“Yi mit, hi hertei haiu mamnaaiwir wit ik mamno mamrekir wan hiram ap yaaim. Au, enum. Maain sip metike menmen mekretek, wan kakiwaankem. Eim keremem au. Haiu mit han mami.” <sup>11</sup>Pol katip epei au, mitik iuwe naanmimpres 100 mit ne ami ap kises him mirak au. Hirak kentaui him me mitik kerek naanmimpres mit bos kru niriak menmen nau sip, hirak ketike mitik kerek ketenen stia ke sip keweiknenik te sip mamno. <sup>12</sup>Wit ik hirak ap wit yaaik te sip mamu in me hawi hitan, te mit yapirwe nau sip hanhan ninaaiwir wit nanino nerekir wan ere hir nipiun Finiks. Hirak wit keit Krit hirak yaaik ke sip mamu en misawin te ap miniu au. Hir hanhan nanu en ere hawi hitan epei au.

#### **Nime miniu wan kewenin wisenuk**

<sup>13</sup>Maain nime wenituk miniu te mit han kitet hir nanises menmen nipaa hir natipanem. Hir nesiupan waai neriyaak kan sip hir ninaaiwir wit hir nesiurir menep tenhaan, nitet Krit. <sup>14</sup>Haiu mepno kike, nime miniu mire yuwerep meke wit Krit man. <sup>15</sup>Nime miniu mire yuwerep man kerek mit neneuwem “No ista” hiram menep sip te mitik ap keweikin stia ke sip werek werek au. Hiram mewep nime ke nimin mamno au, te haiu mewisim meit nime miniu meriuwetem men. <sup>16</sup>Haiu men ere mesipat wit Koda kerek wan kimaak keketik kau nimin. Haiu mesipat Koda ke his enkik, hirak keiyepet nime kike te haiu mari bot kike kisisai meriyaak meriyaak ere haiu meit bot eik mewisik kiwaai kentar sip, haiu mesenekik meriuwe waai hirak kau keit. <sup>17</sup>Hirak kau keit, hir neit waai neiyim nemenkek sip te ap mamwep au. Hir ninaain sip mamno mamtin tenhaan me wan meperp wit iuwe Afrika mamwep te hir nesiupan laplap sel me sip newisim miwaai. Epei au, hir newis nime yuwerep meriuwetem men. <sup>18</sup>Yuwerep kiniu wan wen kewenin te wanewik hir nenke menmen mekre sip newirem mekre wan. <sup>19</sup>Wi ham epei man, hir hiras neit menmen yapirwe me sip hir nenkerem newirem mekre wan. <sup>20</sup>Me wi yapirwe haiu ap mir wepni o hir, te nime wen miniu wisenum. Haiu han kitet maain haiu mami.

<sup>21</sup>Mit nau sip ap naam menmen me wi yapirwe nentar yuwerep, Pol kerp nimin ke mit ketpor kar ik: “Yi mit, nipaa hi hetpi yi ap einaaiwir

---

<sup>h</sup> 27:10 Ap 27:22

wit Krit te sip ap mamriwaank au. Te yi ap yemtau him mai. <sup>22</sup><sup>i</sup>In ek hi etpi yi han tokik eiyu. Haiu mit ap mami au. Sip keremem maminke mamikre wan. <sup>23</sup>Hi hertei menmen im hentar nepip witaan God kerek hi hisesik ewenipi niuk mirak hirak keruiwet ensel mitik hak kan kerp menep ketikewa ketpo kar ik: <sup>24</sup><sup>j</sup>Pol ti ap hinaain au. Ti ehirp ninaan me mitik iuwe Sisa. God kentar hirak yaaik, hirak kakwis mit yapirwe nau sip netikewit hir ap nani au.’ <sup>25</sup>Yi mit ap yinaain au. Hi hises him me God, hi hertei menmen mamnen mamir ke nipaa hirak ketpewem. <sup>26</sup><sup>k</sup>Nime mamriuwetai haiu mamno sip mamtin tenhaan emit wit kerek wan kimaak keketik kau nimin.”

<sup>27</sup>Wi hiswiyen tekyaaait (14) epei men, hawi yuwerep miniu man meit wan eik niuk mirak Edria. Me wi nimin hiram nime meriuwet sip mepno, mit naanmipre sip han kitet haiu epei man menep ti. <sup>28</sup>Hir han kitet haiu epei man menep ti, te hir newir waai nesenek nan mewik mekre tipar ninin mak kiram, hiram matip 40 mita kesikekre. Maain hir pike newirem hiram matip 30 mita kesikere. <sup>29</sup>Hir ninaan sip kerek haiu mewim mamno mamnep nan iuwe me tenhaan te hir neiyik nan iuwe tekyaaait (4), hir nesenek waai mewim, hir newirem mekre wan mikaap sip mamno main main. Epei au, hir hanhan wanewik o eksiupan waswas. <sup>30</sup>Mit naanmipre sip hanhan ninaaiwir sip te hir neit bot kike nesiuwerek kepno kentar tipar hir newisesik natip hir nanwir waai kakri paan me sip metenenim. <sup>31</sup><sup>l</sup>Au, Pol katip mitik kepten naanmipre 100 mit ne ami, hirak ketike mit nirak kar ik: “Mit in naanmipre sip hir nirir nanino, yi yapirwe yayi.” <sup>32</sup>Hirak katip epei au, mit ne ami nerekir waai metenen bot kike te hirak kenterer tipar ken.

<sup>33</sup>Menep kaksiupan hirkiwo (o hir kaa), Pol kitehi mit nanim menmen ketpor kar ik: “Yi epei yemerir hawi yuwerep kaktin kakit me wi hiswiyen tekyaaait (14), yi ap yaam menmen au. <sup>34</sup><sup>m</sup>Hi hitihi him manp yi eiyim menmen te hiram mamkepi yi manpenun eiyu te yayi au. Yi eiyu werek werek.” <sup>35</sup><sup>n</sup>Pol katip menmen im epei au, hirak keit bret kitehi God hirak katip God hirak han yaaik keruiwerem kerp ninaan me mit. Epei au, hirak kaam. <sup>36</sup>Hirak kipaam, hir mit en han tokik nau hir neit menmen meiyam naam. <sup>37-38</sup>Haiu mit mar 276 haiu mepu sip im e. Haiu mit maam ere werek, mit newir wit (hiram mire rais), hir newirem men mekre wan te hir nikaap sip ap nimenun au.

### Sip mewep meit tenhaan

<sup>39</sup>Nepei wanewik, mit naanmipre sip nir ti te hir nepitari hir neit neiyin. Hir nir wan mire tenhaan yaaim mekrerem, te hir han kitet nanino ein

<sup>i</sup> 27:22 Ap 27:10, 31    <sup>j</sup> 27:24 Ap 23:11    <sup>k</sup> 27:26 Ap 28:1    <sup>l</sup> 27:31 Ap 27:22    <sup>m</sup> 27:34 Mt 10:30    <sup>n</sup> 27:35 Mt 15:36; 1Ti 4:4-5

neriuwet sip mamtin mamit تنهاان. <sup>40</sup>Hir nirem epei au, hir neremir waai nan mewim, hiram menke mekre wan, hir nesiupan waai metenen stia. Epei au, hir nikiam laplap sel meit paan ke sip te nime maminpep meiyim mamno تنهاان. <sup>41</sup>Au, sip men menep تنهاان, hiram minatn meit. Sip paan kiram minatn meit ap mepno au, te wan sir mewenin menep sip mikaru mewepim. <sup>42</sup>Mit ne ami nimenipin naninep mit enun ne winak enuk hir hiras nipaa neriyei neri nanino Rom te hir ap nanri wan nanino تنهاان meit ti nirir nanino. <sup>43</sup>Au, mitik kepten iuwe naanmipre 100 soldia ke ami hirak hanhan kikaap Pol te hirak keweni niriak menmen im. Hirak katip mit kerek nertei nari tipar hir nehin niripe tipar nerwak nanino تنهاان eik. <sup>44</sup>Mit han au, hir netenen nu o menmen ham me sip mewep hir nenterim nanino تنهاان. Marim haiu yapirwe men mipiun تنهاان ke pin eik.

### Menmen Pol kiriakem keit wit Molta

**28** <sup>1</sup>Haiu mipiun تنهاان ke pin eik, mit han nan netpai ti ik kerek wan kimaak keketik kau nimin niuk mirak Molta. <sup>2</sup>Mit ne wit in nerekyai yaaim. Hawi epei kan, nime mewep te hir nimansi neriyei man menep mau si mewim. <sup>3</sup>Pol keit haak mei kakwisim mamwaai si, manpen asp (hirak kire manpen siurp) kerek kisawin kinik haak hirak ketpaan ken kentar haak miwaai si hiram sisi. Hirak ketpaan ken kenep Pol kau his mirak kemenkekik kau keit. <sup>4</sup>Mit ne wit in nir manpen siurp (o yenmik) kemenkekhis me Pol hir natipan nar ik: “Nipaa mitik ik kenep mitik kaa, te tipir kau ap kakwisik kaku au. Hirak kinin wan te in ek kaki.” <sup>5</sup>Au, Pol kemiyepep his manpen (o yenmik) kenke kekre si hirak ap kinap au. <sup>6</sup>Mit netpepik nare te his mirak miniu o hirak kenkewin kaki. Hir netpepik netpepik, hir ap nir menmen mar ik nipaa au, hir neweikin han kir natip nar ik: “Au, mitik ik hirak kire God.”

<sup>7</sup>Ti menep wit kerek manpen kenep Pol hiram ti me mitik iuwe naanmipre wit wan kimaak keketik kau nimin ik e niuk mirak Pablias. Mitik ik kan ketaihis keriyei ken winak kirak, te hirak naanmirei werek werek ere wi wikak. <sup>8</sup>Haiu mepu en, Pablias haai kirak kinap yink sisi kesiuwe mune kiwaai yeno. Pol ken haau kirak kitehi God ek. Kitehi God ek, hirak kewis his meterik hirak kekepek kire yaaik. <sup>9</sup>Hirak kiriak menmen im, hir mit yapirwe ne wit wan kimaak keketik hir ninap, hir nan te Pol kiriaki yaain. <sup>10</sup>Pol kiriaki nire yaain, hir newetei menmen yaaim yapirwe. Maain haiu mau sip minaiwiri hir newis menmen yapirwe te haiu mamim me wi haiu mau sip mampino.

### Haiu mepno ere mipiun Rom

<sup>11</sup>Wenke wikak epei au, haiu minaiwir wit Molta haiu mau sip me Aleksandria niuk miram “Tipir wik.” Hir newis ninaan me tipir mit

° 27:44 Ap 27:22-25    ¢ 28:2 2Ko 11:27    ¤ 28:5 Mk 16:18    ¤ 28:6 Ap 14:11



nenewem “Tipir wik” nentar ninaan me nikerek hirakit wik te tipir niuk mirak Sus tau sip paan kiram. Sip im nipaa hawi hitan, hiram mepu wit Molta. <sup>12</sup>Haiu minaaiwir Molta epei au, haiu merekir wan men ere mīpiun wit Sairakyus. Haiu mīpiun wit Sairakyus, haiu mepu en wi wikak. <sup>13</sup>Haiu minaaiwir sairakyus mepno ere mīpiun wit Risiam. Wi ham miutip nime miniu mar ke wentuk te haiu men me wi wik haiu mīpiun wit Pyutiolai. <sup>14</sup>Haiu mepu wit Pyutiolai, haiu mir mit han kerek nises him me Krai. Hir netaihis haiu mamu mamkiteri ere wi hispinak wik (7). Marim haiu mīpiun Rom. <sup>15</sup>Mit kerek nises him me Krai neit wit iuwe Rom hir nemtau haiu mamnen, te hir nen ere nīpiun wit ke maket ke Apias ketike wit niuk mirak “Winak Pasenda Wikak,” hir newenaiyipir. Hir newenaiyipir epei au, Pol han yaaik kitehi God ketpiwek hirak yaaik.

<sup>16</sup>Me wi kerek haiu mīpiun wit Rom, mit ne gavman newis Pol hirekes kau winak hak kiutip, mitik ke ami kiutip naanmīprewek.

#### Pol kewepyapir him me Krai keit wit Rom

<sup>17</sup>Pol kau winak eik ere wi wikak, hirak kesiuwe mitik kitehi mit iuwe ne weiwik me Isrel nau en, hir eninen enrerik enimtau him me Pol. Hir nererik epei au, Pol ketpor kar ik: “Nai yinan, hi ap hiriak menmen enum me mit ne weiwik maiu o hi eweikin sip ewet menmen nipaa maamrer nai nisesim neweteyem au, te mit ne Jerusalem hir netauhis weinim newisa hekre winak enuk neriuweta hen mit iuwe ne Rom. <sup>18</sup>“Hir mit ne gavman ne Rom nitauhi me menmen im hir nare nesiupena nentar hir nertei hi ap hiriak menmen enum te hi hahi. <sup>19</sup>“Au, mit iuwe ne Isrel ninapen hir nansiupena te hi hatip ‘Mitik iuwe Sisa ekimtau him mai.’ Hir neriuweta hi han te hi ap esiuwe him mei me menmen enum hir niriakem au. <sup>20</sup>“Hi hentar menmen im hi hitihi yi mit yi einen te hi hetpi menmen. Sen im mau his mai mentar hi hises him me hirak Mitik Iuwe kerek mit ne Isrel yapirwe nemeriyiwew kaknen kakikaap haiu mit.”

<sup>21</sup>Pol katip epei au, hir netpiwek nar ik: “Haiu ap meit tiwei meke wit Judia mit nesiuerem me ti au. Naiu yinan han ap neke Judia nan in netpai me menmen im, te hir natip ti hiriak enum au. <sup>22</sup>“Haiu hanhan mamimtau menmen ti han kitetim mentar haiu mertei mit nerer wit wit natip enum me mit nises him im ti hisesim.”

<sup>23</sup>Hir natip epei au, hir nimat wi naninen nanimtau him me Pol. Wi hir nimat nanimtau menmen, mit yapirwe nan winak ke Pol kepwik. Wepni ere witaan Pol ketpor him kewepyapir him me God kakinin naanmampre mit. Hirak kare kakri han kir keteiknor Jisas hirak Mitik Krai kerek God

<sup>s</sup> 28:16 Ap 24:23   <sup>t</sup> 28:17 Ap 25:8   <sup>u</sup> 28:18 Ap 26:31   <sup>v</sup> 28:19 Ap 25:11   <sup>w</sup> 28:20 Ap 24:15   <sup>x</sup> 28:22 Ap 24:14

keriuwetek kan kikaap haiu mit hirak ketpor him nipaa Moses ketike mit profet hir newisim mau tiwei. <sup>24</sup>Mit han nises him mirak, mit han au hir ninaain. <sup>25</sup>Hir ninaaiwir winak ke Pol hir natip naminanem neriuwe him me Pol. Hir natip naminanem nentar him Pol ketporem mikaru. Hirak katip kar ik: “God Himin Yaaik katip werek wi nipaa hirak katip profet Aisaia him mirak hirak katip maamrer ni em. Nipaa hirak katip:

<sup>26</sup> <sup>y</sup>“Ti eno etip mit in ne weiwik me Isrel menmen im: Maain yi yayimtwem yayimtwem te yi ap yayirteiyem au. Yi eiyirem eiyirem te yi ap eiyirem werek au.

<sup>27</sup> Han ke mit in epei ken sip, hir nemesis nikip ap nemtau him hir ap nir menmen werek werek au, hir ninapipi. Hir niriak menmen im au, te hir enir menmen neriuwe nanamir, hir enimtwem enriuwe nikip mir, hir han kir enirtei menmen werek werek te hir enweikin sip enisisa te hi God hi ekepi.’ ”

<sup>28</sup> <sup>z</sup>Pol katip him ham mar ik: “Hi hetpi te yi yertei werek. Him yaaim me God kakikaap haiu mit hiram epei man mit ap ne weiwik me Isrel. Hir keriyen nanimtwem nanisesim.” [<sup>29</sup>Pol katip menmen im epei au, hir mit ne weiwik me Isrel ninaaiwir winak kirak hir natipan nenehan wisenum me menmen hirak ketpim.]

<sup>30</sup> <sup>a</sup>Pol kewir pewek katin winak ik hirak kewik ere tito wik, hirak keithis mit kerek nan nirek, <sup>31</sup> <sup>b</sup>hirak ketpor him kewepyapir menmen me God kakinin mit kewepyapir me Mitik Iuwe Jisas Krais. Hirak ap kinaain au, hirak katip mit yapirwe, mit ap netpiwek nar ik: “Ti ap atip im au emit.”

### Mepir keremem

---

<sup>y</sup> 28:26 Ais 6:9-10; Mt 13:14-15    <sup>z</sup> 28:28 Sam 67:2; Lu 3:6; Ap 13:46, 18:6    <sup>a</sup> 28:30 Ap 28:16    <sup>b</sup> 28:31 Ap 28:23